

Wël Jethu cï Luka göt

Wet nom

Wël Jethu cï Luka göt, aa Jethu nyuwoth lon ë yen raan wäär cï Nhialic lueel ka bi tuöc pinyhom, bi koc Itharel ku koc cie koc Itharel ben luök. Acï Luka göt lon Jethu acï Wëi Nhialic cöl bi, “Wet Puoth Yam ben nyuoth koc ñöñ nyin.” Ku wëlkä, aa la yiic käk wic raan ëbën. Käk miet puöu aa reer wël cï Luka göt yiic aya, cïmën ben Jethu pinyhom, acï lueel thïn cök tueñ yiic, ku te thöök wël thïn aya, ku wäär ler Jethu nhial. Anyiköl la tueñ ë wet kënë, ku juëñ bi gam koc cï gam rot juak la nhial Jethu cök, aaci raan töñ kënë göt aya athör Luoi Atuuc Jethu yic.

Abaj 2 ku 6 (tiñ käk cï göt athöör yic bö ciëen) aatö kajuëc yeke yök athör kënë yic ë rot. Cïmën anyikööl diet atuuc nhial, ku këwäär cï abiök Jethu la neem wäär dhiëeth ye. Ku la Jethu luañ Nhialic wäär ë yen dhök. Ku wël waal raan path pan Thamaria ku manh cï mää. Ee wëlkä yiic, ee rök yen acï ber yic bi teet koc puöth. Ku Wëi Nhialic, ku käk cï diäär looi ë luoi Jethu yic, ku pel bi Nhialic adumuööm päl piny.

Käk tö thïn

Wet Nom 1:1-4

Dhiëth ku meeth Joon raan koc muoc nhiim ku jöl a Jethu 1:5-2:52

Luoi Joon raan koc muoc nhiim 3:1-20

Miöc ë nom ku thëm Jethu 3:21-4:13

Luoi Jethu ëbën pan Galilia 4:14-9:50

Jäl pan Galilia ku la Jeruthalem 9:51-19:27

Nin ciëen kadhorou thuonde nom tueñ 19:28-23:56

Jön rot ku nyooth rot ku la nhial ë Beny 24:1-53

1 ¹Tënë Thiöpiluth, cit te ye piëñ ye, acï koc juëc them bik käk cï röt looi kamkua göt. ²Aaci get käk cï koc cï ke tiñ, ku koc lui wet Nhialic lek yo tewäär jöök kakkä röt. ³Këya, Bánydie, wën cï yen käk cï röt looi muk cök tewäär jöök kek röt, aca tak ba ke göt apath tënë yi, ⁴rin bi yin kajuëc cï piöc tënë yi jäl ñic lon cii kek ye lueth.

Atuny Nhialic acï dhiënh Joon lueel

⁵Wäär ye Yërot benyakhom pan Judia, raan käk Nhialic cöl Dhäkaria ë tö thïn, ku yeen ë ye raan akut koc käk Nhialic cöl Abija, ku yeen ë la tiñden cöl Elithabeth, nyen kuat Aron. ⁶Dhäkaria ku Elithabeth aake ye koc path tënë Nhialic, rin keek aake reer ke cïn gup awuöc ke thek lööñ Nhialic. ⁷Ku keek aake cïn mith rin Elithabeth ecii dhiëth, ku keek aake cï dhiöp kedhie aya.

⁸Nayon akäl tök, yen ke kuëer koc akut Dhäkaria bik luui luañ Nhialic, ⁹ke kocken akut cuet gek, go lööny tënë ye bi ya yen la adöñ ñir took ariäk nom luañ Nhialic. Go la lueek. ¹⁰Ku tewën took yen adök lueek, ke koc juëc awën cï guëer aake rök ayeer.

¹¹Kaam wën, ka atuny Nhialic nyuth rot ye ke kääc löñ cuëc ariäk nom tewën took yen adöñ ñir thïn. ¹²Tewën tiñ Dhäkaria ye, go riöc apei ku muum nom. ¹³Go atuny Nhialic lek ye, “Dhäkaria! Duk riöc, rökdu acï Nhialic piñ, ku emën tieñdu Elithabeth abi manh moc yök. Na la dhiëeth, ka bi cöl Joon. ¹⁴Wek aabi puöth miet wedhie wek tieñdu te le ye dhiëeth. Ku koc juëc aabi puöth miet ke we aya, ¹⁵rin yeen abi ya raan töñ ril kam koc käk Nhialic tiñ. Ku yeen acii bi ya dek kuat muön la yic luou. Ku yeen abi Wëi Nhialic la yeguöp ke cök ñoot man yäc, ¹⁶ku yeen abi koc Itharel cöl adhuk Nhialic Bányden. ¹⁷Abi kañ tuöl tënë Beny kek riel thöñ cïmën riel Nhialic wäär tö tënë Elija. Ku Joon abi wärken ë mith cöl anhiar miethken. Ku koc ril nhiim emën cie wet Nhialic ye piñ, aabi kenhiiim waar. Ku këya, yen ë te cï Joon koc cöl aa guir röt thïn rin ben Bányda.”

¹⁸Go Dhäkaria lueel tënë atuny Nhialic ëlä, “Ba ñic kädë lon bi kënë rot looi? Yen acï dhiöp ku tieñdie acï dhiöp aya.”

¹⁹Go atuny Nhialic dhuök ye, “Ee yen Gabriel, reer Nhialic lööm ku yen acï tooc ba yi ben lek wet puöth kënë. ²⁰Rin këc yin wet ca lueel gam, yin abi reër yi cie jam, yet te bi kënë rot kañ looi akölden bi yen rot looi ke cit tede.”

²¹ Ten awën, kɔc aake tit Dhäkaria ke cī gāi kē rëer yen luaj Nhialic apei kälä. ²² Nawën le ben bei ke cī jam, gokë ñic lɔn le yen kē cī rot nyuöth ye, tewën ye yen nyuuth yecin ku cī jam.

²³ Nawën la nīn luui Dhäkaria luaj Nhialic thök, ke dhuk paande. ²⁴ Nawën ke tienje Elithabeth yök meth, ku jol rëer baai pei kadhiëc ke cie la ayeer. ²⁵ Ku jol ya lueel, “Nhialic acī kënë looi tënë ya bi piathde nyuöth ya, ku acī kē ye ya dhöl guöp rin cī yen rol jal nyaai!”

Atuny Nhialic acī dhiënh Jethu lueel

²⁶ Tewën ye pei Elithabeth dätem, ke Nhialic tooc atuönyde Gabriel gen Nadharet tö pan Galilia, ²⁷ tënë nyan bim cöl Maria, ku ë thieek mony cöl Jothep, raan dhiënh Benyjaknhom Debit. ²⁸ Go atuny Nhialic ben tënë ye ku lueel ëlä, “Madho, yīn athiän dhëëñ Nhialic. Bänyda atö ke yī!”

²⁹ Go Maria riöc ku muum nhom wën piñ yen wëlkä, ku thöön yepuöu kāk tö ë wet kënë yic. ³⁰ Go atuny Nhialic lueel tënë ye, “Duk riöc Maria, yīn anhiëer Nhialic. ³¹ Yīn abī meth yök, manh moc. Ku na la dhiëeth ka ba cäk ke cöl Jethu. ³² Abī ya raandit apei Nhialic nhom. Ku abī cöl Wën Nhialic Madhöl. Ku Nhialic Bänyda abī bäany Debit wundit yiëk ye, ³³ ku abī ya beny pan yī Jakop akölrüëc ëbën, ku bäanyde acī bi thök alanden!”

³⁴ Go Maria lueel tënë atuny Nhialic, “Bi rot looi kädë. Yen ë nyen bim kēc thiaak?”

³⁵ Go atuny Nhialic ben lek ye, “Wëi Nhialic abī lööny yiguöp ku rielde abī ben yīnhom. Manh thin dhëñ ba dhiëeth abī cöl Wën Nhialic. ³⁶ Ku det akīn aya, molen Elithabeth cī dhiöp acī meth jäl yök cök a wäär ye ye tiñ ke ciet cī rol. Päike aa dätem ëmën. ³⁷ Rin ñic Nhialic kähn looi ëbën. Acīn kē gök ye.”

³⁸ Go Maria lueel, “Yen alony Bänyda, abī looi tënë ya cimën wetdu.” Go atuny Nhialic jäl.

Maria acī Elithabeth la neem

³⁹ Nawën nīn lik cök, ke Maria lööny dhöl ke cīn gäau bi la pan yī Dhäkaria reer tethöny pan Judia. ⁴⁰ Ku ler pan Dhäkaria ku muöth Elithabeth. ⁴¹ Kaam wën piñ Elithabeth Maria ke muöth ye, ke manh liec yen riän yeyic. Ku go Wëi Nhialic guö lööny yeguöp. ⁴² Ku lueel röldit tënë Maria, “Yīn aye leec diäär yiic ëbën, ku lec manh yänydu. ⁴³ Yenö thieek yayic abī man Bänydie ya ben neem? ⁴⁴ Kaam wën piñ yen yiröl yī muöth ya, ke manh tö yayic mit puöu ku le nyoön-nyoön. ⁴⁵ Yīn amit guöp rin cī yīn wet Bänyda gam, lɔn bi wet cī lek yī rot tieeñ!”

Waak Maria

⁴⁶ Go Maria lueel,

“Yīn Bänyda yīn apiaany yapuöu,

⁴⁷ ku yen acī puöu miët

tënë Nhialic pīr yen,

⁴⁸ rin cī yen aluönyden cie kuëec nhom lieec.

Ku akölë le tueñ,

riëc ëbën abä leec rin cī Nhialic yen döc,

⁴⁹ rin cī Nhialic Madhöl

kädit looi tënë yen.

Yen aril ku adhëñ.

⁵⁰ Ku yeen alir puöu tënë kuat raan ëbën,

kuat riöc ë yeen.

⁵¹ Nhialic acī kɔc bän nhiam

thiäi pinynhom köñden ril.

⁵² Ku acī bänny ril piek piny thöcken nhīim,

ku jöt kɔc cī nhiam cie kuëec nhīim nhial.

⁵³ Ku ee kɔc ñöñ wic kähn,

yiëk kajuëc ku nyiëñ ajieek.

⁵⁴ Ku acī wetden cī thön wärkuan dit tieeñ nhom

ku kony aluönyke, kɔc Itharel.

⁵⁵ Cimën wäär cī yen ye lek wärkuan dit,

Abaram ku mīth cī lök dhiëeth!”

⁵⁶ Ku jol Maria rëer kek Elithabeth tecit pei kadiäk ku dhuk panden.

Joon aci dhiëeth

⁵⁷ Nawën ke pei Elithabeth thök, ku dhiëeth manh moc. ⁵⁸ Nawën piñ koc akeu nhom ku koc ruäai ke ye lon ci Nhialic ye lieec, ke mit puöth apei.

⁵⁹ Nawën aköl ye nin bet, ke koc bö bi meth ben noot. Ku wickë bik cäk rin wun Dhäkaria. ⁶⁰ Go man kuec ku lueel, “Acöl Joon.” ⁶¹ Gokë lueel tënë ye, “Acin raan ruäai ke we ci cäk ë rinkä.” ⁶² Ku nieukë wun nyin, ku thiëckë te bi yen meth cäk thïn.

⁶³ Go Dhäkaria agen getget cöl ku get, “Acöl Joon.” Gokë gai ëbën. ⁶⁴ Ku kaam thiin awën ke go njec jam ku leec Nhialic. ⁶⁵ Go koc thiäak ke ke gai, ku thiëi wëlkä pan Judia yic, ku ye koc ëbën jam ë ke. ⁶⁶ Ku kuat raan ci wëlkä piñ ë gai ku lueel, “Manhë, bi jäl yiëndë aköldä?” Rin ë yic, riel Bányda areer kek ye.

Waak Dhäkaria

⁶⁷ Go Wëi Nhialic lööny Dhäkaria guöp, ku lueel maany ci Nhialic nyuöth ye ëlä,

⁶⁸ “Lecku Beny, Nhialic Itharel! Rin ci yen ben bi kacke ben luök.

⁶⁹ Ku cöl raan pir yo atul yön Debit aluonyde.

⁷⁰ Wetde aci koc kække tiñ lueel theer,

⁷¹ lon bi yen yo kony aleikua ku koc man yo.

⁷² Aci Nhialic lueel lon bi yen wärkuan dit lieec,

ku muk löñ ë döör ci yen mäath dom ke ke nhom.

^{73–74} Cimën ci yen mël kuëñ tënë Abaram wäditda,

ku thon lon bi yen yo kony aleikua,

yok aabi këde ya looi ke cin dieer,

⁷⁵ te yer yok puöth ku lok cök yenhom akölaköl te pür yok.

⁷⁶ Ku yin manhdie, yin abi ya raan käk Nhialic tiñ,

yin abi la tueñ yenhom ba dhöl la guiir tënë yeen.

⁷⁷ Ba lek koc te bi kek pir akölrüëc ëbën yök thïn, te pel adumuöömken piny.

⁷⁸ Nhialic alir puö,

ku yen abi raan cit ruel cöl abö pinyhom.

⁷⁹ Ku yeen abi ruel tënë koc tö muöth yic,

rëer thou yic, bik dhöl ye koc döör ke Nhialic jäl yök.”

⁸⁰ Ku Joon aci jäl dit ku yik Wëi Nhialic riel dit. Ku pür roor te ci ceñ ë rot yet aköl tul yen Itharel nhom.

Jethu aci dhiëeth

(Mk 1:18-25)

2 ¹ Benyñaknhom cöl Cither ëci wet lueel bi koc bæi mec ke kuen. ² Ku kën yen ë te jock kuen ë koc rot tewäär ye Kuirino beny pan Thiria. ³ Go raan ëbën la bi la göt rin, ñek pan wundit ku ñek pan wundit.

⁴ Go Jothep jäl Nadharet tö Galilia bi la gen Benyñaknhom Debit, tö pan Judia cöl Bethalem, rin ye yen raan dhiënh Debit. ⁵ Aci la bik rienken la göt kek Maria wic kacken bik gam ye, ku ë liac. ⁶ Tewën rëer kek Bethalem, ke nin bi Maria dhiëth thök. ⁷ Ku dhiëeth wënde, ku der köu alath ku tæu diaany yic wën liiu tënë anin yön jööl.

⁸ Ku koc biöök aake rëer pan wën, ku aake ruu tiet ë thäkken. ⁹ Kaam wën ka atuny Nhialic tul kelöm ku ruel yer Nhialic keköth bi ke riaal. Gokë riöc apei. ¹⁰ Go atuny Nhialic lek ke, “Duökkë riöc, ee wet path yen alek we, wet bi thäi ëbën puöth miet thïn. ¹¹ Rin akölë, gen Debit ten, Beny Pir koc aci dhiëeth, ku yen ë Raan ci Nhialic loc ku döc. ¹² Ku abäk njic këlä, wek aabi meth yök, manh ci der köu alath, ku aci tööu gol cök.”

¹³ Kaam awën ka atuuc juëc kök met röt thïn ku leckë Nhialic ku luelkë,

¹⁴ “Yeku Nhialic door, Aciëñ tö nhial,

ku döör pinyhom tënë koc nhieer.”

¹⁵ Nawën ci atuuc juëkä dhuk nhial, go koc awën lueel kamken, “Lok Bethalem buk käk ci lek yo la tiñ, ku käk ci Bányda nyuöth yo.” ¹⁶ Gokë la ke ban keköth, ku yökkë Jothep kek Maria ku Meth ke ci tääu gol cök. ¹⁷ Nawën tiñ abiök meth, ke lek koc ëbën käwën ci atuny Nhialic lueel ë rienke. ¹⁸ Go koc ci wël koc

abiök piñ gäi apei. ¹⁹ Go Maria wëlkä ebën piñ apath, ku muk ke yepuöu. ²⁰ Go kóc abiök awën dhuk ke lec Nhialic, rin kák cïk piñ ku tïnkë ke, kecït tewäär cï atuny Nhialic lek ke.

Jethu aci cäk

²¹ Nawën aköl ye nin bet, aköl yen bi ye ɲoot, go cäk ke cöl Jethu, rin wäär kek cï atuny Nhialic lueel wäär ɲot këc Maria liëc ë ye.

Jethu aci yäth luañ Nhialic

²² Nawën cï nin thiärɲuan thök cït löñ Mothith, ke Jothep kek Maria la luañ Nhialic Jeruthalem bik meth la nyuöoth, ²³ cïmën löñ cï Mothith nyooth theer ëlä, “Manh moc, ku ye kaai abi juer Nhialic.” ²⁴ Ku keek aya aaci kuör karou juaar cïmën löñ Beny.

²⁵ Ku mony cöl Thaimon ë ciëñ Jeruthalem, ku ë raan path apei ku ë riöc Nhialic. Ku ë tit Raan Pïr kóc Itharel, ku Wëi Nhialic ë tö yeguöp. ²⁶ Ku ëci Wëi Nhialic lek ye lön cïi yen bi kañ thou, te këc yen Raan cï Nhialic löc ku döc kañ tïñ. ²⁷ Nawën yeth Maria ku Jothep Jethu luañ Nhialic, bik kë ye löñ Mothith lueel la looi, ke tæu Wëi Nhialic Thaimon puöu bi la luañ Nhialic aya. ²⁸ Go Thaimon Jethu jöt ku leec Nhialic ku lueel,

²⁹ “Ee yïn Beny, yïn aci wetdu tiëñ nom,

jöl aluonydu puöl bi jäl, ke cï la läñ.

³⁰ Te bi yïn kacku kuony thïn aca tïñ nyienkie,

³¹ ku aca guir thei nom

³² ku ee piny mer bi kóc cie kóc Itharel kãñ tïñ

ku bi Itharel thändu aleec thïn.”

³³ Kaam wën keec Jothep kek Maria ke cï gäi wël lueel Thaimon rin meth Jethu, ³⁴ go Thaimon ke döc ku lueel tënë Maria, “Yen manh kënë aci Nhialic löc bi kóc juëc Itharel muör ku pïr kóc kök. Ku yeen abi ya raan bi wet Nhialic nyuöoth, ku abi kóc juëc wël rec aa lueel yeguöp. ³⁵ Ku yïn Maria, yïn abi reem puöu ciet yi cï gut pal, bi wet tö kóc juëc puöth jäl ɲic thïn.”

³⁶ Ku tïñ kák Nhialic tïñ cöl Ana ë tö thïn, ku ë ye nyan mony cöl Panuel, raan dhiënh cöl Acer kuat Itharel yic. Ana ëci dhiöp apei, ku ëci thiaak ku rëer kek muonyde run kadhorou ku thou muonyde. ³⁷ Ku jöl Ana lök rëer ke ye lëer ruöön thiärbet ku ɲuan. Ecie jäl luañ Nhialic, ë ye cool ku ruu ke loi kák Nhialic, ku röök ku theek miëth. ³⁸ Ku akölë guöp aci rot mät kóc wën, ku leec Nhialic ku lueel wetde rin meth, tënë kóc ye tiit lön bi Nhialic thänden Itharel weer bei.

Jethu aci dhuök Nadharet

³⁹ Nawën cïk këriëc ebën jäl looi cïmën löñ Nhialic, ke Maria ku Jothep dhuk Galilia Nadharet panden.

⁴⁰ Ku jöl Jethu dit ku ril apei, ku ɲic kãñ ku döc Nhialic.

Jethu ë tö luañ Nhialic

⁴¹ Ruöön ebën Jothep kek Maria aake ye la Jeruthalem rin Yandit Ayum cïn yic luou. ⁴² Naɲon cï run Jethu jäl aa thiäär ku rou, ke cath ke ke bik la yai yic Jeruthalem. ⁴³ Nawën cï yai thök ke dhuk ciëñ, ku kuckë lön cï Jethu döñ geu, ⁴⁴ ë cïk tak lön cieth yen ke kóc kök, ku ciethkë yet thei. Nawën ke wickë kam kóc ruääi ke ke ku kóc ɲickë. ⁴⁵ Nawën cïk yök, gokë dhuk Jeruthalem bik ben la wïc thïn. ⁴⁶ Na aköl ye nin diäk, ke jölkë yök luañ Nhialic Jeruthalem, ke cï nyuc kam kóc piöoc lööñ Nhialic ke piñ welken, ku yeke thiëc.

⁴⁷ Go kóc ebën gäi wën piñ kek ye ke jam cïmën raan ɲic kãñ apei, ku te bëer yen welken aya. ⁴⁸ Nawën tïnkë manhden ke gei ku lueel man, “Yeñö manhdie looi yïn kënë tënë ɲo? Yïn acuk wïc apei ɲok wuur.”

⁴⁹ Go lek ke, “Yeñö wieckë ɲa? Kuöckë lön dhil ɲen kák ë Wä looi?” ⁵⁰ Ku aa këc wet cï lueel deet yic.

⁵¹ Go Jethu jäl ke ke ku dhukkë Nadharet, ku jölkë ceñ ke ye welken piñ, ku jöl man kakkä muk yepuöu.

⁵² Ku jöl Jethu dit ku ɲic kãñ apei. Ku Nhialic ë mit puöu tënë ye, ku yen lön kóc aya.

Piöoc ë Joon raan kóc muöc nhïim

(Mt 3:1-12; Mk 1:1-8; Jn 1:19-28)

3 ¹ ɲon yen ruöön thiäär ku dhiëc ke Tiberiöth ye beny, ku Pilato ke ye benydit mac Judia, Antipäth Yërot ë ye beny Galilia ku Pilipo wämënh ë mac Ituria kek Trakonitith, ku Lithaniath ë ye beny Abilene, ² ku

Anath kek Kaipa aake ye bänydit käk Nhialic. Tëenë, ke Nhialic lëk wet Joon wën Dhäkaria tō roor. ³ Go Joon bëi tō wär Jordan you kueny yiic ke wëët kōc, “Pälkë luoi käreec, ku calkë röt aa muoc nhïim, rin bi adumuömkun päl piny tënë we.” ⁴ Cïmën cï ye göt athör Ithaya yic raan käk Nhialic tiñj ëlä,

“Raan kakkie tiñj abi këcït löör gut yic bi yen kōc caal tede ë rot,
ku lëk keek ëlä,

‘Guierkë dhël ë Beny, luoi-kë dhölke bik la cök.

⁵ Thönykë yōn la tiām piny
ku dhuökkë yōn thöny nhïim piny,
ku cökkë dhël cie yic neer,
ku thöñkë dhöl la yiic ḡony nhïim.

⁶ Ku raan ëbën, abi te ye Nhialic yook luäk thïn tiñj!’ ”

⁷ Ku lëk kōc juëc bö tënë ye bi ke ben muoc nhïim, “Awek dhiënh käpieny! Yeḡa lëk we bāk kat këreec bö? ⁸ Luoi-kë käk ye nyooth lōn cï wek muöl käreec yakë ke looi. Ku duökkë wepuöth tōñj ku luelkë yōk aa mïth Abaram. Alek we lōn alëu Nhialic bi aleelkä cōl aaye mïth Abaram. ⁹ Ku ëmën yëp acï ther bi ke tiim yep, rin na ye tim cie luok, ka yep ku cuet ë meeec.”

¹⁰ Go thän awën Joon thiëec ëlä, “Na ye këya, buk ḡō looi?” ¹¹ Go Joon beer, “Raan la aleth karou, adhil tōk yiëk raan cïn alath, ku raan la miëth adhil looi këya.”

¹² Go kōc ajuër kut ben tënë ye aya bi ke ben muoc nhïim, ku thiëckë, “Raan piöoc buk ḡō looi?” ¹³ Go lek ke, “Duökkë wëü ye lööm ë ruëny tënë kōc.” ¹⁴ Go apuruuk ben ku thiëckë ëlä, “Na yook, buk ḡō looi?” Go lek ke, “Duökkë kōc ye rum, ku duökkë kōc ye gaany wet ë lueth, ku yakë puöth la yum ariöpdun yic.”

¹⁵ Go ḡathden jäl dit, ku yekë tak lōn nadë ke mony abi dhiel a Raan cï Nhialic lōc ku döc. ¹⁶ Go Joon lek ke ëbën ëlä, “Wek aa ya muoc nhïim piü ë path, ku raan dit ku ril apeï tënë ya abö, raan na cōk aa warke ka cä lëu ba ke döc. Ku ë yic yen acïi path ba lëu, ba ya aluonyde. Ku yeen abi kōc kōk weyiic muoc nhïim Wëi Nhialic, ku muoc kōc kōk nhïim ë mac. ¹⁷ Yeen acit raan muk lōk kām ye rap kōöm, bi rap tek thook kek miël. Ku wiiu rap ku tōu ke. Ku yōt miël many cie thou.”

¹⁸ Wël kōk cït kakkä acï Joon lek kōc apeï bi yen Wet Puoth Yam piöoc thïn.

Joon raan kōc muoc nhïim acï mac

¹⁹ Ku Joon ëcï Antipäth Yërot, beny Galilia jääm guöp käreec apeï, rin cï yen Yërodia tiñj wämënh rum bi ya tieḡde, ku looi käjuëc rec kōk aya. ²⁰ Go Antipäth Yërot Joon mac, ku këñë ë këreec det cï mat kāracken cï looi yiic.

Jethu acï muoc nom

(Mt 3:13-17; Mk 1:9-11)

²¹ Nawën cï thän awën muoc nom ëbën, ku Jethu ke cï muoc nom aya. Kaam wën röök yen ke nhial liep rot. ²² Ku bö Wëi Nhialic yenhom këcït kuur ë dit. Ku piñj röl Nhialic nhial ke luel, “Yïn ë manhdien nhiaar. Yen amit puöu kek yi.”

Kuat Jethu

(Mt 1:1-17)

²³ Wäär jōok Jethu piöocde cök, ke ruönke aake ye thiärdiäk.

Ku ë ye raan ëbën tak lōn ë yen wën Jothep, wäär wën Yeli,

²⁴ wën Mathat, wën Lebï, wën Melki, wën Janai, wën Jothep,

²⁵ wën Matathia, wën Amoth, wën Nayum, wën Ethli, wën Nagai,

²⁶ wën Manth, wën Matathia, wën Themein, wën Jothek, wën Joda,

²⁷ wën Joanan, wën Retha, wën Dherubabel, wën Cealtiel, wën Neri,

²⁸ wën Melki, wën Adi, wën Kotham, wën Elmadam, wën Er,

²⁹ wën Jocua, wën Eliedher, wën Jorim, wën Mathat, wën Lebï,

³⁰ wën Thaimon, wën Juda, wën Jothep, wën Jonam, wën Eliakim,

³¹ wën Meliea, wën Mena, wën Matatha, wën Nathan, wën Debit,

³² wën Jethe, wën Obet, wën Boath, wën Thalmon, wën Nacon,

³³ wën Aminadap, wën Admin, wën Arni, wën Yedhron, wën Peredh, wën Juda,

34 wën Jakob, wën Ithäk, wën Abaram, wën Tera, wën Nayör,
 35 wën Theruk, wën Reu, wën Pelek, wën Eber, wën Cela,
 36 wën Kainan, wën Arpakcat, wën Cem, wën Noa, wën Lamek,
 37 wën Methuthela, wën Enok, wën Jaret, wën Malaleel, wën Kenan,
 38 wën Enok, wën Theth, wën Adam wën Nhialic.

Jethu aci jøŋrac them

(Mt 4:1-11)

4 ¹ Go Jethu jäl wär Jordan ke cī Wëi Nhialic la yeguöp, ku yeth roor te cī ceŋ, ² te cī jøŋrac ye ben la them thīn nīn thiärŋuan. Ku ëcie mīth ë nīnkä yiic ëbën, nawën cik thök ke jøl cök nök.

³ Go jøŋrac rot cuöt ye ku lueel, “Na ye Wën Nhialic ke lek alel kënë bī ya ayup.” ⁴ Go Jethu beer, “Acī göt theer ëlä, ‘Raan acie pīr ayup ë rot.’ ”

⁵ Go jøŋrac yäth tethöny, ku nyuth beei pīnyhom ëbën nyin yic. ⁶ Ku lueel tēnē ye, “Käkkä ëbën aaci gām ya, ku aleu ba ke gām raan ca tak. ⁷ Kēya, na dor ya ka bī ya kākku ëbën.” ⁸ Go Jethu beer tēnē ye, “Acī göt ëlä, ‘Yīn abī Nhialic Bānydu door ku loi wetde yetök!’ ”

⁹ Go jøŋrac yäth Jeruthalem, ku tēu luaŋ Nhialic nom ku lueel, “Na ye Wën Nhialic ke yī cuet rot piny temec kënë, ¹⁰ rin ëcī göt ëlä Nhialic abā atuöccke lek bik yī tiit, ¹¹ ku mukkē yī kecin, ba yicök cī cök deeny alel.”

¹² Go Jethu beer, “Acī lueel theer ëlä, ‘Duk Nhialic Bānydu them ë path.’ ”

¹³ Nawën cī jøŋrac Jethu jäl them ë dhölkä yiic ëbën, ke nyiëŋ piny ku pel kaam koor.

Jethu aci luöide jök Galilia

(Mt 4:12-17; Mk 1:14-15)

¹⁴ Go Jethu ke tō Wëi Nhialic yeguöp, dhuk Galilia. Go guo piŋ Galilia ëbën, ¹⁵ rin piöcde te ye koc Itharel kenhīim mat thīn, ee ye leec raan ëbën.

Koc Nadharet aa kēc Jethu gam

(Mt 13:53-58; Mk 6:1-6)

¹⁶ Go Jethu jäl teden awën ku ler genden Nadharet tewäär muk ye thīn. Nawën aköl löŋ, ke la ten amat koc Itharel cīt te ye luöi ye akölaköl. Nawën jöt rot bī wet Nhialic kueen, ¹⁷ ke gem athör Ithaya, raan kāk Nhialic tiŋ. Go athöör pet yic ku yök te cī ye göt thīn kēlä,

¹⁸ “Wëi Nhialic atö ke yēn rin acä loc,
 ba Wet Puöth Yam lek koc ŋöŋ. Beny acä tooc
 ba lek koc cī loony ku koc mac, ku koc reer wīn jøŋrac yic,
 lön bī keek lony, ku lön bī koc cī cöör ben daai,
 ku ba lääu nom tēnē koc gum, ben lek keek.

¹⁹ Ku ba ruöön bī Nhialic
 koc bö tēnē yeen döc, ben lek keek.”

²⁰ Ku mat Jethu athör yic ku gem ku nyuuc. Go koc ke tō amat yic kenyīn wel ye ëbën. ²¹ Go Jethu lek ke, “Wet cāk piŋ ca kueen athör theer wël Nhialic yic acie nom tieŋ ya aköl.”

²² Go koc ke tō thīn gäi ëbën ku leckē rin wël puoth cī lueel. Ku yekē röt thiëc ëlä, “Kënë, lēu bī rot looi kēdē, yeen cie wën Jothep?”

²³ Go Jethu beer, “Ee yic, wek aaba lek kääŋ ye lueel ëlä, ‘Akīim koŋ rot cöl apuol,’ Ku abäk lek ya ba kāk cāk piŋ ke ca looi Kapernaum, looi aya genda ë ten. ²⁴ Ku le tuēŋ ku lueel, ‘Acīn koc kāk Nhialic tiŋ ye wël yekē lueel gam panden.’ ²⁵ Ku cimēn ŋic wek ye lön cī Elija, raan kāk Nhialic tiŋ, tiŋ lēer cöl Dharepath kony. ²⁶ Ku Dharepath ë ye tiŋ wundet cöl Thidon. Ku diäär lēr Itharel aake wīc kuöony wäär nek cök koc, rin kēc deŋ tueny run kadiäk ku abak bī cök dīt apei pan Itharel. Ku Elija akēc ben tuöc ke. ²⁷ Ku det aya, wäär ye Elica raan kāk Nhialic tiŋ, koc juēc cī tuet aake tō pan Itharel, ku acīn atuen tōŋ cī Elica ben kony, aci ben la kony Naman raan pan Thiria.”

²⁸ Go koc ke tō ten amat puöth riääk ëbën wën piŋ kek wēlkä, ²⁹ ku jötkē röt ku göömkē piny. Ku yethkē ayeer geeu ke yekē pik bik yett göt nom te cī geu buth thīn, ku yethkē agala nom rin wīc kek ye bik la piek wīr. ³⁰ Go bak keciel yiic ku jiël.

Jethu ala riel ë yen jøngrac cuop wei

(Mk 1:21-28)

³¹ Go Jethu la Kapernaum gen tö Galilia, te ye yen koc piöcc thin aköl cii koc Itharel ye luui. ³² Ku piöccde ëci koc göi ë ten aya, rin kæk ye lueel aa wël yith ye nyuöth lön le yen riel Nhialic. ³³ Nayon akäl tök tewën piöcc yen, ke raan tö kam koc ten amat, ke la guöp jøngrac jam ke cï yeröl jøt apei ëlä, ³⁴ “Yeñö wic tènë yo Jethu raan gen Nadharet? Ca ben ba yo ben rac? Yin añiec, yin ë raan puoth la cök bö tènë Nhialic.” ³⁵ Go Jethu jøngrac duöm thok piny, “Bietë, ku bäär bei yeguöp.” Go jøngrac mony awën wiet piny kenhüim ku bii bei yeguöp ke cïn tetök cï yiëk ye.

³⁶ Go koc gäi apei ku thiëckë röt, “Yeñö kënë? Ye piöcc yam kek riel Nhialic. Mony kënë ala riel ye yen jak yöök ku gamkë wetde aya.” ³⁷ Go lec ku piathde guo thiëi baai yic ëbën.

Jethu aci koc tuany kony

(Mt 8:14-17; Mk 1:29-34)

³⁸ Kaam awën jiël yen tènë amat koc Itharel ke la pan yi Thaimon. Go man tiñ Thaimon yök ke cï juäi göök, gokë lek Jethu. ³⁹ Go la ku keec yelööm tewën cï yen töc thin ku yöök juäi bi jäl. Go juäi guo päl piny ku looi miëth tènë ke.

⁴⁰ Ye thën kënë, wën cï aköl lööny piny, ke koc guëer kek kocken tuany tènë Jethu, ku teeu yecin kenhüim, gokë pial ëbën. ⁴¹ Ku bö jakrec bei koc juëc gup ke dhiau ëlä, “Yin ë Wën Nhialic.” Go Jethu ke yöök bik cii jam, rin njic kek ye lön ye yen Raan cï loc ku döc.

Jethu ë koc Galilia lek wet Nhialic

(Mk 1:35-39)

⁴² Nayon nhiäk riel, akëc piny bak ke Jethu jiël baai ku le tede ë rot. Go koc juëc la wic. Nawën lek yök, gokë löñ bi rëer Kapernaum ku cii ke nyiëñ piny. ⁴³ Go beer, “Yen adhil Wet Puoth Yam rin bääny Nhialic la piöcc beei kök yiic aya, yen ë kën tuuc ya ba ben looi.” ⁴⁴ Go pan Galilia kuany yic ke piöcc koc ten amat.

Koc cï Jethu kañ buoöth

(Mt 4:18-22; Mk 1:16-20)

5 ¹ Yon akäl tök tewën piöcc Jethu wär cöl Jenetharet you, ke koc juëc apei wët bik wet Nhialic ben piñ. ² Go riäth karou tiñ agör you ke cï amei nyään piny ku jiëlkë bik biaiken la thuak. ³ Go Jethu thuet riän tök yic, ku ë ye riän mony cöl Thaimon, ku lek ye bi piek wiir tethin-nyöot. Ku jøl nyuc riäi yic ku piöcc koc.

⁴ Nawën cï thök ë jam, ke lek Thaimon, “Geerkë riäthkun tethiän ku cuatkë biaikun bäk rec döm.”

⁵ Go Thaimon beer, “Beny, yok aaci ruu mäi wën aköu ku acin kë cuk döm. Ku na ca lueel, ka buk cuat.” ⁶ Ku cuatkë buoi. Gokë rec juëc apei döm abi buoi yiic duer ræet. ⁷ Gokë ameiken kök tö riän det yic cöl bik ke ben kony. Gokë ben, ku tekkë rec riäth karou yiic ku thiënkë kedhie abik duer diir.

⁸ Nawën tiñ Thaimon kë cï rot looi, ke gut yenhiol piny Jethu nhom ku lueel, “Beny, jäl tènë ya, yen ë raan la guöp adumuööm.” ⁹ Rin yen Thaimon, ku koc awën mei kek ye aake cï gäi rec juëc cik döm. ¹⁰ Ku kocken cath kek ye Jemith ku Joon, wæet Dhubedi, aake cï gäi aya. Go Jethu lek Thaimon, “Duk riöc, ëmën le tueñ aa koc kek aaba ya döm.” ¹¹ Gokë riäth yöc wär thok ayeer, ku nyiëñkë këriëc ëbën piny ku buoöthkë Jethu.

Jethu acä atuet cöl apuol

(Mt 8:1-4; Mk 1:40-45)

¹² Yon akäl tök Jethu ëci la kony gen det, ku raan cï tuet ë tö thin. Nawën tiñ Jethu ke gut yenhiol piny ku leñ, “Beny añiec alëu ba ya kony ba pial, kony ya.”

¹³ Go Jethu njään nyinde tiñ ku wic bi kony. Ku jøt yecin ku goot ku lueel, “Awiëc, piaalë!” Kaam thiin awën ke tuet jiël. ¹⁴ Ku cöl Jethu ajiël ku thon apei, “Duk kënë la lek raan det. Løor ku nyuöth rot raan kæk Nhialic, ku bi caath, ku juar kañ cüt te ye löñ Mothith ye lueel thin, bi raan ëbën njic lön cï yin pial.”

¹⁵ Ku tewën cï Jethu ye cak thon këya, ke wet go thiëi piny abi koc juëc aa guëer tènë Jethu bik piöccde ben piñ, ku kony ke bik pial. ¹⁶ Ku ye la tede ë rot te cïn yic koc ë rëer thin bi la röök.

Jethu aci raan ci ruai kony

(Mt 9:1-8; Mk 2:1-12)

¹⁷ Nayon akäl tök, ke koc kök akut Parathi, ku koc piöoc löön nyuc bik piñ te piöoc Jethu koc thin. Ku aake bö beei yiic Galilia ku Judia ku Jeruthalem. Ku Nhialic eci Jethu yiiek riel bi koc tuany kony. ¹⁸ Kaam wën ke koc bö ke ket raan aduany alom. Ku wic koc awën ket ye bik yäth yöt tënë Jethu. ¹⁹ Nawën cïn te yeth kek ye tënë Jethu rin ci yöt thiän koc, gokë la nhial ku nanykë yöt nom lon awën rëer Jethu thin. Ku luæckë raan aduany piny kek biönjde yenhom.

²⁰ Ku wën tiñ yen gamdit tö ke ke, ke lueel, “Mäthdie, adumuöömku aaci päl piny.”

²¹ Go koc piöoc löön koc Itharel ku koc akut Parathi wën reer thin, jal tak ku luelkë kepuöth, “Yeña kënë Nhialic jääm guöp këlä? Yeña adumuööm päl piny, ee Nhialic ë rot.”

²² Go Jethu käk yekë tak guo ñic ku lueel, “Yeñö ye wek ye tak lon lueel yen lueth? ²³ Ye kënen puol yic kakkä yiic ba lueel, ‘Adumuöömku aaci päl piny’ tedë ke lueel, ‘Jot rot ku cathë?’ ²⁴ Ku aba nyuöth we emën lon le Manh Raan riel pinynhom bä adumuööm päl piny.” Ku lek raan aduany, “Alek yi, jot rot ku kuany biönjdu ku loor baai.”

²⁵ Go rot jot nyin yic kenhüim ke deei kek ebën, ku kuany biönjden awën ci ye täac thin, ku ler baai ke lec Nhialic. ²⁶ Ku jal kuat raan tö thin ebën gai ku riöockë. Ku leckë Nhialic ku luelkë, “Yok aaci këdiit jan göi tiñ ya aköl.”

Jethu aci Lebï cööl

(Mt 9:9-13; Mk 2:13-17)

²⁷ Nawën ke Jethu jiël geuu, ku tewën cieth yen ke tiñ raanajuër kut cöl Lebï ke reer teden ë luöoi. Go Jethu lek ye, “Buöth ya.” ²⁸ Go Lebï luöide puol ku buöth.

²⁹ Nawën ke Lebï loi miëth paande bi yen Jethu gooñ. Go koc juëc ben, kocajuër kut ku koc kök, ku nyuuckë ke ke bik mith. ³⁰ Go koc akut Parathi ku koccken piöoc löön la nroomnroom ku luelkë tënë koc Jethu buöth, “Yeñö ye wek mith ku dekkë kek kocajuër kut, ku koc la gup adumuööm?”

³¹ Kaam wën piñ Jethu ë wet këne, ke lek ke, “Acie koc puol kek aküim wic, aa koc tuany. ³² Yen akëc ben ba koc ye tak lon puöth kek ben kony. Yen aci ben bi koc rec la gup adumuööm kepuöth dhuök ciëen.”

Wet löñ thek ë miëth

(Mt 9:14-17; Mk 2:18-22)

³³ Gokë ben lueel tënë ye, “Koc Joon buöth aa lac thek ë miëth ku röökkë. Ku aye koc akut Parathi buöth looi aya, ku kocckun yi buöth aa mith ku dekkë.”

³⁴ Go Jethu beer ku lueel, “Yakë wic bi koc ci ben ruäai yic rëer ke ciï mith? Acie tede! Na reer raan thiëc ke ke, ka cik loi këya. ³⁵ Aköl bi athiëc dom ku nyieei keyiic, yen aköl bi kek thek.”

³⁶ Ku ben Jethu kääñ det ben thööth aya tënë ke, “Acin raan bi abañ alath ret wei alanh yam köu bi la buöpp ë dhiäth alath köu. ³⁷ Ku acin raan bi muön abiëc ë yam puök töny theer yic. Na looi këya, ke muön abiëc yam abi töny puöt yic, ku muön abiëc abi luuñ wei ku töny abi kuem. ³⁸ Acie këya, muön abiëc yam adhil puök ë töny yam yic. ³⁹ Ku acin raan wic bi muön abiëc yam dek te ci yen muön abiëc ci ceñ kañ dek, abi lueel, ‘Muön abiëc ci cieñ aņueen.’ ”

Jethu aci kuc löñ aköl löñ koc Itharel

(Mt 12:1-8; Mk 2:23-28)

6 ¹ Nayon aköl ciï koc Itharel ye luui, Jethu kek koccken ye buöth aake cath ke kuany dhël yic kam dum. Go koccken ye buöth rap thoñ ku koikë ke kecin, ku camkë ke. ² Go koc akut Parathi kök lueel, “Yeñö ye wek luui aköl ci löñdan Itharel pëen bi koc ciï ye luui thin?”

³ Go Jethu beer, “Këckë kë ci Debit looi wätheer kañ kuen? Wäär nek cok ye kek kacke, ⁴ go la luuñ Nhialic ku lööm ayum yaath ci tööu tënë Nhialic ku ciem, ku gem kacke aya bik cam. Ku ayum këne eci löñda pëen bi kuat raan ë path ciï cam. Ee raan käk Nhialic yen ë ye cam ë rot.” ⁵ Ku wit Jethu wetde ëlä, “Manh Raan ë beny këriëc ebën agut aköl löñ.”

Jethu aci mony ci cin ruai kony

(Mt 12:9-14; Mk 3:1-6)

⁶Nayon aköl det, aköl cii kóc ye luui ke Jethu la ten amat kóc Itharel ku piöoc. Ku mony ci cin cuéc ruai ë tö thïn. ⁷Go kóc kök piöoc lööñ Mothith, ku kóc kök akut Parathi ke tö thïn wïc bik tiñ, lon bi Jethu mony kënë kony bik la luom, rin ci yen ye kony aköl cii kóc ye luui. ⁸Ku Jethu ë ñic kë tö kepuöth, go lek mony awën ci cin ruai, “Jot rot ku bäär tueñ ten kóc nhiim.” Go ben ku keec. ⁹Go Jethu ke thiëc, “Yeñö ye löñda päl yo buk looi aköl cii kóc ye luui? Ye këpath aye kërac, bi raan kony bi pïr, kua pel wei bi thou?” ¹⁰Ku dot ke ebën ku lek mony awën ci cin ruai, “Nyoth yicin.” Go yecin nyooth. Go cieende piath. ¹¹Tëenë, go kóc ater Jethu puöth riääk apei, ku matkë kë bik looi tënë ye.

Jethu acä atuuc kathiaär ku rou kuany

(Mt 10:1-4; Mk 3:13-19)

¹²Nayon akäl tök ë ninkä yiic, ke Jethu la gõt nom te cii ceñ bi la röök, ku jol ruu röök tënë Nhialic. ¹³Nawën bak piny ke col kacken ye buöth, ku kuany raan thiaär ku rou keyiic ku ciék ke ke col atuuc. ¹⁴⁻¹⁶Kóc ke ci kuany ayi, Thaimon (ci Jethu ben cak ke col Pïter), Andria (menh koor ë Thaimon), Jemith, Joon, Pilipo, Bartholomeo, Lebï, Thomath, Jemith wën Alpawuth, ku Thaimon (raan la puöu ater), Juda wën Jemith ku jol a Juda Ithkariöt, raan wäär ci Jethu ben luom bi döm.

Kóc juéc aa Jethu buöth

(Mt 4:23-25)

¹⁷⁻¹⁸Go Jethu ben piny ku keec tethöñ nom gõt cök kek kacken ye buöth, ku kóc juéc kök ke bö Judia ku Jeruthalem. Ku kóc bæei kök tö wärköu cimën Tire ku Thidon, aake ci ben bik ben piñ piöoc Jethu, ku bi ke ben kony tueny tö kegup. Ku kóc ke la gup jakrec aake ci ben aya go Jethu ke kony. ¹⁹Ee wïc kuat raan ebën bi goot, rin riel yen kóc kony bik pial ë ye yök yeguöp ë path tö ci ye goot.

Keñ miet ë puöu ku reec ë puöu

(Mt 5:1-12)

²⁰Go Jethu yenhom wel kacken ye buöth ku lueel,
 “Wek aa mit gup wek kóc ñöñ, rin ye bäany Nhialic këdun!
²¹Wek aa mit gup wek kóc nek cök emën, rin wek aabi kueth aköldä!
 Wek aa mit gup wek kóc dhiau emën, rin wek aabi dol.
²²Wek aa mit gup tö meen week, ku cop week wei ku lat week,
 ku yekë kuc week ciet yakë jakrec rin ye wek kackie yen Manh Raan!
²³“Wätheer wärken dit aake ci käk cit kakkä looi tënë kóc käk Nhialic tiñ. Këya, te looi kakkä röt tënë week, ke we mit puöth rin wek aabä ariöpdit yök tënë Nhialic.
²⁴Te reec yen thïn tënë week, wek kóc ci jak emën,
 rin ci wek pïr path yök thïn.
²⁵Te reec yen thïn tënë week, wek kóc ci kueth emën, rin wek aabi cök nöc.
 Ku te reec yen thïn tënë week, wek kóc dal emën,
 wek aabi töu tiop nom ku dhiaaukë!
²⁶Ku te reec yen thïn tënë we te bi kóc ebën jam käpath ë rienkun,
 rin wärken dit aake ye jam këlä,
 wätheer tënë kóc aa lueth röt col aye kóc käk Nhialic tiñ.

Nhiar kóc man yi

(Mt 5:38-48; 7:12)

²⁷“Ku wek alek kënë wek kóc piñ welkie, Nhiarkë kóc aterdun, ku yakë käpath looi tënë kóc man we.
²⁸Thiëc Nhialic bi kóc ye wïc diet yi yök kërac döc, ku röök rin kóc yi bui. ²⁹Te mañ raan yigëm, ke wel gëm det aya. Këya cimën ë kënë, na wïc raan alath tënë yi ke duk pën alanh det aya. ³⁰Na wïc raan këdän tënë yi ke gäm ye, ku duk raan ci këdu nyaai thiëc bi cool tënë yi. ³¹Loi këpath tënë kóc kök cimën nhieer yin këpath bi looi tënë yi aya.

³²“Na ye ke nhiaar koc nhar yi kepec, ke yi yök lec Nhialic? Ayi koc karec looi aa nhar koc nhar ke aya. ³³Ku na ye kapath looi tenë koc kapath looi tenë yi kepec, ke yi yök lec Nhialic? Ayi koc karec looi aa kapath looi tenë koc nhar ke. ³⁴Ku na ye këdu gam tenë raan ye nõöth ciet bi cuööt aköldä, ke Nhialic mit puöu tenë yi? Agut koc karec looi aa kakken gam koc rec kök cit ke, rin ye kek ye tak ciet kakken bi dhuök ke ebën aköldä. ³⁵Na ye këya, nhar koc aterdu, ku loi kapath tenë ke. Yakë kakkun gam ë path ku duökkë ye nõöth lon bi we cuööt. Wek abä acutdit apei yök. Ku wek aabi ya mith Nhialic Madhol, rin alir puöu tenë koc ebën, agut koc na cok këpath looi tenë ke, ke cii ke tij puöth, ku koc rac aya. ³⁶Lierkë puöth cimën ye Wuurdun puöu lier.

Duökkë koc ye luök wei

(Mt 7:1-5)

³⁷“Duökkë koc ye luök wei bi Nhialic we cii ye luök wei. Duökkë koc kök ye tem awuöc bi Nhialic we cii ye tem awuöc. Pälkë wet piny tenë koc kök bi Nhialic wet päl piny tenë we. ³⁸Na ye koc kök muöc ke Nhialic abi muöc aya. Abä athëmdit cii cienku lëu bik muk yiök yi, rin käk ye looi tenë koc kök, kek aabi Nhialic looi tenë yi.”

³⁹Ku lëk Jethu ke kääñ elä, “Lëu raan ci cöör bi cöör det thel? Cik lëu bik lööny adhuöm yic kedhie? ⁴⁰Acin manh piöoc dit tenë raanden piöoc. Ku manh piöoc na le piöocde thöl ka cit raanden piöoc. ⁴¹Yeñö ye yin kërec dit ye looi kuc, ku ye tij kërec ci wämuuth looi? ⁴²Acii lëu ba wämuuth weet bi kërec thiin ye looi puöl, te cii yin rot koj weet ba karec ye looi puöl. Awëëñkui! Kanjë karec yakë ke looi puöl, ku abäk lëu bak wämäthkun jal weet bik karec thii yekë ke looi puöl.”

⁴³Ku la Jethu tueñ ku lueel elä, “Tim ci cil tepath acie luök mith rec, ku tim ci cil terac acie luök mith path. ⁴⁴Këya, tim aye ñic ë miethke. Acii lëu ba mith tim det la kuany tim det cok. ⁴⁵Raan path ë luui kapath, rin kapuöth tö yepuöu. Ku raan rac ë luui karec, rin karec tö yepuöu. Wël ye ke lueel, aa käk tö yipuöu nyuöoth.

Kääñ rin koc karou ci beei keer

(Mt 7:24-27)

⁴⁶“Yeñö ye wek ya cööl, ‘Beny, Beny’ ku wek aa cie kë ca lueel ye looi? ⁴⁷Kuat raan ë ben ku piñ wetdie ku theek ya ku looi, ⁴⁸acit raan ci yönde ñiec buth tethöny. Nawën la aboor ben, ku cok piü yöt gööl piny, ku yöt cii yic cok päk rin ci ye ñiec buth. ⁴⁹Ku raan welkie piñ ku cii ya thek bi ke looi, acit raan yöt buth tö ye aboor tëek. Na la aboor ben ke wit yöt!”

Jethu aci raan lui pan beny apuruuk kony

(Mt 8:5-13)

7 ¹Tewën ci Jethu kënë wic bi lek koc thöl, ke la Kapernaum.

²Ee gen kënë raan lui pan beny apuruuk ë tuany, ka tiit piny. Ku beny ë nhar raanden luoi apei.

³Nawën piñ Jethu, ke toc kocdit Itharel bik Jethu la thiëc bi ben bä aluonyde ben kony. ⁴Gokë la tenë Jethu ku länjë ku luelkë elä, “Apath ba beny apuruuk kënë kony. ⁵Anhar kackua, ku ë yen buth tedan ye yok mat thin.”

⁶Go Jethu la ke ke. Ku kaam wën bi yen baai dööt, ke beny apuruuk toc mäthke bik la lek ye elä, “Beny, duk rot näk cäth rin yen acie raan path nadë ke yi bö atiemdie yic. ⁷Ku yen akëc la tenë yi rin ñic yen ye lon ye yen raan rac. Luel wet ë path ku aluonydie abi pial. ⁸Rin yen aya, yen areer bänydit cok, ku yen ala apuruuk reer yacök. Aya lek ñek, ‘Löör!’ Ka la, ku lek ñek, ‘Bäär ten,’ Ka bö, ku aya lek aluonydie, ‘Loi kënë!’ Ka looi.”

⁹Go Jethu gai wën piñ yen wëlkä, ku wël yenhom than awën buöth ye ku lueel, “Acin raan ca kaj yök kam koc Itharel la gam cit gam ë mony kënë.” ¹⁰Nawën dhuk koc awën ci tooc baai, ke yök alony beny ke ci pial.

Wën lëer gen Nain ci thou aci piir

¹¹Nawën ke Jethu la gen Nain, ku ë cath kek kacken ye buöth ku koc juëc kök. ¹²Nawën dötkë geu ke räm kek koc ket raan ci thou. Ku raan ci thou ë ye wän töñ. Ku koc juëc aake cath kek tij lëer kënë. ¹³Nawën tij Jethu tij kënë, ke ñeer yic ku lëk ye elä, “Duk dhiau.” ¹⁴Ku lëk koc bik kööc ku goot biöñ awën ci raan kuöm piny, ku lueel, “Riënythii, jöt rot.” ¹⁵Go riënythii awën ci thou rot jöt ku jieem ku cöl Jethu ajiël kek man.

¹⁶Go raan ebën riöc ku leckë Nhialic ku luelkë, “Raan käk Nhialic tij ril apei aci tuöl ë kamkua. Ku Nhialic aci ben bi kacke ben luök.”

¹⁷ Ku jol kē cī Jethu looi piñ raan ebēn pan Judia, ku wuōt kōk thiääk ke ye.

Joon aci kacke tuōc Jethu

(Mt 11:2-19)

¹⁸ Go kōc Joon buōth kākkih ye lueel rin Jethu lek Joon. Go kōc karou kamken tuōc tēnē Jethu bīk la thiēec elä, ¹⁹ “Ye yīn raan bī ben aye raan det yen buk tiit?”

²⁰ Nawēn yēētkē tēnē Jethu ke luelkē, “Joon raan kōc muōc nīim aci yo tooc buk yī ben thiēec, ee yīn raan bī ben aye raan det yen buk tiit?”

²¹ Ku kaam awēn thiēc kek, Jethu ē kony kōc juēc tuany apeī, ku kōc cī jakrec dōm. Ku kōc cī cōor. ²² Go wetden beer ku lueel, “Lak ku lēkkē Joon kāk cāk tiñ ku kāk cāk piñ, cōor aci ben daai emēn, ku aduany aci ya cath ku kōc cī tuet aci tuet jal kegup, ku miñ aci ya piñ, ku kōc cī thou aaci rōt jot. Ku Wet Puōth Yam alēk kōc nōñ nyīn. ²³ Ku raan mit guōp ē raan cie puōu ē rou wetdie yic.”

²⁴ Nawēn cī kōc Joon jāl, ke Jethu jam ku tēt kōc Joon, “Ye raan yīndē yen cī wek la ror cīi ceñ bāk la tiñ? Ye raan puōl yic ye wel nom ē path cimēn ye yom aruōōr wel nom? ²⁵ Ye raan yīndē yen cāk la tiñ? Ye raan ceñ alēth path apeī? Kōc ciēñ alēth dhēñ ku yekē mīth path cam akōlakōl aa kōc pan benydit. ²⁶ Lēkkē ya, yeñō cāk la tiñ? Ye raan kāk Nhialic tiñ. Ee yic. Ku alek we, yeen adit tēnē raan kāk Nhialic tiñ. ²⁷ Rin Joon yen aye athōr theer wēl Nhialic jam rienke elä,

‘Yen abī raan tōk kam kōc kākkih lueel,
cōl alēk kōc bī dhēl la guiir tēnē yīn.’ ”

²⁸ Ku ben Jethu lek ke elä, “Acīn raan kuat kōc cī dhiēeth pinyhom dit tēnē Joon. Ku yeen añot wer raan koor tō bāāny Nhialic yic.”

²⁹ Kuat kōc cī wetde piñ, agut kōc ajuēr kut aaci kēpuōth looi Nhialic ñic, ku cōlkē rōt aa muōc Joon nīim. ³⁰ Ku kōc akut Parathī ku kōc piōoc lōōñ Mothith, aaci jai kē wic Nhialic bī guiir tēnē ke, rin cī kek kuc bī Joon ke cī muōc nīim.

³¹ Ku ben Jethu thiēc, “Yeñō ba thōñ kek riēec akōlē? Thōñkē kek ñō? ³² Keek aa cit mīth cī kenhīim mat laar yic leñ kegup, ye lueel elä,

‘Yok aaci waak peth ye keek ket te looi ruāāi ket,
ku wek aa kēc dier!
Yok aaci kāk ye looi thuōu yic thōōñ,
ku wek aakēc dhiau!’

³³ “Rin Joon raan kōc muōc nīim ecie beei kuany yiic ke mīth ku dēk ē mōu, ku ayakē lueel, ‘Lōn le yen guōp jōñrac!’ ³⁴ Ku Manh Raan aci ben ku ye mīth kek kōc ku dēk ke ke, ku ayakē lueel, ‘Jethu akok, ku a dek māāu. Ku amāāth kek kōc ajuēr kut ku kōc la gup adumuōm!’ ³⁵ Ku luoi puōth Nhialic ē rot nyuōth kāk ye kōc ke buōth yiic looi.”

Tiñ rac cī jāl piath

³⁶ Nayōn akāl tōk ke raan tōk kōc akut Parathī cōl Jethu bīk la mīth. Go Jethu la pan raan akut Parathī ku nyuuc bī mīth. ³⁷ Nawēn piñ tiñ adējōok, ñic geu yic ebēn, lōn cī raan akut parathī Jethu caal paande, ke bō kek tōny koor cī cuēec tiōm ril apeī, la yic miōk ñir ye yōc wēū juēc apeī. ³⁸ Ku le yōt, ku nyuuc Jethu lōm, ku dhiēu ke cie nom guōt Jethu cōk. Go piū awēn dhiēu yen Jethu luak cōk. Goke weec nīimken nom. Ku ciim cōk ku tōc cōk miōk ñir awēn muk. ³⁹ Nawēn tiñ raan akut Parathī wēn cī Jethu gōñ ē kēnē, ke jam yetōk elä, “Na mony kēnē ye raan kāk Nhialic tiñ, ñuōt aci tiñ ye gōt ñic, ye tiñ yīndē, rin adējōok.”

⁴⁰ Go Jethu wet Thaimon guō ñic ku lueel tēnē ye, “Thaimon! Ala kē wiēc ba lek yī. Pāl yīyic piny.” Go beer, “Ye kēnē ñō, Raan ē piōoc?”

⁴¹ Go Jethu lek anyikōl kēnē, “Monytui ē kōny kōc karou. Raan tōk kek wēū ye dōm raan ruōōn tōk, ku raan det kek wēū ē pen tōk. ⁴² Ku akēckē lēu kedhie bīk wēū cool. Go wēū puōl, ku cīi ke ben kōōny. Na ye yī, yeñā kamken bī mony kēnē nhiaar apeī?” ⁴³ Go Thaimon beer, “Aya tak ē raan cī wēū juēc pāl piny tēnē ye.” Go Jethu beer, “Kēdu ē yic!”

⁴⁴ Ku wēl yēnom tik ku lēk Thaimon, “Ca kē looi ē tiñ tēnē ya tiñ? Yen aci ben paandu ku yīn akēc ya yiēc piū ba cōk lōk. Ku yen tiñē acā lōk cōk piūken nyin, ku wuuny ke nīimken nom. ⁴⁵ Yīn akēc ya ciim wēn bī yēn cit te ye miāth kōc ē cieñda yic. Ku yeen ē ya ciim cōk emēn ku emēn, tēwēn rēer yēn ē ten.

⁴⁶ Yīn akēc ya cak lor apath ba tōc nom, ku yeen acā tōc cōk miōk ñir. ⁴⁷ Ku alek yī lōn nhierdit cī nyuōth

thiin aye nyooth aya lon cī adumuöömken juëc päl piny. Rin raan cī käklik päl piny tēnē ye, ee nhier koor nyuöoth.”

⁴⁸ Ku lēk tik, “Adumuöömku aaci päl piny.” ⁴⁹ Go kōc awēn mīth kek ye aa jieem wei ku yekē lueel ēlä, “Yeņa kēnē jam lon ē yen adumuööm päl piny?”

⁵⁰ Ku ben Jethu lek tik, “Gamdu aci kony. Lōor ke döör Nhialic.”

Diäär ke ye cath kek Jethu

8 ¹ Nawēn ke jīēl, ku kueny geeth yiic ku bæi ke piöoc Wet Puoth Yam rin bäany Nhialic. Ku atuöocke kathiäär ku rou aake cath kek ye. ² Diäär juëc aake cath kek ye aya. Diäär kōk kamken aake cī Jethu kony jakrec ku tuaany, Maria Magdalena cī jakrec kadhorou jäl yeguöp. ³ Ku Joanan tiņ mony cōl Kudha raan kāk pan beny Antipāth Yērot tiit, ku Thuthana ku diäär juëc kōk ē Jethu kek kōcken ye buöoth kony wēeuken.

Kääņ dom path ku dom rac

(Mt 13:1-9; Mk 4:1-8)

⁴ Go kōc juëc aa guëer tēnē Jethu geeth yiic, go ke lēk kääņ kēnē, ⁵ “Raan puör ēcī la dom bī la pur. Ke wēn ye yen rap wēer dom yic ke kōth abek lööny dhöl yic te ye kōc tēek thīn, ku tet diet ke aya. ⁶ Ku lööny kōth kōk alēl nhom te koor tiōp thīn. Nawēn ciilkē, ke ke go guo riau rin kēc meiken yet piny apath. ⁷ Ku lööny kōth abek te ye tiim la kuöoth cil thīn, na la tiim juäk ke ke dec rap ku cik lok apath. ⁸ Ku lööny kōth kōk tiom path yic, ku ciilkē ku lokkē apath ke dīt nhīim apei.”

Ku wit Jethu lōņde ēlä, “Pieņkē te le wek yīth.”

Wet thööth ē kääņ

(Mt 13:10-17; Mk 4:10-12)

⁹ Go kōcken ye buöoth thiëc, “Kääņ kēnē wetde yic yeņō?” ¹⁰ Go Jethu bæer, “Wek anyuth Nhialic bäanyden cāk ņic theer. Ku kōc kōk aabi kāņ ņic ē keņ ya lek ke yiic, rin na cōk alon ye kek daai, ka cīi kāņ bī tiņ. Ku na cōk alon ye kek wet piņ, ka cik bī deet yiic.”

Jethu aci kääņ raan puör teet yic

(Mt 13:18-23; Mk 4:13-20)

¹¹ Ku lēk Jethu ke, “Kääņ kēnē wetde yic akīn. Kōth cī com aa cīt wetdien ya piöoc tēnē we. ¹² Kōc kōk aa cīt kōth cī lööny dhēl yic, ye diet ke tet. Te piņ kek lōņ Nhialic, ke jōņrac bö ku nyieei lōņ awēn kepuöth bik wet Nhialic cīi piņ, ku bī ke kony bik pīr. ¹³ Kōc kōk aa cīt kōth cī com alēl nhom, aa lōņ Nhialic gam nyin yic ke mit puöth. Ku aacie kepuöth ē deet, aa lōņ Nhialic guo wai wei te nek ke rin wet Nhialic. ¹⁴ Kōc kōk aya aa cīt kōth cī lööny te ye tiim la kuöoth cil thīn, keek aa lōņ Nhialic piņ. Ku kājuëc ke diir rin pīr pinynhom ē ten, nhier jieek ku kăpuöth yekē wic kepuöth aa ben thīn, ku reckē lōņ Nhialic kepuöth. ¹⁵ Ku kōc kōk aa cīt kōth cī puur tiom path yic. Keek aa lōņ Nhialic piņ ku gamkē apei, ku kājuëc path aaye yök tēnē ke rin ye kek kepuöth deet.”

Kääņ ē mermer

(Mk 4:21-25)

¹⁶ Ku ben lek ke, “Acīn raan cī mermer kaņ yāth yöt ku kum nyin, tedē ke tēu agen tōc cōk. Aye töou yöt ciel yic rin bī yöt amer yic tēnē kōc bö yöt. ¹⁷ Kēriëc ebēn cī thiaan abī bæi bei kōc nhīim, ku kēriëc ebēn cī kum nhom, abī yeth ayeer ruel yic. ¹⁸ Pieņkē ku detkē apath te ye wek wēl piņ, rin raan la kēdāņ abī ben muöoc, ku na ye raan cīn kēdāņ, ke kēthiin ye tak lon tō yen tēnē ye, abī nyaai aya.”

Man Jethu ku wämāthakēn aaci Jethu nyaai

(Mt 12:46-50; Mk 3:31-35)

¹⁹ Go man Jethu kek wämāthakēn ben tēnē ye, ku cīn te le kek tēnē ye rin juëc kōc yööt apei. ²⁰ Go raan tōk lek Jethu, “Moor ku wämāthakui aa kääc ayeer, ku aa wic yī.” ²¹ Go Jethu lueel tēnē ke, “Ma ku wämāthkie aa kōc wet Nhialic piņ ku loikē.”

Jethu aci yom col akääc

(Mt 8:23-27; Mk 4:35-41)

²² Nayon akäl tök, ke Jethu la riäi yic kek kocken ye buoöth ku læk ke, “Lok teemku wär alonjtui.” Gokë riäi geer wüir. ²³ Tewën gër kek, ke Jethu go nin. Kaam awën niin yen ke yomdit apej jöt rot, ku loi atiaktiak rot abï riäi duer thiäñ piu, ku duerkë diir. ²⁴ Gokë puöc ku luelkë, “Bänyda, Bänyda! Yok aa muou.” Go Jethu rot jöt ku rël yom ku atiaktiak. Gokë köc ku la wär dil. ²⁵ Ku thiëc ke, “Te gamdun tenen?” Gokë nhïim la cöt ku riöckë rieldit cit kënë, ku jieemkë kamken, “Ye raan yindë kënë, na cök a yom ku atiaktiak ë ke piñ wetde?”

Jethu aci raan la guöp jakrec kony

(Mt 8:28-34; Mk 5:1-20)

²⁶ Gokë wär Galilia teem ku lek tö col Jeratha tö wär Galilia alonjtui.^a ²⁷ Tewën keec Jethu piny riäi yic, ke mony ë gen kënë la guöp jakrec bö tënë ye. Mony kënë ëcie ceñ alëth ku ëcie rëer baai, ee ye rëer reñ nhïim.

²⁸ Nawën tiñ Jethu ke lor nom ke loi wuou, ku cuet rot piny yenhom ku looi kieeu apej, “Jethu, wën Nhialic Madhol yeñö wic ba looi tënë ya? Yin aläñ duk ya tëm awuöc.” ²⁹ Ee jam kälä rin ci Jethu jonrac yöck bi jal yeguöp. Ee ye jon kënë dom arak juëc, na cök der piny bi rek cin ku cök ku tit, ke not ke tueny ku dhoñ luöñ köth yecök. Ku yeth jök roor te ci ceñ.

³⁰ Go Jethu jäl thiëc, “Col yi ña?” Go beer, “Yok aa kut.” Ee luel këya rin ci jak juëc la yeguöp. ³¹ Go jakrec jam ku lenkë Jethu bi ke ci cop tethuth dit yic, ye koc rec yäth thin.^b

³² Ku duut dir baai ë nyuath got cök ë ten awën. Go jakrec Jethu lon bi ke col aa la dir gup. Goke puöl.

³³ Go jakrec ben bei yeguöp ku lek dir baai gup, ku riñkë agör yic, ku thootkë wüir ku moukë ëben.

³⁴ Nawën tiñ röör ke biöök dir kë ci rot looi, ke kat bik wet la lek koc rëer geeu ku koc tö beei yiic. ³⁵ Go koc ëben jal wet bik kë ci rot looi la tiñ. Nawën lek yet tënë Jethu, ke yöc mony wäär la guöp jakrec ke ci nyuc Jethu cök, ke ceñ alëth, ke la nom cök. Gokë riöc. ³⁶ Ku koc ke ci kënë tiñ, aaci te ci mony la guöp jakrec kuony thin la lek koc kök. ³⁷ Go koc Jeratha ëben riöc, ku lëkkë Jethu bi jäl panden. Go Jethu la riäi yic ku dhuk.

³⁸ Go mony wën ci Jethu jakrec col ajiel yeguöp, Jethu thiëc bi cath kek ye. Go Jethu jai ku læk ye, ³⁹ “Lor baai tënë kacku ku lek ke käjuëc ci Nhialic looi tënë yi.” Go mony kënë jäl ke kuany geu yic, ke ye koc lek käk ci Jethu looi tënë ye.

Jethu aci tik kony ku col nya aben pir

(Mt 9:18-26; Mk 5:21-43)

⁴⁰ Wën ci Jethu tem ku dhuk wär alonjtui, ke lor koc juëc apej, koc ke tit ye. ⁴¹ Tewën ke mony col Jariöth, beny tënë amat koc Itharel bö aya. Nawën tiñ Jethu, ke cuet rot piny yecök ku len bi la paande, ⁴² rin nyanden tön ye ruönke thiäär ku rou ëci dhal apej. Go Jethu gam ku lööny dhöl. Ku buoöth koc juëc ke cik kum apej.

⁴³ Ku tiñ tuany këc thekde kou kañ teem ruöñ thiäär ku rou ë tö koc yiic. Ku yeen ëci wëu juëc gam akim, ku acin akim tön ci tuaanyde col anuen. ⁴⁴ Go ben Jethu kou ku goot alanhde thok. Go riem köc nyin yic. ⁴⁵ Go Jethu thiëc, “Yeña cä goot?” Nawën cin raan gem ye rot, go Piter luel, “Beny aa koc juëc ci kum kek aa yi pik.”

⁴⁶ Go Jethu ben luel, “Ala raan cä goot rin aca ñic lon le yen raan ca kony?” ⁴⁷ Nawën tiñ tiñ awën lon ci ye ñic, go ben tënë Jethu ke ci riöc, ke leth ku cuet rot piny yecök. Ku læk Jethu, koc nhïim ëben yen kënë goot yen ye, ku te ci tuaanyde guo ñueen thin ë kaam thin awën. ⁴⁸ Go Jethu luel tënë ye, “Nyaandie gamdu aci kony. Lor, ke döör Nhialic.”

⁴⁹ Kaam wën jieem Jethu, ke raan riñ pan Jariöth ku læk ye, “Nyaandu aci yet wei, duk raan piöc ben rääm nom.” ⁵⁰ Ku Jethu ëci wet ë mony piñ, go lek Jariöth, “Duk riöc, deet yipuou ku gam wet yic. Nyaandu abi pial.” ⁵¹ Wën yeet yen baai, ee cin koc ci puöl bik la yöt kek ye, ee Piter ku Joon ku Jemith, ku jöl aa wun ku man meth kepec. ⁵² Tewën le Jethu yöt, ke yöc koc ke näk röt, ke dhiau. Go lek ke, “Duökkë dhiau. Meth akëc thou, anin.”

⁵³ Gokë dol guöp rin ñic kek ye lon ci yen thou. ⁵⁴ Go meth dom cin ku læk ye, “Manhdie jöt rot.”

⁵⁵ Go weike dhuk ku jöt rot nyin yic. Ku læk Jethu ke bik yiek mieth. ⁵⁶ Go koc ke dhiëth meth gai apej, ku thon Jethu ke bik kë ci rot looi ci læk koc kök.

^a8:26Jeratha acol Gadara aya, tiñ Mt 8:28

^b8:31Eye tak lon jakrec aaye mac piiny tethuth bi ke jal tem awuöc.

Jethu acä atuöocke kathiäär ku rou tooc

(Mt 10:5-15; Mk 6:7-13)

9¹ Ku cöl Jethu kóc ye buoöth kathiäär ku rou, ku yik ke riel bi kek jakrec aa la cuop wei, ku riel bi kek kóc cöl aaye pial aya, ² ku tooc ke bik aa la piöoc wet bäany Nhialic ku konykë kóc tuany. ³ Ku lëk ke, “Duökkë muk käk la keny, cimën wai ku jokgəə ku miith yakë cam dhöl yic, ku wëu ku duökkë muk aleth kök. ⁴ Yakë rëer pan ye we lor thïn yet te bi wek jäl. ⁵ Ku na ye pan cii we lor thïn, ke we jiël ku tanjë wecök, bi nyooth lön ci wek kuc e ke.”

⁶ Go atuuc jäl, ku kuenykë beei yiic ke piöoc Wet Puöth Yam ku konykë kóc bik pial kuat pan ci kek la thïn.

Antipäth Yërot aci dieer

(Mt 14:1-12; Mk 6:14-29)

⁷ Antipäth Yërot, benydit pan Galilia, ee ci käjuéc loi röt piñ ëbën. Go dieer rin ë ye kóc kök lueel lön Joon raan wäär kóc muöc nhïim aci ben pïr. ⁸ Ku lueel kóc kök ë Elija yen aci ben tuöl, ku kóc kök ë yekë lueel, lön ë yen raan tök kam kóc käk Nhialic tiñ yen aci ben pïr. ⁹ Go Antipäth Yërot lueel, “Yen aci Joon cöl atëem nhom bei! Yeña kënë ye yen welke piñ ë bak?” Ku ë wic bi röm kek ye.

Jethu aci miëth koor juak bi kóc juéc cam

(Mt 14:13-21; Mk 6:30-44; Jn 6:1-14)

¹⁰ Go atuuc Jethu dhuk ku lëkkë käk cik looi ëbën. Ku jiëlkä ë röt ku lek gen cöl Bethaida. ¹¹ Nawën piñ kóc juéc te ci yen la thïn, ke buöthkë. Go Jethu ke lor ku jieem tënë ke rin wet bäany Nhialic, ku kony kóc ci ye thiëc, bik pial.

¹² Nawën la piny cuöl, ka atuöocke kathiäär ku rou bö tënë ye ku luelkä, “Cöl kóc aa jiël bik la beei yiic bik la wic te niin kek thïn, ku lek yoc miëth camkä, rin te rëer yok thïn ë ror cii ceñ cïn kë kuany thïn.”

¹³ Go Jethu beer, “Miackë ke miëth.” Gokë lek ye, “Käk mukku aa yuöp kadhiéc ku rec karou. Wic buk miëth yoc tënë ë kóc juëckä?” ¹⁴ Kóc ke tö thïn aake röör tiim kadhiéc. Go lek kocken ye buöth, “Calkë kóc aa nyuc, thiär dhiéc akuöt tök yic.” ¹⁵ Go kóc ye buöth kóc cöl anyuc piiny këya. ¹⁶ Go ayuöp awën kadhiéc ku rec karou lööm ku dot nhial ku leec Nhialic. Ku beny ayuöp yiic, ku gem ke kocken ye buöth bik ke tek agut rec tënë kóc. ¹⁷ Ku miithkä abi miëth ke göök, ku jöl kocken ye buöth awuthueei ayuöp ku rec ci döñ kuany gäacdït kathiäär ku rou.

Pïter aci Jethu ñic

(Mt 16:13-19; Mk 8:27-29)

¹⁸ Nayon akäl tök, tewën röök Jethu ë rot, ke kóc ye buöth bö tënë ye. Go Jethu ke thiëc, “Lëkkë ya, ye jän tak, ye yen ë ña?”

¹⁹ Gokë lueel, “Ayekë lueel lön ye yin Joon raan kóc muöc nhïim. Ku lueel kuat det lön ye yin Elija. Ku kóc kök ayekë lueel, lön ye yin raan kam kóc käk Nhialic tiñ theer ci ben pïr.”

²⁰ Goke thiëc, “Na week yakë lueel lön ye yen ña?” Go Pïter beer, “Yiin nhom guöp, yin ë raan ci Nhialic loc ku döc.” ²¹ Kë ca lueel ë yic Pïter. Ku thon ke apeï ëlä, “Duökkë lëk raan det.”

Jethu ee jam Arëemde ku Thuonde

(Mt 16:20-28; Mk 8:30-9:1)

²² Nawën ke lëk Jethu ke ëlä, “Manh Raan abi dhiel reem, ku abi kocdit baai ku bäny käk Nhialic, ku jöl aa kóc piöoc löñ kóc Itharel jai, ku abik nök, ku yeen abi nin kadiäk nök piiny ran yic ku ben jot bi pïr.” ²³ Ku lueel tënë ke ëbën, “Na ye raan wic bä buöth, ka dhil nhom määär kapuöth bi yok pierde yic pinynhom ë ten. Ku dhil puöu riel ku buöth ya akölaköl, cok alon wic kóc kök ye bik nök ë rienkie. ²⁴ Rin raan wic ye bi weike kony abi muör. Ku na ye raan mär weike ë rienkie, ka bi weike muk akölrüëc ëbën. ²⁵ Yeñö bi raan kuany thïn bi jak apeï pinynhom ku mer weike? ²⁶ Na ye raan guöp yär ë ya ku piööcdie, ke Manh Raan abi guöp yär ye aya, aköl dhuk yen dieekde yic ku diik Wun yic, ku diik atuuc Nhialic. ²⁷ Ku le tueñ ku lueel, wek alek yic ala kóc kök reer ë ten, aacii bi thou agut te bi kek ya tiñ, kek riel ye nyuöth lön ye yen beny ci Nhialic loc.”

Jethu aci guäpde rot waan

(Mt 17:1-8; Mk 9:2-8)

²⁸ Nawën nïn kabët cök ci yen kakkä lueel, ke Jethu cöl Pïter ku Jemith ku jöl a Joon, ku lek got nom bik la rööc. ²⁹ Tewën rööc yen ke wañ yenyin, ku yer aläthke apei bik la diardiar. ³⁰ Kaam thiin awën ke rööc tul ku jiemkë kek ye. Ku keek aake ye yi Mothith ku Elija. ³¹ Keek aaci ben ke la gup dhëñ Nhialic ku jiemkë tënë Jethu te bi yen la thou thiin Jeruthalem, rin bi yen kë wic Nhialic jäl thöl. ³² Ku Pïter kek koc awën cath ke ye, aake ye nïn muör puöth. Nawën liepkë kenyin ke tiñ lec Jethu, ku rööc karou ke kääc yelööm. ³³ Nawën jiël ë röörkä, ke lueel Pïter tënë Jethu, “Beny, apath buk rëer ë ten. Yok aabi duel kadiäk looi tök tënë yi, ku tök kek Mothith ku tön det kek Elija.”

(Kënë jiem yen këya, ee kuc kënë bi lueel.)

³⁴ Kaam wën not jiem yen, go kecit rur piny paat abi cien te yekë tiñ. Gokë riöc wën kum rur ke piny. ³⁵ Ku piñkë Nhialic ke jam luääc yic ëlä, “Kënë ë Wëndie, yen aca loc, piñkë wetde.” ³⁶ Nawën cik röl ben piñ, ke ye Jethu yen tiñkë ë rot. Go koc Jethu buöth kakkä muk kepuöth ku cik ke lek raan det.

Jethu aci dhöñ la guöp jöñrac kony

(Mt 17:14-18; Mk 9:14-27)

³⁷ Nawën dhukkë piny got nom aköl deetë, ke lor koc juéc apei. ³⁸ Kaam awën ke raan tök thän awën yic, cöt ke cie röl jot ku lueel, “Raan piöc, yin alän bä manhdie tiñ, yen ë mänh tön tö yanhom. ³⁹ Te dom ë jöñ ye, ka dhiau nyin yic, ku wit piny ku leth ku yik thok ayök. Jöñ kënë aci ye lac päl piny, ku aye cöl anak rot apei. ⁴⁰ Yen aci koc kun yi buöth löñ bik cuöp wei yeguöp, ku akëckë lëu.”

⁴¹ Go Jethu lek ke, “Wek koc cie lac gam, ba rëer ke we, ke ya ci guöp la cut welkun?” Ku lek wun meth, “Bëei manhdu ten.”

⁴² Kaam wën le dhök tënë Jethu, ke wit jök piny ku leth. Go Jethu jök yöc bi jäl yeguöp, ku kony dhök bi pial. Ku lek wun bi jäl kek ye. ⁴³ Ku jöl raan ëbën gai riel Nhialic.

Jethu aci ben jam ë Thuonde

(Mt 17:22-23; Mk 9:30-32)

Tewën not rëer koc ke ci gai käjuéc ci looi, ke lueel tënë atuöccke, ⁴⁴ “Piñkë wëlkä apath ku calkë ke aa lööny wepuöth, rin Manh Raan abi thön koc bi ye nöc.”

⁴⁵ Ku koc ken ye buöth aake kec wet kënë deet yic, wet ëci moony tënë ke rin bik ci det yic. Ku keek aake ci riöc bik thiëc kë ci lueel.

Koc Jethu buöth aaci wet teer

(Mt 18:1-3; Mk 9:33-37)

⁴⁶ Nawën ke koc ye buöth teer wet lon yeña kamken yen dit apei. ⁴⁷ Ku Jethu ë njic kë tö kepuöth. Ku dom meth ku cöl akääc yelööm. ⁴⁸ Ku lek ke, “Raan manh koor cit manh kënë lor ë rienkie, acä lor. Ku raan ya lor, acie yen ye lor, ee Wä Aciëñ ë toc ya. Rin raan koor kamkun ëbën, yen ë raandit.”

Raan ci yo man ë raanda

(Mk 9:38-40)

⁴⁹ Nawën ka atuny cöl Joon bö tënë Jethu ku lek ye, “Beny, yok aaci mony det tiñ keye jakrec cuöp wei koc gup ë rienku, ku acuk pëen rin acie raanda.” ⁵⁰ Go Jethu lek ke kek atuuc köc aya, “Duökkë ye pëen, rin raan ci we man ë raandun.”

Jethu akëc koc Thamaria lor

⁵¹ Nawën ci nïn bi Jethu yäth nhial thiök, go tak bi dhiel la Jeruthalem. ⁵² Ku tooc koc yenhom tueñ bik te bi kek la nyuc thiin la guiir pan tö wun Thamaria. ⁵³ Go koc pan awën kuc rin njic kek ye lon Jethu ala Jeruthalem.^c ⁵⁴ Nawën le koc Jethu buöth, Jemith ku Joon, njic lon ci koc baai kuc bik Jethu lor ke luelkë, “Beny, cuk mac cöl abö piny nhial bi pan kënë rac?” ⁵⁵ Go Jethu ke duöm thook piny, ⁵⁶ ku berkë pan det tö tueñ.

^c9:53Koc Itharel la luan Nhialic Jeruthalem, aake ci koc Thamaria ye lor rin meen kek röt.

Raan buoth Jethu adhil puöu riel

(Mt 8:19-22)

⁵⁷ Tewën kueny kek dhël yic, ke räm kek mony det cï ye ben lek Jethu ëlä, “Yin aba biaath kuart te ler yin thïn.” ⁵⁸ Go Jethu beer, “Luony aa la yöötken yekë ke wuut, ku diet pär aa la yöötken aya. Ku yen Manh Raan yen acïn baai pinyhom ten.”

⁵⁹ Ku lueel Jethu tënë mony det, “Buoth ya.” Go beer, “Beny, cöl yen akonj wä la thiök.” ⁶⁰ Go Jethu beer, “Cöl koc cït koc cï thou aa thiäk kacken, ku yïin bäär ba Wet Puoth Yam ben la piöc.”

⁶¹ Ku lueel mony det, “Yin aba buoath Beny, ku cöl yen akonj kackie la töönj.” ⁶² Go Jethu lek ye, “Yin acit raan dhie pur, na tijn raan det cath, ke cuet pur piny ku keenj nom ku ruoc. Këya, raan ye käk kök nyaai luoi ca guiër ye yic, acïn këpuoth lëu bi looi rin bäany Nhialic.”

Luoi koc thiärdhorou ku rou

10 ¹ Nawën ë kënë cök, ke Jethu kuany koc kök kathiärdhorou ku rou kam koc ye buoath, ku tooc ke tuenj bi koc karou aa cath, bik la geeth ku beei ke bi yen la thïn yiic. ² Ku lek ke, “Käk tem ajuéc ku koc luoi aa lik. Röökkë Beny la nom käk tem bi koc luoi cöl aa juak röt. ³ Lak! Ku njieckë, wek atuoc cimën amel ë kam gal. ⁴ Duökkë wëu ku jökgoc ku war kök muk. Ku duökkë ye köc dhöl yiic bäk koc aa muöth. ⁵ Te yeet wek baai ke kanjë lueel, ‘Koc baai yakë döör.’ ⁶ Ku na ye koc reer ë pan koc nhar döör, ke röökkun aabi ke doc. Ku na yekë koc man döör, ke röökkun aaci ke bi kony. ⁷ Ku yakë reer ë pan ku miethkë ku dekkë käk yekë yiék we, rin apath bi raan lui ariöpdë yök. Duökkë ye jäl pan ku lak pan. ⁸ Na lor koc gen cï wek la thïn we, ke we cam kuart mieth cik gäm we. ⁹ Ku kuonykë koc tuany ku lekkë ke, ‘Bäany Nhialic aci thiök ke we.’ ¹⁰ Ku na lak gen cïi we ye lor thïn, ke we jiel ku luelkë, ¹¹ ‘Yok aabi tör gendun tenj wei yocök bi dönj kek we.’ Ku dhiekkë deet apath, bäany Nhialic aci thiök. ¹² Awuoc bi Nhialic tem koc Thidon aköl lundit abi kuur tënë awuoc bi tem koc ë gen.

Geeth këc luoi kärec puol thin

(Mt 11:20-24)

¹³ “Wek koc gen Koradhin ku Bethaida, wek aa tiit kärec apei, rin käjuéc jänj göi cäk tijn cï ke looi geethkun yiic, ku ke cï looi Tire ku Thidon, geeth wäär cej koc rac, nuöt koc ë geethkä aaci kepuoth dhuök ciëen theer, ku pälkë luoi kärec. ¹⁴ Ku Nhialic abi we tem awuocdit Aköl lundit, awuoc bi dit apei tënë awuoc bi tem koc Tire ku Thidon. ¹⁵ Ku wek koc Kapernaum yakë tak lon bi we jat nhial? Wek aabi cuat pan mac.”

¹⁶ Ku lueel Jethu tënë koc wën cï tooc, “Raan pinj wetdun ë wetdie pinj, ku raan we dhöl gup acä dhöl guöp, ku raan dhäl yaguöp ë raan toc ya dhöl guöp.”

Koc wën cï tooc aaci dhuk

¹⁷ Go koc thiärdhorou ku rou wën dhuk ke cï puöth miet ku luelkë, “Beny agut jakrec aya aaci wetda pinj ë rienku.” ¹⁸ Go Jethu lek ke, “Riel jonrac aci riääk ku tienj ke lööny piny cimën many nhial. ¹⁹ Wek aca yiék riel bi wek aa cath käpieny ku kith nhim ë path. Ku wek aca yiék riel wer wek aleikun ku koc man we. Ku acïn kë konj we nök. ²⁰ Ku duökkë puöth jöl miet rin cï jakrec wetdun pinj, mietkë puöth rin cï rienkun göt pan Nhialic.”

Jethu amit puöu

(Mt 11:25-27; 13:16-17)

²¹ Nawën ke Wëi Nhialic cöl Jethu amit puöu ku lueel, “Wä, Beny nhial ku piny! Yin aleec rin cï yin käk cï thiaan tënë koc njic kanj cï pioc, nyuöth koc kor këc pioc. Ee tede, Wä, yen ë kën yi yum puöu. ²² Këriëc ebën aaci Wä gäm ya. Acïn raan njic Wënde ë Wun ë rot, ku acïn raan njic Wun ë Wënde ku koc cï Wënde loc bi nyuöth ke.”

²³ Tewën reer Jethu kek kacken ye buoath ë röt, ke wël yenhom ke ku lueel, “Wek aala gup duaar bäk käk tienjë tijn. ²⁴ Ku alek we, ëci koc juéc käk Nhialic tijn ku banydit wic bik käk yakë tijnkä tijn, ku aa këckë ke tijn. Ku ë cik wic aya bik käk yakë pinj, pinj, ku aa këckë ke pinj.”

Kääñ raan path pan Thamaria

²⁵ Raan piöoc ë löñ kóc Itharel, ëci ben ku wïc bi Jethu deep ë wet ku thiëc, “Raan piöoc, yeñö ba looi ba pïr akölrïëc ëbën pan Nhialic?” ²⁶ Go Jethu beer, “Ye Löñ Mothith lueel kädë ë wet kënë? Yeñö ye deet yic thïn?”

²⁷ Go beer, “Yin adhil Nhialic Bänydu nhiaar yïpuöu ëbën, ku weiku ëbën, ku yïnhom ëbën, ku nhiaar raan det cimën nhieer yin rot.”

²⁸ Go Jethu lueel, “Aca ñiec beer. Loi kääkä, ku pïr pan Nhialic akölrïëc ëbën aba yök.”

²⁹ Go monytui wïc bi wet deet apath rin wïc yen ye bi rot kony, ku ben Jethu thiëc, “Raandien ba nhiaar yeña?”

³⁰ Go Jethu beer ku lueel, “Monytui, ke ye raan Itharel, ëci jäl Jeruthalem bi la Jeriko. Go röm ke cuer dhël yic ku rumkë aläthke ku wëuke ëbën, ku näkkë ku jölkë nyääñ piny ke duër thou. ³¹ Nawën ke raan käk Nhialic, ke ye raan Itharel, bö ke kuany dhël kënë yic, go monytui tiñ ku ween thok piiny. ³² Nawën ke raan dhiënh Lebï ben ben, go mony kënë tiñ ku ber. ³³ Go raan pan Thamaria ben ke kuany ë dhël kënë yic. Nawën tiñ mony kënë piiny ke ñeer yic. ³⁴ Go rot cuöt ye, ku muoc yöntöök yiic miök ku muön abiëc ku der keyiic, ku jät akaja köu ku yeth pan jööl, ku rëer yelööm ë weer wën. ³⁵ Naçon nhiäk, ke gem wëu tënë raan lui pan jööl ku lëk ye, ‘Lök mony kën töök apath, na la dhuk ku le wëu ca lök muör ë rienke te lik wëukie, ka ba ben cool.’ ”

³⁶ Ku wit Jethu wetde ku lueel ëlä, “Na ye yi, ke raan ci cuer bañ, yeña kam kóc awën kadiäk ë raande?”

³⁷ Go lueel, “Raan ci ye kony yen ë raande.” Go Jethu lueel, “Lör, ku ye luui këya.”

Martha kek Maria

³⁸ Tewën cieth Jethu kek atuöocke ke la Jeruthalem, gokë nyuc gen thiin tö dhël yic. Go tiñ cöl Martha ke yäth baai. ³⁹ Ku Martha a la nyankën cöl Maria, ci ben nyuc Jethu lööm bi piöocde piñ. ⁴⁰ Go Martha puöu riääk rin këc Maria ye kony luoi miëth tënë jööl. Go ben tënë Jethu ku lueel, “Beny, ye këpath yen looi nyankäi ci yen ya päl luoi ë rot tetheer awën? Lëk ye bä ben kony.”

⁴¹ Go Bänyda beer ku lueel, “Yin Martha, yin adieer rin awic ba käjuëc tö yïpuöu looi ëbën, ⁴² ku ë tök yen aril, Maria acä abañ ñueen kueny bei, ku acii bi nyaai tënë ye.”

Jethu anyuth yo te bi yok aa röök thïn

(Mt 6:9-13; 7:7-11)

11 ¹ Yon akäl tök Jethu ë röök, nawën ci röökde jal thök, ke lueel raan tök kam kocken ye buoöth tënë ye, “Beny, piöoc yo te bi yok aa röök thïn, cimën wäär ci Joon raan kóc muoc nhïim kocken ye buoöth piöoc.” ² Go Jethu lek ke, “Yakë lueel këlä te röök wek,

‘Wädan tö nhial, bi rienku aleec.

Bi bäänydu ben yoyiic.

³ Muoc yook miëth akölaköl.

⁴ Ku päl adumuöömku piny tënë yook, rin ye yok wet puöl tënë kóc rec yook.

Ku duk yook cöl athem kërac.’ ”

⁵⁻⁶ Ku ben Jethu lek kocken ye buoöth, “Tädë, na yin ala mäthdu ku lor tënë ye waköu weer ciel yic ku luel tënë ye, ‘Mäthdie gäm ya ayuöp kadiäk. Rin mäthdien ci la keny aci ben paandie, ku yen acin miëth gäm ye.’

⁷ Ku bëer yööt alon thïn ku lueel, ‘Duk ya rëem nhom. Yöt aci gur thok, ku yok aaci töc yok miethkie. Yen acii rot ben jät ba yi gäm ayuöp.’ ⁸ Ku la Jethu tueñ ku lueel, na cok alon cii monyë rot jät bi gäm ayuöp rin yen mäthdu, ka not bi rot jät bi gäm kuat kë wïc, rin yin acii guöp bi riöoc ë ye, ku lör tueñ ke thiëc. ⁹ Këya alek we, thiëc, ku abi Nhialic gäm yi, na wïc këdäj tënë Nhialic ka yök. Ku ë tede aya, na gut yöt thok, ka ñany thok tënë yi. ¹⁰ Raan thiëc aye gäm ke wïc, ku raan la kë wïc aye yök. Ku yöt aye ñaany thok tënë raan wïc ye. ¹¹ Yeña kamkun na le meth, ku thiëc manhde miëth ke gem këpiiny te wïc yen rec. ¹² Ku na wïc tuon ajith, ke dom kieth ku gem ye. ¹³ Na ñieckë wek kóc ë luui kërec bäk miethkun aa gäm këpath, ke cäk lëu bäk ñic lon bi Wuurdun tö nhial ye ñic apeï bi Wëi Nhialic tuoc kóc thiëc ye.”

Jethu aye yöök lön le yen guöp jöḡrac

(Mt 12:22-30; Mk 3:20-27)

¹⁴Nayön akäl tök ke Jethu ë cop jöḡrac wei raan guöp, ku ëcie jam. Nawën cï jöḡë jäl yeguöp ke mony awën jam. Go thän awën tö thïn gäi apei, ¹⁵ku lueel kóc kök, “Ee Beldhebul beny jakrec yen ë ye yiék riel bi ke aa cuöp wei.” ¹⁶Ku ë wïc kóc kök bik deep wet, ku thiëckë bi kënë jän göi looi, bi nyuöth ke lön ye Nhialic kärke gam. ¹⁷Ku Jethu ë ñic kë yekë tak, go lek ke, “Na tek kóc paan tök keyiic ku therké ë kamken, ke pan kënë abi riäak. Ku na tuum dhiënh tök yenhom aya ku therké kamken ë röt, ke dhiënh kënë abi weer aya. ¹⁸Këya, na tek jakrec keyiic ku therké ë kamken ke cii thök? Ayakë lueel lön ye yen jakrec cuöp wei riel ye Beldhebul gam ya. ¹⁹Ku na ye riel Beldhebul yen ye yen jakrec cuöp wei, ke ye riel na yen ye kockun yakë buöth ke cuöp wei? Calkë ke aa lëk we yic. ²⁰Ku na ye riel Nhialic yen ye yen jakrec cuöp wei, ke ñieckë lön cï bääny Nhialic ben tënë we.

²¹“Na tit raan ril paande thok ë töḡ ku köt, ke kärke aaciï nyieei. ²²Ku na met raan det ril, ka wer ye. Ku jöl käk muk bi yen rot tiit nyaai ëbën, ku tek käk cï rum.

²³“Raan këc rot mät ya acie raandie, ku raan cii ya kony bi kóc lek wet Nhialic, ee kóc thiöi.

²⁴“Te cï jöḡrac jäl raan guöp, ee piny yööp tedet bi yen löḡ thïn. Na cïn te yök, ka lueel, ‘Yen abi dhuk tënë raan wäär jiël yen thïn.’ ²⁵Ku dhuk ku yök raan wäär, ke cit yön cï guir yic apath, ²⁶ku dhuk ku le ben kek jakrec apei kök kadhrou wär ye, ku lek yeguöp. Ku pir ë raan kënë ë jäl reec apei tënë pir den tueḡ.”

²⁷Kaam wën jieem yen kälä, ke tik jam röldit kóc yic ku lëk ye, “Tiḡ ë dhiëth yi ku muk yi amit guöp apei.”

²⁸Go Jethu beer ku lueel, “Ee yic, ku kóc mit gup alanden aa kóc wet Nhialic piḡ ku loikë.”

Jethu akuec bi kënë jän göi looi

(Mt 12:38-42)

²⁹Tewën cï kóc juëc kenhüim kut Jethu lööm, ke lueel, “Yeḡö be riëc akölë reec kälä? Ee riëc ye wïc bi kënë jän göi tiḡ. Ku acin kë bi nyuöth ke. Ee kënë jän göi wäär cï rot looi tënë Jona yen abik tiḡ. ³⁰Cimën wäär cï Jona raan käk Nhialic tiḡ jäl a kit tënë kóc Ninibe, këya Manh Raan abi jäl a kit tënë kóc akölë ëbën. ³¹Tiḡ beny wäär jiël pan Athia abi rot jöt aköl luḡdit ku gek riëc akölë, rin cï yen jäl temec apei bi wël puöth benyḡaknhom Tholomon la piḡ, ku yen jam kën, yen adit tënë Tholomon. ³²Aköl luḡdit kóc gen Ninibe aabi we gök rin cï kek kepuöth waar, ku pälkë luoi käreec wäär cï Jona ke lek. Ku alek we, yen jam kënë, yen adit tënë Jona.

Kóc cï gam aaciï awai ku mermer

(Mt 5:10; 6:22-28)

³³“Acin raan cï mermer kaḡ yäth yöt ku kum nyin. Aye tööu ten ye yen yöt mer yic thïn, bi piny amer tënë raan la yöt. ³⁴Puön path acit nyin path. Raan path nyin ë daai apath, acii thöḡ kek raan cï cöḡ cie daai apath. ³⁵Këya, luöikë röt bäk puöth la cök, ku duökkë puöth cöḡ. ³⁶Na yin aḡer puöu, ke yin acit raan këc cöḡ ë daai apath cimën dhie ye mac piny riaal.”

Jethu ë kóc piöoc lööḡ ku Parathi lek lön nhieem kek

(Mt 23:1-36; Mk 12:38-40)

³⁷Nawën cï Jethu thök ë jam, ke cööl raan töḡ akut Parathi paande bik la mith, go la ku nyuuc ku mith ke këc yecin ku yecök lök cimën cieḡ kóc Itharel. ³⁸Kënë, acï raan akut Parathi wën la baai ben göi apei. ³⁹Go Jethu lueel tënë ye, “Wek kóc akut Parathi, aa wegup aḡeer kek yakë lök, ku piäthkun aaci thiaḡ käreec apei. ⁴⁰Kóc cïn kë ñieckë! Këc Nhialic yen cak guöp, puöu alöḡthïn cak aya? ⁴¹Biökruel aye nyuöth puön yer te muöc yin kóc, ku acie miöc ye yin biökruel nyuöth ë path.

⁴²“Te reec yen thïn tënë we, kóc akut Parathi. Wek aa Nhialic juer kälik, käk cit tök ë thiaär yic kakkun yakë ke puur ë dum yic, ku kuat wel kök ëbën. Ku wet la cök ku nhier Nhialic akuöckë looi. Käkka aa dhielkë looi, ku luöikë käkka aya.

⁴³“Te reec yen thïn tënë we, kóc akut Parathi. Ayakë nhiaar bäk aa nyuc tueḡ thök köcdit nhüim ten amat, ku ye we muöth atheek yön ë yöc yic. ⁴⁴Te reec yen thïn tënë we, wek aa thöḡ kek reḡ cïn kë ye ke ñic, ye kóc cath kenhüim ë path, ku käreec cik thiaan keyiic piiny aaciï ñic.”

⁴⁵Nawën, ke raan tök kóc piöoc ë löön jot rot ku lueel tënë ye, “Beny, te jiëem yin këlä, ke yin ë yo lat aya.”

⁴⁶Go Jethu beer, “Wek kóc piöoc ë löön, kärec aa tit we aya. Wek aa kóc piöoc käril apeï cie lëu bi ke looi. Ku wek aacie kóc kony aya ë luoiden. ⁴⁷Të rëec yen thïn tënë we. Awëëñkui, wek aa reñ path buth tënë kóc käk Nhialic tiñ, kóc wäär nek wärkun dīt. ⁴⁸Acäk gam lön këwäär ci wärkun dīt looi apath, ku na we tō thïn ñuöt wek ci näk aya. Rin aaci kóc käk Nhialic tiñ nök ku buöthkë räñken. ⁴⁹Ku rin ë wet kënë yen aci Nhialic ye lek we ëlä, ‘Wek aaba tuöc kóc käkkie tiñ ku atuuc. Ku wek aabi kóc kök nök ku cuöpkë kóc kök wei.’ ⁵⁰Riëec akölë abi tem awuöc rin ci yen kóc käk Nhialic tiñ nök tewäär cek piny yëët ëmën, ⁵¹jook ë nääk Abel yet nääk Dhäkaria wäär näk luañ Nhialic. Ku ben Jethu lek ke, riëec akölë abi tem awuöc rin ë käkka ëbën!

⁵²“Të rëec yen thïn tënë we, wek aa yic moony tënë kóc ku acäk ye gam kek week ë röt. Ku wek aa kóc kök wic yic bik gam gël!”

⁵³Nawën wic Jethu bi jäl, ke jiëem kóc akut Parathi ku kóc piöoc löön guöp apeï, ku thiëckë wël juëc ku wickë bi ke dhiel dhuk nhïim, ⁵⁴rin wic kek ye bik deep wet bik döm, te le yen wet rëec lueel.

Duk riöc luel yic

(Mt 10:26-27)

12¹Wën ci käkka röt looi, ke kóc juëc apeidit aake ci kenhïim kut Jethu lööm abi cien te ye cök cak la piny. Tewën ke Jethu kañ jam tënë kocken ye buöth ku lek ke, “Tietkë röt, ku duökkë ye luui cimën kóc akut Parathi, kóc ë kóc ruëeny. ²Acin kë ye moony arek abi ciï tiec. Tedë ke lëu bi këdän thiaan abi ciï ñic. ³Na cök a wet luel waköu ka jot piñ nhiäk aköl. Ku këriëec ëbën cak ñäai weyith yööt alonñhin ke yöt ci thiöök thok anot ye kóc kök piñ.

⁴“Ku alek we wek mäthkie, duökkë riöc kóc guäpkun nök ë path. Aa we nök ku na lä ka cin këdet ben kë looi. ⁵Ee Nhialic yen adhil kóc riöc, rin na ci nök ka la riel aya bi cuat pan mac. Alek we, ee Nhialic ë rot yen adhil kóc riöc. ⁶Diet thii kor kadhiëc cit amuör, ciï ke ye yöc wëu lik? Ku acin tök ë kamken ci Nhialic kañ muör nom, ⁷agut nhimkun tō yinhom anjic Nhialic akuenden. Duökkë riöc, wek aa awär amuör juëc.

⁸“Alek we, raan ye gam kóc nhïim lön ye yen raan Manh Raan, aba gam aya lön ye yen raandie atuuc Nhialic nhïim. ⁹Ku raan jei kóc nhïim lön ciï yen ye raandie, abi Manh Raan kuc aya atuuc Nhialic nhïim.”

¹⁰Ku ben Jethu lek ke, “Kuat raan wet rac luel Manh Raan guöp abi päl piny tënë ye, ku raan lueel kërac Wëi Nhialic guöp, aciï bi kañ päl piny tënë ye.

¹¹“Të yeth yi ten amat luk yic, bäny dīt ku bäny kor nhïim, duk dieer te bi yin rot kuony thïn ku wet ba lueel, ¹²rin Wëi Nhialic abi col anjic kë ba lueel.”

Raan ajak kuc käj

¹³Go mony det rot jot kóc yiic ku lueel, “Beny lek wämääth bä yiëk abäkkie käk ci wä nyän yo yiic.”

¹⁴Go Jethu beer, “Mäthdie, yeña cä kuany ba ya beny, ba käj tek we?” ¹⁵Ku lek kóc awën tō thïn, “Tietkë röt, duökkë jieek col arum wepuöth. Acin raan rëer pierde yecin cök alon le yen käjuëc.”

¹⁶Ku lek ke kääñ kënë, “Theer raan ajak ë tō thïn, ku duömde ëci luok rap juëc apeï. ¹⁷Go jal jam ku lueel, ‘Yeñö ba jal looi? Yen acin duël lääu yic bi yen ke tööu thïn.’ ¹⁸Nawën ke tek ku lueel, ‘Kë ba looi akïn. Duël kënë aba ñaany, ku ben duëldit apeï looi bi yen rap ku käk kök baai tääu thïn. ¹⁹Ku jal lek rot yatök. Mony mit guöp, yin ala miith juëc apeï bi run juëc nök, jol pir apath, miëthë ku dekkë, ku jol puöu miet!’

²⁰Go Nhialic lek ye, ‘Raan kuc käj! Ee weer kënë, yin abi thou ku käjuëc ca tau rot kë, bik lök aa käk ë ña?’

²¹Ku wit Jethu wetde ëlä, “Kënë, yen ë rot looi tënë kóc käjuëc tööu ë rienken, ku acin jieek Nhialic tö kepuöth.”

Raan adhil Nhialic ñööth

(Mt 6:26-34)

²²Ku wël Jethu yenhom kocken ye buöth ku lueel, “Këya alek we, bäk röt ciï col anek dieer kë bäk cam bäk pir. Ku dieerkë aya käk bäk ceñ. ²³Wëi anuëen tënë miëth, ku guöp raan anuëen tënë aleth. ²⁴Daaikë diet pär nhial, aacie pur rap ku temkë ke, ku tæukë ke atuok yic, ku aa jot ke pir rin ye Nhialic ke yiëk

miëth. Ku wek aa njeen apei tënë ke. ²⁵ Yeņa kamkun na diir ë wei ke juak ruönke? ²⁶ Na cäk käk thiikä ye lëu, yeņö ye wek dieer käk kök? ²⁷ Tieņkë yök cil te dhëej kek thïn, aacie luui ku aacie luui aleth. Ku alek we na cök a benyjaknhom Tholomon cimënden wäär ë bäanyde yic, ëcïi la aleth la kit dhëej cimën yäj tök ë yökkë yiic. ²⁸ Ku na ye Nhialic wel cil ë path cöl adhëej këlä, wel tö thïn akölë ku na nhiäk nin lik ke ril wei ku took ke mac, ke Nhialic cïi we bi kuëec nhïim, wek aa koc la gam thin koor.

²⁹ “Duökkë wenhïim ye yiëk kë bäk cam ku kë dekkë akölaköl. ³⁰ Aa koc kuc wet Nhialic pinynhom ë ten kek aa kepuöth yiëk kakkä. Ku Nhialic Wuurdun aņic lön wic wek kakkä. ³¹ Na ye këya, yakë ke wic käk bäany Nhialic, ku aabi yiëk we aya.

Jieek cie rop atö pan Nhialic

(Mt 6:19-21)

³² “Duökkë riöc wek koc buöth ya rin Wuurdun amit puöu bi we yiëk ë bäanyë. ³³ Yaackë kakkun ku gämke wëeu koc nöh. Kënë abi jaakdu juak yic pan Nhialic. Ku jieek pan Nhialic acie thök, ku acie riäk cimën jieek pinynhom, rin acin cuer tö thïn. Ku acïi aruop ye rac. ³⁴ Ku piändu abi ya rëer akölaköl te töu jaakdu thïn.

Reer yi ci rot guir

³⁵ “Reer yi ci rot guir akölaköl, ku reer yi muk mermer rin kuat kë bi rot looi bi yök waköu, ³⁶ cimën alony lui baai tit bänyden ci la yan thiëek yic ke bi dhuk baai. Na bi ke go yöt guo njaany thok tënë ye. ³⁷ Aloony mit gup aa loony ye bänyden yök ke tit te dhuk yen baai. Alëk we alanden, beny abä alanhden luoi ruök, ku cöl ke aa nyuc bik mïth ku luui tënë ke. ³⁸ Tedë, ke beny abi dhuk baai weer ciel yic, tedë ke dhuk beek ë piny. Ku aloony mit gup aa loony bi bäny yök ke tit. ³⁹ Wek aa lëu këne bäk deet yic ë röt. Na raan ye weer alon bi cuär ben nïc, ka reer ke yiën bi cuär kärke cïi kual. ⁴⁰ Ke week aya reerkë we tit, rin wek aa kuc aköl bi Manh Raan ben.”

⁴¹ Go Piter lueel, “Beny, ye yok lek ë kääj këne aye koc ëbën?” ⁴² Go Beny dhuk nhom ku lueel, “Na ye këya, yeņa alony path ku nïc käh apei? Yeen alony bi beny nyään kärke yiic paande, bi kacke ya gäm miëth akölaköl. ⁴³ Alony mit guöp alony bi beny yök ke loi luöide apath te dhuk yen. ⁴⁴ Alëk we, abi alony këne täau kärke yiic ëbën. ⁴⁵ Ku na ye alony ye tak lön cïi bänyde bi lac dhuk. Ku ye rëer ke näk aloony kök, röör ku diäär. Ku ye cool ke mïth ku dëk abi wïset. ⁴⁶ Ke bänyde abi la luät yeguöp aköl cïi ye tak lön yen aköl bi yen ben. Ku yeen abi beny tem awuöcdit ku met te rëer koc rec thïn.

⁴⁷ “Ku aluan nïc kë wic bänyde bi looi, ku rëer ke cïi rot guir bi kë wic beny looi, ka bi tem awuöcdit apei. ⁴⁸ Ku aluan kuc kë wic bänyde ku looi awuöc bi yen that thïn, ka bi ya awuöc koor. Käjuëc aa wic tënë raan ci gäm käjuëc, ku raan ci gäm käjuëc apei awic käjuëc apei tënë ye. ⁴⁹ Yen aci ben ba piny ben cuöny. Ku anhiaar diet ci dëp theer. ⁵⁰ Yen atiit këracc apei, yen abi gum ku rem ya apei yet aköl bi këne thök. ⁵¹ Yakë tak lön ci yen ben ba döör ben looi pinynhom? Alek we acie ye. Ee lön bi koc keyiic tek. ⁵² Many la yic koc kadhiëc abi yeyic tek. Koc kadiäk aabä nhiaar ku man rou ya. Tedë, koc karou aabä nhiaar ku man koc kadiäk ya. ⁵³ Mïth röör kek wärken aabi kenhïim tuööm ë rienkie. Ku yen ë lön nyïr kek märken. Ku man athiëek kek tiņ wënde aabi röt maan aya.”

⁵⁴ Ku ben Jethu lek thän awën tö thïn, “Na tieņkë luät nhial, ka guökë lueel lön deņ abi tueny, ku tueny ayic. ⁵⁵ Ku na döm bi la dil, ku ruel aköl apei, ka luelkë lön bi piny tuöc, ku tuc ayic. ⁵⁶ Yeņa wieckë bäk ruëeny! Awëenjku? Wek aa kë bi rot looi nïc te tiņ wek kakkä nhial. Ku cäk kë loi rot ëmën nïc ayic?

⁵⁷ “Yeņö cïi wek yic bäk looi ye nïc? ⁵⁸ Cimën na yeth raan yi luk yic, ke yi löc wet waar yic, ku döörkë ke këc yi guo yäth luk yic. Na cïi löc looi këlä, ka yeth yi luk yic tënë bäny, ku beny abi la thön apuruuk, ku mac yi. ⁵⁹ Alek yi, yin acïi bi kaņ lony, yet te bi yin këthiin köny tënë yi kaņ cool.”

Na cïi luoi käreec päl ke yin acïi pïr

13 ¹ Nawën ke koc bö tënë Jethu, ku lëkkë ye lön ci bänydit Pilato koc Galilia cöl anäk, koc ke ci käk juërkë Nhialic la nöck luan Nhialic Jeruthalem. ² Go Jethu beer. “Yakë tak lön koc Galilia ci nöck ëmën aa käreec apei wer kek koc Galilia kök looi? ³ Acie yic! Ku cäk nïc lön wek aabi thou aya cimënden, te cïi wek käreec yakë looi päl, ku welkë wepuöth Nhialic? ⁴ Ku na koc wäär kathiäär ku bet wik yön bäär apei kenhïim Thiloam bik thou ëbën, ye kek koc käreec looi Jeruthalem kepec? ⁵ Aacie ke! Ku alëk we, na cäk luoi käreec päl, ke wek aabi thou ëbën cimënden.”

Kääñ tim cie luok

⁶ Go Jethu ke lek kääñ kënë, “Monytui ëci tim luok com duomde. Nawën thöönj te ci yen luok, ke bö bi ben bet. Go cien mith yök yenhom. ⁷ Go puöu riääk apei, ku lëk raan lui dom yic bi yep wei, ku lëk ye, ‘Aca tiit run kadiäk ku acin manh tönj ca yök yenhom. Yeñö pel ye bi dom rooc ë path ke cie luok?’ ⁸ Go raan ë luoi beer, ‘Beny, päl ë ruöön tönj kënë ë path, aba guir ku täau dhiäp yecök. ⁹ Na lok ruööntui ka path, ku na ci lok, ka jol col ayep.’ ”

Jethu aci tiñ tuany kony aköl ci koc ye luui

¹⁰ Tewën aköl ci koc ye luui ke Jethu piöoc ten amat koc Itharel, ¹¹ ke tik ë tö thin ke la guöp jorrac ci ye dhoj köu, bi yeköu ci ye jot ruöön thiäär ku bet. ¹² Nawën tiñ Jethu ke cöol ku lëk ye, “Tik, yin aci kony.”

¹³ Ku teeu yecin yeköu. Ku kaam thiin awën ke la köu cök. Go Nhialic leec.

¹⁴ Ku raandit ten amat ëci puöu dak apei rin ci Jethu ye kony aköl ci koc ye luui. Ku lëk koc awën tö thin, “Yok aa la nin kadätem ye koc luui. Ke raan alëu bi ben akäl tök kam ë ninkä yiic bi ben kony, ku acie aköl ci koc ye luui.”

¹⁵ Go Beny beer ke tönj guöp, “Aa wek koc la gup ruëeny! Le raan tök ë kamkun cie yäkke ye lony aköl ci koc ye luui bi ke la wiéc wal ku piu? ¹⁶ Ku tiñ kënë, nyan many Abaram ci beny jak dhoj köu, bi ya rëer ke duol ë runkä kathiäär ku bet, ci path bi kony aköl ci koc ye luui bi la cök?” ¹⁷ Tewën lueel yen ye këlä, ke koc awën man ye yär gup, ku mit than diit awën tö thin puöth käk koc göi ci Jethu looi.

Kääñ kau koor nyin ye tiemde dit apei

(Mt 13:31-32; Mk 4:30-32)

¹⁸ Ku la Jethu tuej ke jam ku lueel, “Bääny Nhialic cit njö? Yeñö ba thöönj ke ye? ¹⁹ Aba thönj manh tim koor nyin ci raan com duomde. Go dit abi ya tim dittet ye diet yöötken yik kerke köth.”

²⁰ Ku ben lueel, “Yeñö ba ben thönj bääny Nhialic? ²¹ Acit lon ci tik puor ayumdit tet yic, na lä ke piäär ëbën.”

Kuany dhël la pan Nhialic yic

(Mt 7:13-14, 21-23)

²² Ku ber Jethu ke kuany geeth ku beei yiic ke la Jeruthalem. ²³ Go raan tök thiëc, “Beny! Le koc lik bi poth bik la pan Nhialic?”

Go Jethu beer, ²⁴ “Thamkë bak bak dhël ye koc gum thin yic, rin alek we lon wic koc juéc ye bik la alonthin, ku acik bi lëu. ²⁵ Te jot wun baai rot ku riit yöt thok, wek aabi köoc ayeer ku jalkë yöt tönj thok ku luelkë, ‘Beny, nyan yöt thok tënë yo,’ ku abi beer tënë we, ‘Akuoc te bi wek thin.’ ²⁶ Ku abäk lek ye, ‘Yok aaci mith ku dëkku kek yi, ku yin aci piöoc ë geethkua yiic!’ ²⁷ Ku abi dhuk nom ku lueel, ‘Alek we bak piñ, wek aaci bö yöt rin wek aaci njic. Jalkë, koc luui ë karec!’ ²⁸ Ku te ci yi cuop wei, ke yin ariääk puöu ku dhiau aba yithok a kac te tiñ yin Abaram, ku Ithäk ku Jakop ku koc käk Nhialic tiñ, ke reer bääny Nhialic yic pan Nhialic, ku gël yi wei thin! ²⁹ Ku koc aabi ben pinynhom ëbën ku camkë yan bääny Nhialic. ³⁰ Ku koc tö ciëen ëmën aabi tö tuej. Ku koc tö tuej aabi dhuk ciëen.”

Jethu ku Antipäth Yërot

(Mt 23:37-39)

³¹ Teen, ke koc akut Parathi bö tënë Jethu ku lëkkë ye, “Jäl ë ten rin beny Antipäth Yërot awic bi yi nök.”

³² Go Jethu lueel, “Lak ku lekkë raan la guöp awandit lon yen abi la tuej akölë ayi nhiäk ya cop jakrec wei koc gup, ku luoi käk jän göi ye yen koc kony. Ku na ye nin diäk ke yen abi luoidie thöl pinynhom. ³³ Ku akölë ku nhiäk ku aköl deetë, yen ala tuej ya lui rin acii path bi raan käk Nhialic tiñ nök tedet cie Jeruthalem.

³⁴ “Koc Jeruthalem! Koc Jeruthalem! Koc ë koc käk Nhialic tiñ nök, ku biöökkë koc ci tuoc we aleel. Ye arakde ci yen ye wic ba we kuööt yiic, ku kuony we cimën adhie ye ajith miethke kuöm piny yewuök, ku wek aaci kuec.

³⁵ Nhialic abi we nyän pandun. Ku athön we bak njic, wek aaci ya bi ben tiñ yet aköl bi wek röt guir, ku luorkë ya yai ke yakë lueel, ‘Lecku raan bö rin Bänyda.’ ”

Jethu aci raan tuany kony

14 ¹Nawën ke Jethu la pan raan akut Parathî aköl cîi kóc ye luui bî la mîth. Ku kóc ke tō thîn aake döt Jethu apeî.

²Go raan cî but yōöm ku kōk ebën ben tēnē ye. ³Go Jethu jam ku thiëc kóc piöoc ë löön ku kóc akut Parathî, “Cî lōñ pēen bî raan tuany kony aköl cîi kóc ye luui tēdē ke kony?” ⁴Gokē cîi bēer. Go Jethu mony awën cōol ku kony ku cōl ajiël. ⁵Ku jōl lek ke, “Yeña kamkun ë ten, na cî manhde, ayî wenđe lööny yiith aköl cîi kóc ye luui, ke pel yiith ku cîi bîi bei nyin yic?” ⁶Ku wet kēnē aci ke nyōñ nhîim kē bēer kek ye.

⁷Wën cî yen ye tîñ aya ke jōöl awën cî cōol aaye ñek teden nyuuc yen thîn lōc, ke luel kääñ kēnē, ⁸“Tē cî yî cōol yai yic, duk la ku nyuc ten kōcdit, tēdē ke raan ben dît tēnē yî aci cōol aya. ⁹Na bîi, ke raan awën cōl we wedhie abî yōök ba rot jōt ba thōoc pāl ye. Ku yîn abî jāl dhuk thōc tō ciēen yiic ke yî cî guōp yār. ¹⁰Tē cî yî cōol, ke yî la ku nyuc thōc tō ciēen yiic rin na la raan la baai ben, ka bō tēnē yî ku luel, ‘Jōt rot, bāär tueñ ten māthdie.’ Kēnē abî cōl athiek yic jōöl nhîim ebën. ¹¹Kēya, kuat raan dît puōu rot yāth tueñ ë rot abî Nhialic dhuök ciēen, ku raan lir puōu ë rot dhuök ciēen abî Nhialic yāth tueñ.”

¹²Ku luel Jethu tēnē mony awën cî ye gōñ, “Na loi miēth bî yîn kóc gōñ, ke duk ke cōl māthku ku paan moor, ku kóc ruääi kek yî ku kóc ajiëek thiëk bääikun, rin aabî ben cōol. Ku na looi rot kēya, ke kēwäär ca luōi ke yen acolke tēnē yî. ¹³Na loi miēth cōol yîn kóc, ke cōl ke kóc ñōñ, ku kóc cî duany, ku kóc cî ñōl ku cōor, ¹⁴rin na la kóc rōt jōt thou yic aköldä, ke yîn abî Nhialic cuōöt rin wäär cî yîn ke cōol kóc cîi ye lēu bik miēthku cool.”

Jethu aci bääny Nhialic thōñ yan thiëk

(Mt 22:1-10)

¹⁵Go mony det mîth kek kóc luel tēnē Jethu wën piñ yen kēnē, “Kóc mit gup aa kóc bî cōol yai yic, bääny Nhialic yic.”

¹⁶Go Jethu lek ye, “Monytui ëcî yandit apeî looi ku cōol kóc juëc. ¹⁷Nawën cî mîith yai guir, ke toc aluonyde bî kóc wic ke yai yic la cōol, ‘Bäk, keriëc ebën aci thök ë guier.’ ¹⁸Gokē wël juëc luel kedhie bî kek kenhîim kōl. Ku luel raan wën cî alony kañ yök ëlä, ‘Yen aci piny yōoc, ku yen adhil la ba la tîñ. Lōor ku lek beny lōn acin kē maan yen cîi yen la yai yic.’ ¹⁹Ku luel raandet, ‘Yen aci miöör kathiäär ye kóc pur yōoc, yen ala ba ke la them, lōor lek beny lōn acin kē maan tēnē ye.’ ²⁰Ku luel raan ye kóc diäk, ‘Yen aci piac dōm nya, acä lēu ba la yai yic.’

²¹“Go alony dhuk baai ku le wëlkä lek bānyde. Go bānyde puōu riääk ku lëk aluonyde, ‘Lōor dhöl yiic ku kam bæi geeu, ku cōl kóc lîm dhöl yiic ku kóc cî duany, ku kóc cî ñōl ku cōor bik ben.’ ²²Go alony luel, ‘Beny, kē ca lek ya aca looi ku piny añot lääu.’ ²³Go beny ben lek aluonyde, ‘Lōor kuany baai yic ku dhöl yiic geeu, ku lek kóc ebën bik dhiel ben bî paandie thiäñ. ²⁴Alek yî, kóc wäär ca kañ cōol acin miēth yai bik ben yök paandie!’ ”

Kē dhil raan looi bî ya raan buoth Jethu

(Mt 10:37-38)

²⁵Kóc juëc aake cath kek Jethu. Nawën ke wël yenhom kóc ku luel, ²⁶“Na ye raan bō tēnē ya, ku cîi wun ku man ku tieñde ku miethke, ku wämāthakēn ku nyierakēn, ku weike man, ka cie raan buoth ya. ²⁷Ku raan cie gum ku buoñth ya, aciï lēu bî ya raan buoth ya. ²⁸Na wic raan bî yōndit bāär apeî buth, yeñō bî kañ looi? Nadē ke cîi wēü muk bî kañ kuēen nyin bî ñic lōn le yen wēü juëc bî yen yōt buth bî thöl? ²⁹Na jōok cök ku le cien wēü juëc bî yen ye thöl, ka bî kóc yōt tîñ ke kēc thök aa bui, ku yekē luel, ³⁰‘Mony kēnē aci yōt jōok bî buth ku akēc thääp.’

³¹“Na jōt benyñaknhom tōñ ke la apuruk tim thiäär bî la thör kek benyñaknhom det la apuruk tim thiär-rou, ke cîi bî kañ tak lōn bî yen tōñ lēu kek ë beny kēnē? ³²Na yök ke cîi tōñ bî lēu, ka toc kóc ke benyñaknhom tui ñot mec kek apuruōökke bik döör looi.” ³³Kēlä aya, acin raan kamkun lēu ye bî ya raan buoth ya agut te bî yen kākke kañ puöl.

³⁴“Awai, apath. Ku na thōök kōu alei ke ben dhuök thîn kēdē? ³⁵Awan cit kēnē acie ben piath. Aye puök wei. Pieñkē te le wek yith.”

Kääñ amel cī mäǟr

(Mt 18:12-14)

15¹⁻² Kɔc ajuer kut ku kɔc käreec looi aake cī ben tēnē Jethu bik piöcde ben piñ. Ku kēnē, ee kēc kɔc akut Parathī ku kɔc piöc lööñ nhiaar, rin ye Jethu kɔc rec meen jāñ lor, ku mīth ke ke aya. ³ Goke lek kääñ kēnē.

⁴ “Na la raan tɔk kamkun amääl buɔt, ku mār amäl tɔk, ke cīi thiärdhoñuan ku dhoñuan nyiëñ piny roor, ku le amäl tōñ cī mäǟr kañ wic yet te bī yen ye yök? ⁵ Ku na yök ka mit puöu apei ku jɔt yekēt. ⁶ Ku na le yet baai ka cɔl mähke ku kɔcken akeu nhom ku lək ke, ‘Yen acī puöu miet rin cī yen amäldien wäär cī mäǟr yök. Loiku yai.’ ⁷ Kälä aya, miet puöu dīt abī tō pan Nhialic, rin raan tōñ këracc looi cī yepuöu dhuök ciëen rin adumuöömke. Ku miet puöu kɔc tō pan Nhialic, rin ë raan tōñ, acīi bī thōñ kek miet puöu rin kɔc path kathiärdhoñuan ku dhoñuan cīn awuöc cik looi, bī kek kepuöth dhuök ciëen.”

⁸ “Tēdē, tik ala wēeth thiäär milāñ yer, ku mār wenh tɔk. Yēñö bī looi? Abī mac deep ku wic apei arek bī yöt a weec yic agut te bī yen ye yök. ⁹ Te cī yen ye yök ka cɔl mähke ku kɔc akeu ëbēn ku lək ke, ‘Yen amit puöu apei, wēükien wäär cī mäǟr aaca yök. Loiku yai.’ ¹⁰ Kälä aya, atuuc Nhialic aa puöth miet rin raan tōñ käreec looi cī yepuöu waar ku dhuk Nhialic.”

Kääñ manh cī mäǟr

¹¹ Ku la Jethu tueñ ku lueel, “Monytui ë tō thīn ku ë la wät karou. ¹² Go wēn koor lek wun, ‘Gäm ya kāk ba tek ya aköldä?’ Go wun kañ tek tēnē ke. ¹³ Nawēn nin lik cök ke wēn koor ɔcɔc kākke ëbēn, ku jiël bī la wun det, wun cī yen wēuke ben la thöl thīn dēñ ë mäüu ku wicwic adējök. ¹⁴ Wēn cī yen wēü thöl ke cɔñdīt apei loi rot ye pan awēn, ku jɔl rēer ke nek cɔk apei. ¹⁵ Nawēn le kākke dhal ke lueek rot pan raan tɔk ë kɔc pan awēn. Go raan la baai cɔl aye dīr baai biöök. Ku gem ke kē camkē. ¹⁶ Ku ë ye wic diet cɔk yeyäc thiöñ kē ye dīr cam, ku acīn raan cīi ye gām ye. ¹⁷ Nawēn jɔl këracc cī looi tak yic yepuöu ke lueel, ‘Ye kɔc luoi kadē tō tēnē wä ë kueth abī mieth döñ piny, ku yen akīn duēr thou ë ten rin cɔk! ¹⁸ Yen abī dhuk tēnē wä ku lek ye, wä yen acā awuöc looi tēnē Nhialic ku tēnē yī. ¹⁹ Yen acīi ben a cɔl yī, loi ya ke ya cīt alony ye riɔp.’ ²⁰ Ku jɔl jāñ pan awēn ku dhuk tēnē wun.

“Tewēn ñoot yen temec ke baai, ke tiñ wun ke bö. Go puöu la yum ku riñ tēnē ye ku peet yic ku cim gēm. ²¹ Go wēnde lueel, ‘Wä yen acī këracc looi tēnē Nhialic ku tēnē yī. Yen acīi ben piath nadē ke ya cɔl ë yī.’ ²² Go wun aluɔnyke cɔl ku lueel, ‘Rienkē! Beeikē alanh path ku tääkē yeköu. Ku cuöthkē cin joth milāñ tɔc ku tääkē war yecök. ²³ Ku beeikē muɔr thiin cuai apei ku näkkē bī yok yai looi, ²⁴ rin manhdien kēnē ë cīt mänh cī thou ku acī ben pīr. Yeen ëcī mäǟr ku acī yök.’ Ku jɔlkē yai cam.

²⁵ “Tewēn looi kākka röt, wëndīt ëcī la luui dom yic. Nawēn dhuk ku jɔl bī baai dööt, ke piñ löör yic ku diēr. ²⁶ Go aluɔny tɔk cɔl ku thiëc kē diēr kɔc baai. ²⁷ Go alony awēn lek ye, ‘Wämuuth acī ben, ku wuur acī muɔr wäär cuk muk apei bī cuai nöc bī yai looi rin cī yen dhuk ke puɔl guöp.’

²⁸ “Go wëndīt puöu riääk apei ku kueec bī cīi la baai. Go wun ben tēnē ye ku leñ bī la baai. ²⁹ Go lek wun, ‘Yen acī luui apei ë runkä ëbēn tēnē yī, ku acīn tōñ ca lek ya ba looi cī yen kañ kuec ba cīi loi. Ku ë runkä ëbēn acīn mēn manh ë thök ca kañ yiäk ya bī yen luui yai yok mähkie. ³⁰ Ku wēn dhuk wēndu ke cī wēuku la muör adējök köth, ke yī loi yai ku näk muɔr tōñ yen cuai apei yäkkua yiic.’ ³¹ Go wun beer, ‘Manhdie, yīn areer kek ya akölaköl, ku kāk muök ëbēn aa kākku. ³² Ku ë yic buk yai looi rin wämuuth ë cīt manh cī thou, ku ëmēn acī piir, ee cī mäǟr ku ëmēn acī yök.’ ”

Kääñ raan luoi kony rot ruëny

16¹ Ku ben Jethu lueel tēnē kɔcken ye buɔth ëlä, “Wätheer raan ajak ë tō thīn, ku yeen ë la raan kākke guiir baai, ku raan kēnē ëcī luom tēnē ye rin cī yen wēuke muör. ² Go cɔl ku lueel, ‘Yēñö kē ya piñ keye lueel ë rienku? Nyoth wēü ca dom ku wēü cī mäǟr thook ëbēn, rin yīn acīi bī ben ñot yī lui tēnē ya.’ ³ Go mony wēn lueel yepuöu ëlä, ‘Ba ñö looi te cop beny ya luoidie yic? Yen akuc puör ë dom ku yen abī guöp yär te ye yen lim. ⁴ Ëmēn, kē ba looi aca jāñ ñic, kē bī yen cɔl ala kɔc juëc mäath ke ya, bik ya aa lor bääiken te cop ya wei luoidie yic.’

⁵ “Go kɔc la gup kāny bānyde cɔl ku lueel tēnē raan cī kañ ben, ‘Kāk beny köny tēnē yī yekē dē?’ ⁶ Go lueel, ‘Yen aköny tōnydīt miök bian tɔk.’ Go raan kañ guiir baai lek ye, ‘Kēnē acī ya akuendu, nyuc ku gät thiärdhiëc.’ ⁷ Ku thiëc raan det, ‘Na yīn, keny tō yīguöp ye dē?’ Go lueel, ‘Ee gāny rap tiem tɔk.’ Go lek raan wēn, ‘Gät buot kabet.’

⁸“Go wun baai raanden la guöp awan leec wën cī yen rot kony. Rin te ye riëc akölë kākken luoci thin kamken anueen tēnē mīth bääny Nhialic.” ⁹Go Jethu la tueḡ ku jieem, “Këya alek we, luoi kē jieek pinyhom bi wek ke la meth, rin na la jaakdun thök ke wek aabi lor pīr akölrīëc ëbën yic. ¹⁰Raan ḡic kälík muk apath ë käjuëc ḡiec muk aya, ku raan kuc kälík muk, acie käjuëc ë ḡiec muk. ¹¹Na yin acie kāk cieḡ pinyhom ë ten ḡiec muk, ke yī bi deet puöu kēdē bi yī gām jieek tō pan Nhialic? ¹²Na yin acie ḡöth puöu lon bi yin kën raandä ḡiec muk, ke yeḡa bi gām kē cök a këdu?”

¹³“Acin alony lëu ye bi luui tēnē bāny karou, ka man raan tueḡ ku nhieer raan ye kōc rou. Tedē ka thek raan tueḡ ku dhel raan det guöp. Acii raan lëu bi Nhialic ku jieek nhiaer kedhie.”

¹⁴Go kōc akut Parathi, kōc nhiaer wëu, kākka piḡ ëbën ku dōlkë Jethu guöp. ¹⁵Go Jethu lek ke, “Wek aa röt nyuöth kōc nhiiim ciet wek kōc path ku Nhialic anḡic kē tō wepuöth. Rin kāk ye kōc juëc yiëk kepuöth apei ciet kek ril, aaye Nhialic tiḡ ke kor.”

¹⁶“Wätheer agut tewäär tul Joon, kōc aake ye löḡ Mothith ku wël cī kōc kāk Nhialic tiḡ göt, theek. Ku ëmën, Wet Puöth Yam rin bääny Nhialic alëk kōc, ku awic kuat raan ëbën bi rot rieeny thin. ¹⁷Ee këya, apuol yic bi kāk tō nhial ku pinyhom riäk, ten te bi wet thin koor tō Löḡ yic cuat wei.”

¹⁸“Raan liöi tieḡde ku thieek tiḡ det, ka cä akor looi. Ku mony thiak tiḡ cī muonyde liöi, ka cī akor looi aya.”

Raan cī jak kok miëth ku Ladhäro

¹⁹Go Jethu kääḡ ben thöth ku lueel, “Raan tōk ë tō thin ku ëcī jak apei, ku ë ceḡ aleth dhēḡ ku ë ye yai looi paande akölaköl. ²⁰Ku raan laaḡ cöl Ladhäro la guöp tetöök juëc apei ë tō thin aya. Ku ë ye nyuc yōn raan ajak thok, ²¹bi lim awuthueei ë lööny piny. Ku jök aake ye ben aya ku nyankë tetöök yiic.”

²²“Nawën ke laaḡ kēnē thou, go atuuc Nhialic weike tääu Abaram you nhial pan kōc path cī thou. Nawën ke mony ajak lök thou aya ku thiäk, ²³ku tēu weike pan mac, ku rem thin apei. Nawën ḡeer yenyin nhial ke tiḡ Abaram temec, ku Ladhäro ke tō yeyou. ²⁴Go dhiau ku lueel, ‘Wä Abaram liec ḡa, ku toc Ladhäro bi cieḡ tōk luöt thok piü yiic, ku gōt ḡaliep bi liemdie lier, rin yen arem apei ë ten!’

²⁵“Go Abaram beer, ‘Manhdie, tak lon cī yin kápath yök wäär piir yin ku yök Ladhäro käreec. Ku yeen awac puöu ëmën ku yin arem apei. ²⁶Ku det aya, tethuth mec yic apei atō kamkua bi cien raandan la löḡtui, ku cin raandun bö tēnē ḡa ë ten.’ ²⁷Go mony ajak wën lueel, ‘Wä Abaram yin alāḡ ba Ladhäro tuöc panda, ²⁸tēnē mīth wä kadhiëc bi ke la wet bik cii bö ë ten bi ke reem aya.’

²⁹“Go Abaram lek ye, ‘Mothith ku kōc kāk Nhialic tiḡ aa tō thin, cöl ke aa piḡ welken.’ ³⁰Go mony ajak ben lueel, ‘Kēnē acii ye lëu, Wä Abaram! Ku na jōt raan rot kōc cī thou yiic ku le tēnē ke, ka päl käreec yekë ke looi.’ ³¹Go Abaram lueel, ‘Na cik wël Mothith ku wël kōc kāk Nhialic tiḡ piḡ, ka cii wet raan cī thou ku ben piḡ piḡ aya.’ ”

Ba raandet thöc kërác yic

(Mt 18:6-7, 21-22; Mk 9:42)

17¹Nayon akäl tōk ke lueel Jethu tēnē kōcken ye buöth, “Kāk kōc cöl aloi adumuööm aa röt dhiel looi akölaköl. Ku raan kākka cöl aloi röt abi kërác apei yök. ²Ee ḡueen tēnē ye diet cī ruök yeth aleldit tet, ku pik wiiir bi mou, bi kōc thiikā cii cöl aloi adumuööm. ³Tietkë röt!”

“Na loi menhkui adumuööm, ke nyieny, ku na dhuk yepuöu ciëḡ këréc cī looi, ke yī pel wet piny tēnē ye. ⁴Ku na looi kërác tēnē yī arak dhorou akäl tōk, ku bii tēnē yī arak dhorou aya, ku thiëc yī ba wet päl piny, ke yī pel wet piny tēnē ye.”

⁵Nayon aköl det ke lueel atuuc tēnē Beny Jethu, “Yok aa wic gamdit, lek yo te bi yok ye yök thin.” ⁶Go Beny beer, “Na gamdun cök kuur bi ciet manh ḡaap, ka leukë bāk tim diit tui yök ëlä, ‘Nyuen rot bei piiny agut mei, ku löc pith rot wiiir!’ Ke wetdun aloi rot.”

⁷“Na thöḡku lon raan tōk kamkun ala alony cī la pur, tedē ke cī la biöök amel. Na le dhuk dom yic, ye lek ye, ‘Löc ben ba ben mīth?’ ⁸Acii bi lek ye këya! Tedē aba lueel tēnē ye, ‘Guir miëth tēnē ḡa, ku tit ba kaḡ mīth ku dek, na lä ciëḡ ke yin abi jäl mīth ku dekë.’ ⁹Ku aloony aa cie leec te looi kek luoiden. ¹⁰Athōḡ kek we aya, na luoi kē ca lek we bāk looi, ka luelkë, ‘Yok aa loony ë path, ee luoida yen acuc looi ku acin det.’ ”

Atuet thiäär aci kony

¹¹ Nawën la Jethu Jeruthalem, ke tøk kam Thamaria ku Galilia. ¹² Nawën yeet gen thiin tö dhël yic ke räm kek atuet thiäär. Gokë kööc temec, ¹³ ku luelkë, “Jethu Beny, liec yo.” ¹⁴ Nawën tiñ ke ke lueel, “Lak ku nyuöthkë röt koc käk Nhialic.”^d

Tewën ñoot kek dhël yic, ke tuet jiël kegup. ¹⁵ Go raan tök dhuk tènë Jethu wën cì yen ye tiñ ke tuet cì jäl yeguöp, ku leec Nhialic apeï röldit, ¹⁶ ku cuet rot piny Jethu nhom ku leec. Ku mony kënë ë raan Thamaria. ¹⁷ Kënë aci Jethu col athiëc ku lueel, “Cie raan thiäär yen cì kony bi tuet jäl kegup? Koc kök kadhoñuan aako? ¹⁸ Yenö yen raan wun det yen dhuk bi Nhialic ben leec?” ¹⁹ Ku lëk ye, “Jot rot ku jäl. Gamdu aci piir.”

Bääny Nhialic

(Mt 24:23-38, 37-41)

²⁰ Nayon akäl tök ke koc akut Parathi thiëc Jethu, “Bi bääny Nhialic yecök jock nen?” Go Jethu beer ku lueel, “Bääny Nhialic acie kënë na bi ke tiñ koc nyin? ²¹ Ku acin raan lëu ye bi lueel, ‘Daai ten, yen akin, tedë ke lueel, yen akan.’ Rin bääny Nhialic atö wepuöth.”

²² Ku lueel Jethu tènë kocken ye buöth, “Te bi wek ya, yen Manh Raan nhiaar diet ya cok rëer ke we akäl tök abö. Ku yen acii bi rëer ten. ²³ Abi koc kök lek we lon cì yen dhuk yen atö ten, ke duökkë gam, ku duökkë ya cok wic. ²⁴ Rin te dhuk Manh Raan, ka guo kë ñic. Abäk tiñ cimën bir deñ dhie yen nhial reet yic, ku tiñ loñ ku loñjë. ²⁵ Ku yen abi kañ gum apeï, ku riëc akölë acii wetdie bi gam. ²⁶ Te le Manh Raan ben, ke kë bi rot looi abi ciet këwäär loi rot wäär piir Noa. ²⁷ Ee ninkä koc aake reer ke mit puöth, keye mith ku dëkkë ku loikë rui yët aköl le Noa riäi yic, ku bö aboor ku moukë ëbën. ²⁸ Ku bendie abi thöñ aya kek këwäär loi rot wäär piir mony col Lot. Ee ninkä koc aake ye mith ku dëkkë, ku yockë kañ ku yockë ke wei, ku purkë ku loikë yööt. ²⁹ Ku aköl wën jiël Lot Thodom, ke Nhialic col deñ atueny ë mac ku nek koc ëbën, ³⁰ yen abi ciet aköl bi Manh Raan dhuk.

³¹ “Te le akölë ben, ke raan reer ayeer acii ben la yöt bi la guik kë muk. Ku raan tö dom yic aci dhuk baai aya. ³² Takkë këwäär cì rot looi tènë tiñ Lot.”^e ³³ Raan wic ye bi weike kony aabi muör, ku na ye raan mär weike ë rienkie ka bi weike muk akölrüëc ëbën. ³⁴ Wakou ë ninkä koc karou aabi tö yööt ke nin. Raan tök kamken abi loc ku nyeei ku döñ raan tök. ³⁵ Kälä aya, diäär karou aabi luui ë tök luoiden baai, tieñ tök abi yäth nhial ku nyiëñ tieñ tök piny. ³⁶ Ku abi rot looi kälä aya tènë koc lui dom yic. Raan det abi yäth nhial ku nyiëñ raan det piny.”

³⁷ Go kocken ye buöth thiëc, “Beny, bi ke yäth tenen?” Go Jethu beer, “Te rëer guöp kë cì thou thin, aye cor yenhom mat thin.”

Lëer ku beny luök

18 ¹ Nayon aköl det ke Jethu lëk kocken ye buöth kääñ bi ke piöcc bik dhiel aa röök akölaköl ku cik dhör. ² Ku lueel, “Wätheer beny luök ë tö thin gen tök. Ku ëcie riöcc Nhialic ku ë dhäl koc gup ëbën. ³ Ku tiñ lëer ë tö ë gen kënë aya. Ku ë ye lac ben tènë beny, ku leñ bi luök yic tènë mony luk kek. ⁴⁻⁵ Go beny wetde cii kuëcc nhom. Nawën le tak ke lueel, ‘Na cok alon cii yen ye riöcc ë Nhialic, ku cä koc thek, ke rin ë tiñ kënë ya rääm nhom ë bak, aba tiñ ba dhiel luök yic, na cä loi kälä, ka bi ya cool ë ben ku cut yaguöp.’”

⁶ Ku jol Jethu lek ke, “Pieñkë te ye beny kuc luk jieem thin. ⁷ Cii Nhialic lëu bi luk ñiec looi tènë kocken cì loc, koc ye röök aköl ku weer? Bi ke col ke mec tènë ye? ⁸ Alek we, abi luk ñiec looi tènë ke. Ku na la dhuk, yen Manh Raan, ye koc kadë ba yök ke la gam pinyhom?”

Kääñ raan akut Parathi ku raan ajuër kut

⁹ Ku lueel Jethu kääñ kënë aya tènë koc röt yök ciet kek path kepec, ku dhälkë raan ëbën guöp. ¹⁰ “Koc karou aake cì la luaj Nhialic bik la röök, raan akut Parathi nhiam apeï ku raan ë kut ajuër koc tuöör nyin. ¹¹ Go mony nhiam akut Parathi ben ku keec ku röök ë rot ëlä, ‘Yin aleec Nhialic, yen acii thöñ kek koc kök, koc käk koc kök tuöör nyin, koc ë luui karec ë diäär koc kök koc. Yin aleec rin yen acii thöñ kek raan ajuër kut kënë. ¹² Yen ë thek ba cii mith, arak rou nin kadhorou yiic, ku yin aya juer tök thiäär yic kakkien ya yök luoi yic ëbën.’”

^d17:14 Rin bi koc käk Nhialic ke tiñ lon cì kek pial bik aa rëer ke koc. (Leb 14:1-32)

^e17:32 Tiñ Lot yon cì yenhom wel bi riäj Thodom tiñ, nawën ke yuom abi ciet ñenh awai. (Cäk 19:26)

17:26 Cäk 6:5-8 17:27 Cäk 7:6-24 17:28-29 Cäk 18:20-19:25 17:31 Mt 24:17-18; Mk 13:15-16

17:33 Mt 10:39; 16:25; Mk 8:35; Lk 9:24; Jn 12:25

¹³ “Ku raan ajuer kut aci ben ku keec temec ku cii yenyin ner nhial wen rook yen, ku gut yepuou amaath bi nyuoth lon e yen karec looi ku lueel, ‘Nhialic liec ya, yen e raan la guop adumuom.’ ” ¹⁴ Ku jal Jethu lek ke, “Mony kene, ku acie raan akut Parathi, aci dhuk baai ka adumuomke ci pal piny tene ye. Rin raan nhiam rot yath tuej abi dhuok ciyen, ku raan lir puou rot tou ciyen abi yath tuej.”

Jethu adoc mith

(Mt 19:13-15; Mk 10:13-16)

¹⁵ Koc koc aake mith beei tene Jethu bi ke ben doc. Go koc Jethu buoth ke laät. ¹⁶ Go Jethu mith caal yelom ku lueel, “Calko mith aa bo tene ya, duokke ke pen. Rin raan wic ye bi la baany Nhialic yic adhil gam cimn e mith thiika. ¹⁷ Alek we, raan wic ye bi baany Nhialic yok adhil wet Nhialic gam, cimn ye manh koor wet koc ke dhieth ye gam.”

Raan ajak

(Mt 19:16-30; Mk 10:17-31)

¹⁸ Go raandit koc Itharel Jethu thiic, “Raan pioc path, yenjo ba looi ba pir akolriic ebenn yok?” ¹⁹ Go Jethu lek ye, “Yenjo ye yin ya cool raan path? Acin raan path, ee Nhialic e rot.

²⁰ “Ku na beer wetdu, ke yin anic kak ye loon Nhialic lueel,

‘Duk tin raanda kor, duk raan nak,
duk cuer, duk kuenn wet lueth.

Thek wuur ku moor.’ ”

²¹ Go mony wen beer, “Loonka aaca muk niim ebenn tewaar koor yen agut emn.” ²² Nawen pin Jethu kene, ke lueel tene ye, “Ala lon jot kec e looi. Yaac kakku ebenn ku gam weu tene koc non, yin abi jisek la yok pan Nhialic ku baar buoth ya.” ²³ Nawen pin mony ken e welka, ke men rin e jak apei.

²⁴ Go Jethu tin ke ci puou dak ku lueel, “Abi yic riel tene koc ajisek bik la baany Nhialic yic. ²⁵ Alek we alanden, apuol yic bi throl bak with cok, ten te bi raan ajak la baany Nhialic yic.” ²⁶ Go koc awen pin e welka Jethu thiic, “Na ye keya, yena bi la pan Nhialic?” ²⁷ Go Jethu beer, “Kak ci raan ke leu aaye Nhialic looi.”

²⁸ Go Peter lueel, “Na yook, yok aaci kakkua nyann wei ku buothku yi!” ²⁹ Go Jethu lek ke, “Wek alek yic, raan nyien panden wei, ku tienje ku wamathaken ku koc ke dhieth ye, ayi miethke rin baany Nhialic, ³⁰ abi kajuic yok e riic kene yic, ku pir akolriic ebenn bi ben akolda yic.”

Jethu ajam e Thuonde ken yic diak

(Mt 20:17-19; Mk 10:32-54)

³¹ Nawen ke Jethu cool kocken ye buoth kathiiaar ku rou teden rot ku lek ke, “Emn yok aa la Jeruthalem, te bi kawaar ci koc kak Nhialic tin got rin Manh Raan kenhiim la tien thin. ³² Abi la thon koc cie koc Itharel bik bui ku letke, ku nuutke nyin, ³³ ku abik that ku nakke, ku na ye akol ye nin diak, ke yeen abi pir ku jot rot ran yic.” ³⁴ Ku koc ye buoth aake kec kakka deet yiic. Wetde yic aci thiaan tene ke, ku keek aaci ken jiseem Jethu kuc.

Jethu aci cor kony bi daai

³⁵ Nawen dotke Jeriko, ke mony ci cor e reer dhel you ke lim. ³⁶ Nawen pin koc cath rot, ke thiic, “Yenjo loi rot?” ³⁷ Go lek ye lon e Jethu raan Nadharet yen atek dhel yic. ³⁸ Go coot, “Jethu, wen Debit liec ya.”

³⁹ Go koc ke to tuej laät ku lekke ye bi biet. Go jot kiu apei, “Wen Debit kony ya.”

⁴⁰ Go Jethu koc ku lek koc bik mony kene thel tene ye. Nawen ci yent tethok, ke thiic Jethu, ⁴¹ “Yenjo wic ba looi tene yi?” Go beer, “Beny awiec ba ben daai.” ⁴² Go Jethu lek ye, “Daai! Gamdu aci kony.”

⁴³ Go guo daai nyin yic, ku buoth Jethu ke lec Nhialic. Nawen tin koc juic ke to thin ke ci rot looi, ke lec Nhialic ebenn.

Jethu ku Dhäkeo

19 ¹ Nawen ci Jethu yet Jeriko ku ber yic. ² Ke raan ajak col Dhäkeo e to thin ke ye raandit kam koc ajuer kut, ³ ku yeen e wic bi Jethu tin ku e kiek apei. Go cien te tin yen Jethu rin koc aake juic. ⁴ Go rin tuej ku ler naap nom, nam bi Jethu teek yecok. ⁵ Nawen yent Jethu nam awen cok ke tin Dhäkeo nhial, go cool ku lueel, “Dhäkeo, loc ben piny, yakol yen abi cool paandu.”

⁶ Go Dhäkeo ben piny ku lor Jethu ke cī puōu miet apeī. ⁷ Nawēn tiŋ kōc ke tō thīn ē kēnē, ke la ŋoomŋoom ku luelkē, “Mony kēnē aci la cool pan raan rac.” ⁸ Go Dhäkeo welken cīi kuēēc nīim ku jot rot ku lēk Bānyda, “Beny, ēmēn thiin ŋen abā abek ē wēukie yiēk kōc ŋōŋ, ku na ca kēn raandā cam ruēēny, ka ba dhuk arak ŋuan.”

⁹ Go Jethu lek Dhäkeo, “Yakōl, yīn ku kacku wek aaci pīr akōlriēēc ēbēn yōk, rin yīn aya yīn ē manh Abaram, ¹⁰ rin Manh Raan aci ben bī kōc cī mār wīc, ku kony ke.”

Kāāŋ aloony kathiāār

¹¹ Tewēn piŋ kōc ē wēlkā, ke Jethu thōth kāāŋ rin ēcī thiōk ke Jeruthalem. Ku ē yekē tak lōn bī bāāny Nhialic rot guō la jōok thīn. ¹² Ku jōl lueel, “Monytui, ke ye raan gōl beny, ēcī la wun det mec apeī bī la ruōk bī ya benyŋaknhom. Ku jōl dhuk wuōnden. ¹³ Ku wēn kēc yen guō jāl, ke cōl aluōonyke kathiāār, ku ye ŋek gām wēū ku lēk ke, ‘Lōkkē luui ē wēūkā ŋet akōl bī ŋen dhuk.’ ¹⁴ Ku yeen ē mēen kōcken mec, gōkē kōc tuōoc yecōk bīk la lueel, ‘Mony kēnē acuk wīc bī ya benyŋaknhom.’

¹⁵ “Cōk awēn cīi kacke ye wīc ka ŋot cī ya benyŋaknhom, ku dhuk ku cōl aloonyken wār cī gām wēū, bī ben ŋic ye wēū kadē cī raan tōk ya juak wēū wār cī yiēk ye yiic. ¹⁶ Go alony tueŋ ben ku lueel, ‘Beny, wēū wār ca gām ŋa, ŋen aci wēū juēc tēnē ke arak thiāār yōk thīn.’ ¹⁷ Go beny lek ye, ‘Aca ŋiec looi, yīn alony path, ku rin cī yīn kālīk ŋiec muk apath, yīn abī ya beny geeth kathiāār.’ ¹⁸ Go alony ye kek rou ben ku lueel, ‘Beny, ŋen aci wēū juēc arak dhiēc yōk ten wēū wār ca gām ŋa.’ ¹⁹ Go beny lek alony kēnē aya, ‘Yīn abī ya beny geeth kadhiēc.’

²⁰ “Ku ben alony det ben ku lueel, ‘Beny, wēēnkun wār aa kik. Aake ca der yiic alanhthiin ye kōc kenyīn wuuny ku tāāu ke. ²¹ ŋen ŋa cī riōōc yī, rin ye yīn raan cie kēdu puōl. Yīn ē kē cie kēdu lōom, ku yīn ē tem rap kec ē puur.’ ²² Go beny lek ye, ‘Yīn alony rac, dak rot. Wēlkun ca lueel kek aabī luōk wei. Aŋic lōn ye ŋen kē cie kēdie lōom, ku ŋen ē rap tem rap kec puur. ²³ Yeŋō kēc yīn wēukie gām kōc ŋic luui wēū rin na la dhuk akōldā ke yōk ke cī keyiic juak?’ ”

²⁴ “Ku yōōk beny kōc wēn kāāc thīn, ‘Nyaaikē wēū tēnē ye ku gamkē ke tēnē raan la wēū juēc.’ ²⁵ Gōkē lek ye, ‘Beny yeen ala wēū juēc apeī.’ ²⁶ Go beny lek ke, ‘Raan la kāŋ abī gām kājuēc kōk, ku raan cīn kāŋ, abī kēthiin tō tēnē ye nyaaī aya. ²⁷ Ku kōc man ŋen kā, kōc cīi ŋen wīc ba ya bānyden, beeikē ke ŋanhom ten ku nākkē ke ŋa daai ē ke.’ ”

Jethu aci la Jeruthalem ke ciēm yai

(Mt 21:1-11; Mk 11:1-11; Jn 12:12-19)

²⁸ Wēn cī Jethu kākkā lueel, ke jiēl bī la Jeruthalem ke wat atuōōcke nīim. ²⁹ Tewēn cī kek thiōk ke Bethpeec ku Bethanī, tēthiāāk kek gōn Olip, ke tooc kōc ye buōoth karou tueŋ ³⁰ ku lēk ke, “Lak beeī tō tueŋ yiic. Tē ŋeet wek, wek aabī manh akaja cīn raan cī kaŋ cath ye yōk ke mac. Luōnykē ku beeikē ten. ³¹ Na le raan thiēc we, yeŋō lony wek ye? Ke lēkkē ye, awīc Bānyda.” ³² Gōkē la ku yōkkē manh akaja cīt tewēn cī Jethu ke than thīn. ³³ Tewēn lony kek manh akaja, ke lēk raan la akaja ke, “Yeŋō lony wek manh akaja?” ³⁴ Gōkē beer, “Awīc Bānyda.”

³⁵ Gōkē manh akaja ŋāth tēnē Jethu ku kumkē kōu alāthken, ku nyuc Jethu yekōu. ³⁶ Tewēn lōōny yen dhōl, ke kōc juēc thieth alāthken dhēl yic. ³⁷ Ku wēn lōor yen piny gōn Olip nhom, go kōcken ye buōoth puōth miet ēbēn, ku leckē Nhialic rin kājuēcdīt jāŋ gōi cīk tiŋ ku wekkē apeī ēlā,

³⁸ “Bī Nhialic benyŋaknhom cī ben rin Bānyda dōoc.

Dōōr pan nhial ku lec tēnē Nhialic.”

³⁹ Go kōc akut Parathī kōk ke tō kōc yiic lueel tēnē Jethu, “Beny cōl kōckun yī buōoth aa bit.” ⁴⁰ Go Jethu beer, “Alek we, na cōk kē biet, ka aleel ē rōt, aa loi wuōou.”

⁴¹ Nawēn lek Jeruthalem dōōt, ke dhiau wēn tiŋ yen geu nhom, ⁴² ku lueel, “Dōōr akōlriēēc ēbēn ēcī we dōōt kōc Jeruthalem, ku wek aaci jai ē ye. Ku ēmēn acāk bī ben tiŋ. ⁴³ Ala akōl bī kōc aterdun ben ku golkē we abī cien teŋōr bakkē. ⁴⁴ Aabī we nōk ēbēn agut mīth reer ke we. Ku gen Jeruthalem abī thuōr piny ēbēn, abī cien alel kāāc alel det nhom, rin kēc wek akōl cī Nhialic ben bī we kony ŋic.”

Jethu aci la luaŋ Nhialic

(Mt 21:12-17; Mk 11:15-19; Jn 2:13-22)

⁴⁵ Nawën lek yet Jeruthalem ke Jethu la luaŋ Nhialic. Ku cop kœc kãŋ yaac ayeer kal luaŋ Nhialic yic.
⁴⁶ Ku lœk ke, “Acĩ gœt athœr theer wœl Nhialic yic lœn cĩ Nhialic ye lueel œlã, ‘Luaŋdie aci looi bĩ ya ten ye kœc œbœn rœœk thĩn.’ Ku yeen acãk wel bĩ ya luaŋ cuer.”

⁴⁷ Ku jœl a piœœc luaŋ Nhialic akœlakœl. Go kœc kãk Nhialic ku kœc get lœœŋ ku kœcdit baai wĩc bĩk nœk.
⁴⁸ Ku acĩn dhœl cĩk lœu bĩk yœk bĩ kek ye looi, rin ye kœc œbœn rœœr yelœœm ke piŋ welke, ku wĩckœ bĩ cien tœŋ cĩk piŋ.

Bãny Itharel aa riel Jethu yœœŋ yic

(Mt 23:27; Mk 4:27-33)

20 ¹ Naŋœn akãl tœk, tewœn piœœc Jethu kœc œ Wet Puœth Yam luaŋ Nhialic, ke benydit kãk Nhialic, ku kœc gãt lœœŋ ku kœcdit baai bœ tœnœ ye. ² Ku thiœckœ, “Ee yĩn, lek ŋo ye riel ŋœ tœ yĩguœp ye yĩn luui kœlã? Ku yeŋa yĩk yĩ œ riel kœnœ?”

³ Go Jethu beer tœnœ ke, “Wek aba thiœœc aya, lekkœ ya, ⁴ riel ye Joon kœc gãm lœkwœi yœk tœnœ Nhialic aye rielde œ rot?” ⁵ Gokœ kaŋ guœœk yic kamken œ rœt ku luelkœ, “Na luelku ka yœk tœnœ Nhialic, ka lueel œlã, yeŋœ kœc wek wetde gam? ⁶ Ku na luelku ke rielde œ rot, ke ŋok aa nãk, rin cĩ raan œbœn ye gam lœn Joon œ ye raan kãk Nhialic tiŋ.” ⁷ Gokœ dhuœk Jethu, “Yœk aa kuc te yœk yen rielde thĩn.”

⁸ Go Jethu lek ke, “Na ye kœya, ke wek aacã lœk riel ye ŋen kãkkã looi.”

Jethu ajam œ waal bĩ rœœc bãny nyuœœth

(Mt 21:33-46; Mk 12:1-12)

⁹ Ku ben Jethu jam œ waal tœnœ kœc ku lueel, “Monytui œcĩ dom looi ku cum yic tiim œ luœk, ku riœp yic kœc kœk. Ku keny wun det, ku le pei juœc nœk wei. ¹⁰ Nawën le te cĩ tiim luœk thœœŋ, ke tooc aluœnyde tœnœ kœc wãar cĩ riœp dom yic bĩk la gãm abãkke. Gokœ alony dœm ku thatkœ ku copkœ ciœœn yecin. ¹¹ Go alony det ben tooc, gokœ ben dœm ku thatkœ ku baŋkœ apei. Ku toockœ ciœœn ke cĩn kœ cĩk gãm ye. ¹² Go alony det ye kek diãk ben tooc, gokœ yiœk tetœk aya ku copkœ wei. ¹³ Go wun dom lueel, ‘Yeŋœ ba looi? Yen abi manhdiœn nhiaar tooc, tedœ ka bĩk la theek.’ ¹⁴ Nawën tiŋ kœc cĩ riœp dom yic manhde, ke luelkœ, ‘Kœnœ œ manh raan yen la dom, ku œ yen abi kãŋ lœk thœn akœldã. Bãk nãkku ku kãkkã aabi dœŋ ke ŋo.’ ¹⁵ Ku thelkœ ayeer dom yic ku nãkkœ.” Ku jœl Jethu ke thiœœc, “Yeŋœ bĩ raan la dom looi tœnœ ke?” ¹⁶ “Abĩ ben ku nek kœc awœn cĩ riœp dom yic, ku riœp dom yic kœc kœk.” Nawën piŋkœ œ wet kœnœ ke luelkœ, “Diet cĩi rot loi!”

¹⁷ Go Jethu ke dœt apei ku thiœœc ke, “Yeŋœ ye wet kœnœ cĩ gœt kœlã theer teet yic, ‘Mœn wãar yen cĩ atœœt kuec, yen aci ben a mœn ril.’ ”

¹⁸ Ku lœk Jethu ke, “Na deeny raan yecœk mœn ka duœœny bĩ ruœth. Ku na wĩk raan nhom ka niœœn yic.”

Jethu awĩc bĩ wœœŋ wet ajuœr

(Mt 22:15-22; Mk 12:13-17)

¹⁹ Go kœc piœœc lœœŋ ku bãny kãk Nhialic wĩc bĩk Jethu dœm nyin yic, rin cĩ kek ye ŋic lœn aa kek ke jiœœm Jethu gup œ waal. Ku keek aaci riœœc kœc awœn tœ thĩn. ²⁰ Gokœ kœc kœk riœp thook bĩk rœt looi ciet ke ye kœc path tœnœ Jethu, bĩk aa la thiœœc bĩk deep rin na le wet rœœc lueel, ke dœmkœ ku yethkœ tœnœ bãnydit mac baai. ²¹ Ku bĩk tœnœ Jethu ku thiœckœ œlã, “Raan piœœc, aŋicku lœn wet ye lueel ku kœ ye piœœc ee yic. Yĩn acie dit raan ye kueœc nhom. Ku yĩn œ kœc piœœc bĩk kœ wĩc Nhialic looi dhœl la cœk. ²² Lek ŋo, na ye tãktãkdu buk ajuœr dhiel aa gam, ŋok kœc Itharel tœnœ benyŋaknhom Cither kua cuk bĩ gãm ye.”

²³ Ku Jethu œcĩ ruœenyden ŋic, ku bœœr, ²⁴ “Nyũthkœ ŋa wœœu, ku thiœœc ke, ye nhom ŋa ku ye rin ŋa kãkkã cĩ gieet œ wœœth kœu?” Gokœ beer, “Aa kãk Cither benyŋaknhom.”

²⁵ Go Jethu lek ke, “Na ŋieckœ kœya, gãmkœ Cither benyŋaknhom kœde ku gãmkœ Nhialic kœde.”

²⁶ Ku acĩn wet rœœc cĩ Jethu lueel kœc nhĩim lœu bĩ ya awuœc bĩ kek ye dœm. Ku wet cĩ lueel œcĩ ke gœi ku bitkœ.

Nhialic abī kōc cī thou cōl aa ben pīr

(Mt 22:23-33; Mk 12:18-27)

²⁷ Go kōc kōk akut Thaduthī. Akut cīi yeen ye gam lōn bī Nhialic kōc cī thou ben cōl apīr, ben tēnē Jethu ku thiēckē ēlā, ²⁸ “Raam piōoc, Mothith acī lōŋ gōt ēlā tēnē yo, ‘Na thou wāmēnh ē raan ku nyiēēŋ tik piny ke cīn mīth, ke wāmēnh koor ala yōt tik bī mīth dhiēēth yōn menhē.’ ²⁹ Na thōōŋku lōn tō mīth tik thīn kadhorou, ku thiēk wēn dīt, ku thou ke cīn mīth. ³⁰ Go wāmēnh buōth ye la yōt tik, ku thou aya ke cīn mīth cī dhiēēth. ³¹ Ku looi rot kēya tēnē menhē ye kek diāk. Ku kēya tēnē ke ēbēn kadhorou, aacī thou ke cīn mīth cīk nyāāŋ piny. ³² Nawēn ke tik thou aya. ³³ Ku lek tueŋ ku thiēckē, tē le kōc cī thou rōt jōt akōldā, bī ya tiŋ ŋa, rin cī yen rēer ke ke ēbēn kadhorou?”

³⁴ Go Jethu bēer, “Thiēŋ ye kōc rōt thiaak ē kēn pinyhom ten. ³⁵ Ku kōc path bī rōt jōt thou yic, kōc ye pan Nhialic kēden, aacie thiēek ku aacie ē thiaak, ³⁶ ku aaci bī ben thou rin aa thōŋ kek atuuc Nhialic. Ku aa mīth Nhialic rin cī kek rōt jōt thou yic. ³⁷ Ku Mothith guōp ē jam lōn ye kōc cī thou ben pīr, wāar get yen te cī Nhialic rot nyuōth ye ē bun dēp yic, ku jiēm rin Beny ēlā, ‘Ee Nhialic Abaram, ee Nhialic Ithāk ku ee Nhialic Jakop.’ ³⁸ Wetde yic ē lōn ye yen Nhialic ē kōc pīr, ku acie Nhialic kōc cī thou, rin kōc ēbēn aa pīr tēnē ye.” ³⁹ Go kōc piōoc lōōŋ ke kāac thīn jam ku luelkē, “Aca ŋiec dhuk nom raan piōoc.” ⁴⁰ Ku thōk jamden rin ē cīk wīc bīk ben thiēec.

Jethu acī kōc piōoc lōn yen raan ē tooc Nhialic

(Mt 22:41-46; Mk 12:35-37)

⁴¹ Ku lueel Jethu tēnē ke, “Yeŋō ē ye lueel lōn raan cī lōc ku dōc ya raan dhiēnh Debit? ⁴² Rin aye Debit guōp luel athōr waak yic ēlā,

‘Acī Nhialic lueel tēnē Bānydie, “Nyuc ē ten kōŋdien cuēc,

⁴³ yet tē bī yen kōc aterdu dhuōk ciēēn yīcōk.” ’

⁴⁴ “Ye kēdē ye yen manh Debit, ku yeen aye Debit cōl, ‘Bānydie?’ ”

Jethu alēk kōc bik rōt tiit kōc gāt lōōŋ Itharel

(Mt 23:1-36; Mk 12:38-40)

⁴⁵ Tēwēn piŋ kōc ēbēn wetde, ke Jethu wēl yenhom kōcken ye buōth ku lueel, ⁴⁶ “Tietkē rōt ku duōkkē kōc piōoc lōōŋ Itharel ye kieet. Kōc cath kek alethken dīt bār, rōt teem yōn yōc yiic bī ke aa muōth atheek. Ayekē nhiaar bik nyuc tueŋ thōc kōcdīt ten amat, ku yōn path akōl yai. ⁴⁷ Ku keek aa kāk lēer tuōōr nyīn, ku rōōkkē apeī bik kōc wēŋ lōn puōth kek. Kōckā aabī tem awuōc ril apeī.”

Ajuēr lēer

(Mk 12:41-44)

21 ¹ Kaam wēn ke Jethu cī nyuc tē ye wēū juaar thīn luaŋ Nhialic, ku dōt kōc wēū cuat kēn ajuēr yic. Ke kōc juēc ajieek aake cī wēū aa tāū thīn.

² Nawēn ke tiŋ lēer aŋāŋ bō ku cuet wēū reen lik thīn aya. ³ Go Jethu lueel, “Wek alek yic, lēer kēnē acī Nhialic kēden cī juaar nhiaar tēnē kōc kōk ēbēn. ⁴ Rin aa cīk juaar wēūken juēc yiic, ku yen aŋāŋē, acī kēn bī yen pīr dhuōl thīn ēbēn.”

Luaŋ Nhialic Jeruthalem abī thuōr piny

(Mt 24:1-2; Mk 13:1-2)

⁵ Tēwēn jiēl kek luaŋ Nhialic, ka atuuc kōk jam tē dhēēŋ luaŋ Nhialic thīn ku aleel peth cī ye buth, ku kādhēŋ cī gām Nhialic bī ye door. Go Jethu bēer, ⁶ “Kākkih yakē tiŋ ēmēn, ala akōl bī ke thuōr piny ēbēn, ka cīn alēl tōŋ bī kōōc alēl det nom.”

Acī Jethu lek atuōōcke lōn bī ke maan

(Mt 24:3-14; Mk 13:3-13)

⁷ Go kē thiēec, “Raam piōoc, ye nen bī kēnē rot looi, ku yeŋō bī ye nyuōth lōn tē bī kēnē rot looi acī thiōk?”

⁸ Go Jethu lek ke, “Tiëerkë nhïim ku duökkë röt cöl aduöŋ. Rin kəc juëc aabi ben ë rienkie ku ye ɲek lueel, ‘Ke ɲen raan cï ləc ku dəc, aköl bi ɲen ben akïn.’ Duökkë ke buoŋh. ⁹ Ku duökkë riöc aköldä te tiŋ wek tɔŋ, ku aliäap baai ke loi röt. Käkkä abi röt kaŋ dhiel looi tueŋ, ku acie lɔn cïi thök piny guo thiök.”

¹⁰ Ku ben Jethu lueel ëlä tënë ke, “Wuöt aabi kenhïim tuööm ku therkë, ku bæei mec bánydit abi thör kamken. ¹¹ Ayieekyieek piny dīt juëc aabi röt looi, ku tuaany ku cɔŋdīt apei aabi röt looi ɲɔn juëc yiic. Ku käreec kök aabi röt looi, ku kädīt kəc cöl ariöc aabi tiŋ nhial. ¹² Ku tueŋ bi käkkä röt looi, wek aabi gum apei, ku wek aabi ɲäth ten amat ku mec we. Ku wek aabi ɲäth luk yic bány nhïim ë rienkie. ¹³ Ku ë yen ten bi wek kəc ëbën lek Wet Puoŋh Yam thïn. ¹⁴ Ku duökkë dieer te bi wek röt kuony thïn, ¹⁵ rin wek aba kony ba we cöl aŋic wël puoŋh bäk lueel, käk cïi kəc aterdun we bi jööny, tedë ke dhäl käkkun yakë lueel. ¹⁶ Wek aabi kəc ke dhiëth we, ku wämäthakun, ku kəc ruäai ke we ku mäthkun gaany. Ku kəc kök kamkun aabi nöc. ¹⁷ Ku raan ëbën abi we maan ë rienkie, ¹⁸ Ku wek aabi kony na cök a nhiëm tɔŋ nom ka cïi bi mää. ¹⁹ Deet bi wek wepuöth deet abi we cöl apir.

Jethu ajam wet riäŋ Jeruthalem

(Mt 24:15-21; Mk 13:14-19)

²⁰ “Aköl tiŋ wek Jeruthalem ke cï apuruuk wuöt kök gool, ke ɲieckë lɔn te bi ye rac aci ben. ²¹ Ke kəc reer Judia aa dhil riŋ gat nhïim, ku kəc reer geeu Jeruthalem aa dhil jäl, ku kəc tɔ bæei yiic ayeer aaci la geeu. ²² Rin tenë, kek aa nin bi kəc tem awuöc bi kë cï göt athör theer wël Nhialic yic yenhom tieŋ. ²³ Diäar liec ku diäar muk miŋh kor aabi gum apeidīt ë ninkä. Kəc ë wunë, aabi gum apei ku aabi Nhialic tem awuöc. ²⁴ Kəc kök aabi nöc tɔŋ yic, ku kəc kök aabi dɔm ku la ke mac wuöt kök yiic. Ku Jeruthalem abi wuöt kök dɔm ku rækë apei, ku mackë ɲet aköl bi bäanyden thök.

Aköl bi Manh Raan ben

(Mt 24:29-31; Mk 13:24-27)

²⁵ “Käk këc kaŋ tiŋ aabi röt looi tënë aköl ku peei ku kuel. Ku kəc wuöt pinynhom ëbën aabi puöth jieth, ku riöckë atiaktiak dīt loi rot wër yiic. ²⁶ Ku kəc aabi riöc apei rin käk loi röt pinynhom. Käk tɔ nhial ëbën, aköl ku peei ku kuel aabi röt yääk. ²⁷ Ku Manh Raan abi tiŋ ke bö nhial pial yiic kek diik ku riöldīt apei. ²⁸ Te looi käkkä röt, ke we deet wepuöth ku reerkë ë cök rin te bi we luök käreec yiic aci ɲëët.”

²⁹⁻³⁰ Ku ben Jethu ke lek kääŋ kënë, “Te tiŋ wek tim cīt ɲaap ayi tiim kök ke loi ɲith yam, ka ɲieckë lɔn cïi kër thiök. ³¹ Këya, na tieŋkë käkkä ke loi röt, ke ɲieckë lɔn cïi bäany Nhialic thiök. ³² Alek we, wek aaci bi mää te cök käkkä röt looi. ³³ Nhial ku piny aabi liu, ku wetdie aaci bi kaŋ mää.

Reerkë we cï röt guir

³⁴ “Guierkë röt, ku reerkë we tir nhïim. Duökkë aköl bi ɲen ben cöl ayök we ke we këc röt guir. Duökkë röt cöl ayök we pïr pïr rac, bäk aa rëer we cï wiet ë möu akölaköl, ku yakë rëer we tek käk pïr pinynhom. Aköl kënë abi la ciel wegup ke cäk ɲic, ³⁵ cimën län adhie wei adëep. Ku kënë abi ben tënë kuat raan pïr pinynhom ëbën. ³⁶ Reerkë we tit ku röckë akölaköl bäk la riel bi wek kë bi rot looi göök, bäk köc ɲanhom ɲen Manh Raan we cïi dieer.”

³⁷ Ku jöl Jethu ë ninkä nöc ke ye piöc luäŋ Nhialic, na bö thei ke jiël bi la nin gɔn Olip nom. ³⁸ Ku kəc aake ye guëer luäŋ Nhialic rial bik piöcde ben piŋ.

Amat nek Jethu

(Mt 26:1-5; Mk 14:1-2; Jn 11:45-53)

22 ¹ Nawën la te bi Yan Ayum cïn yic luou looi thiök. ² Ke kɔc dīt käk Nhialic ku kəc piöc lööŋ wic dhël path bi kek Jethu nöc, rin riöc kek ciet la aliäm bi rot looi.

³ Ku raan tök kam kəc ye buoŋh kathiäar ku rou cöl Juda Ithkariöt, ëcï beny jɔŋrac la yepuö. ⁴ Go la tënë kɔc dīt käk Nhialic ku bány apuruuk luäŋ Nhialic tiit, bi te bi ɲen ke kuony thïn, bik Jethu dɔm la guëek yic. ⁵ Gökë puöth miet wën piŋ kek ye lɔn bi ɲen ke kony, ku thonkë lɔn bi kek ye riöp. ⁶ Go gam, ku wic tepeth bi ɲen Jethu dɔm thïn ke cïn kəc ɲic ye.

Jethu aci mieth thëi cï guir rin yai cam

(Mt 26:17-25; Mk 12:21; Jn 13:21-30)

⁷ Aköl bi Yan Ayum cïn yic luou looi ëcï ben, aköl ye amel nök rin yai. ⁸ Go Jethu Piter ku Joon tooc ku lëk ke, “Lak bäk mieth yai la guir tënë yo.”

⁹ Gokë thiëc, “Ye tenen wïc yïn yo buk mieth yai la guir thïn?”

¹⁰ Go Jethu beer, “Te le wek geeu Jeruthalem, ke wek aabi röm kek mony yëec töny ë piu. Biaathkë pan le yen thïn. ¹¹ Ku lekkë raan la baai, aye Raan piöoc lueel, ‘Ye yön nen bi yen mieth yai cam thïn yok kockien ya buoath?’ ¹² Ku abi we nyuöth yön nhial lääu yic cï guir yic. Guierkë mieth ë teen.”

¹³ Gokë la ku yökkë këriëc ëbën cït tewën cï Jethu ye lek ke thïn. Ku jolkë mieth yai guir.

Guirku röt apath buk guöp Beny röm

(Mt 26:26-30; Mk 14:22-26; 1Kor 11:23-25)

¹⁴ Tewën bi kek jäl mïth ke Jethu nyuc tede ku nyuc atuöocke aya, ¹⁵ ku lëk ke, “Aca wïc apeï ba mieth Yan Ayum cïn yic luou kënë cam kek we ku ba jäl gum. ¹⁶ Alek we lön acä bi ben cam yet te bi wet tō yeyic yok bääny Nhialic yic.”

¹⁷ Ku lööm aduñ cï thiän muön abiëc, ku leec Nhialic ku lueel, “Lömkë kënë ku tekkë ë kamkun. ¹⁸ Alek we lön yen acïn muön abiëc det ba ben dek yet aköl bi bääny Nhialic ben.”

¹⁹ Nawën ke löm ayup ku leec Nhialic, ku beny yic ku gem ke ku lueel, “Kënë ë guäpdie cï juaar rienkun. Yakë looi këlä bäk ya ya tak.” ²⁰ Nawën mieth cök ke ben aduñ la yic muön abiëc lööm aya ku lueel, “Kënë ë döör yam ke Nhialic cï thany ë riemdie bi kuër ë rienkun.”

²¹ “Ku yen kïn, raan bä luom areer ten, ku amïth kek ya! ²² Ku ë tede, Manh Raan adhil thou cït te cï Nhialic guier ye. Ku raan bä luom abi gum apeï!”

²³ Gokë röt thiëc tök, tök, yeña kamkua lëu bi ya yen loi kënë.

Atuuc aaci wet teer raan dit kamken

²⁴ Kaam wën aya ke koc ye buoath teer wet lön nadë, “Yeña kamken yen bi ya raan dit apeï.” ²⁵ Go Jethu lek ke, “Pinyhom ten bäny koc cie koc Itharel aa la riel tënë kocken meckë, ku koc mac baai aa röt cöl, ‘Koc määh ke koc baai.’ ²⁶ Ku acie tede tënë we, rin raandit kamkun adhil rot dhuök piny bi ciet raan koor. Ku raan tō tueñ adhil rot dhuök ciëen bi luui tënë koc kök.” ²⁷ Ku thiëc ke, “Yeña yen dit, ye raan ye luöïi aye raan ë luui? Cie raan ye luöïi? Ku yen kamkun yen acit raan ë luui.

²⁸ “Wek aaci köoc ke ya käril cä yok yiic, ²⁹ ku cït mënë cï Wä ya looi ba ya beny, wek aba yiëk ë bääny kënë aya. ³⁰ Wek aabi mïth ku dekkë kek ya bäänydie yic, ku nyuöockë thöc nhïim bäk luñ thän Itharel yic thiäär ku rou looi.”

Jethu aci kë bi Piter ye jai lueel

(Mt 26:31-35; Mk 14:27-31; Jn 13:36-38)

³¹ Ku ben Jethu lueel, “Thaimon, Thaimon piñ wetdienë, beny jakrec aci thiëc bi gäm riel bi we them ëbën, bi koc path tek thook tënë koc rec, cimën dhie ye rap kööm bi miël tek thok rap yiic. ³² Ku yen aci rök rienku yïn Thaimon bi gamdu dhiel riel. Ku na ca jal dhuk tënë ya, ke yï kony wämäthakui kök.”

³³ Go Piter beer, “Beny acïn kë bä gël bi ya cïi mec kek yï, ku thuou kek yï aya.”

³⁴ Go Jethu lueel tënë ye, “Alek yï Piter, nhiäk beek piny ke thon ajith këc kiu, yïn abä jai arak diäk lön kuc yïn ya.”

³⁵ Nawën ke Jethu thiëc kocken ye buoath, “Te tooc yen we bäk Wet Puoth Yam la lek koc, ku wek acïn wëu ku jökgö la keny ayï war, yakë yok lön le yen kë liu tënë we?” Gokë beer, “Acïn këdäj.” ³⁶ Go Jethu lueel, “Ëmën, na la raan wëu ke muk ke, ku muk jökgö aya. Ku na yïn acïn pal, ke yï yoc aleth abek wei ku yoc. ³⁷ Luökë ë kënë rin aye wël cï göt theer ë rienkie lueel, lön ye yen raan tök kam koc kërec looi. Ku wet kënë abi yenhom tieñ ëmën.”

³⁸ Go koc ye buoath lueel, “Beny, paal karou aa kik.” Go beer, “Aa juëc.”

Jethu aröök ke ñic lön bi ye nöök

(Mt 26:36-46; Mk 14:32-42)

³⁹ Nawën ke Jethu jiël ku ruec kocken ye buoöth, ku ler gön Olip nom cimenden yen ye looi akölaköl. ⁴⁰ Nawën lek yet teden adhie, ke lëk ke, “Röökkë Nhialic bi we ciï them jakrec.”

⁴¹ Ku nyiëëñke piny ku le tueñ tethin-nyoot, ku gut yenhiol piny ku röök, ⁴² ku lueel, “Wä, na lëu rot ke këreec tit ya aciï bö. Ku acie wetdie ë wetdu.” ⁴³ Go atuny nhial rot nyuöth ye ku deet puöu, ⁴⁴ rin ë dhiau apeï yepuöu. Ku ben röök apeï abi tuc kuër yeguöp cimën riem.

⁴⁵ Ku jot rot tewën röök yen thïn ku dhuk tënë kóc ye buoöth, ku yök ke ke nin rin ci riääk ë puöu ke cöl agök. ⁴⁶ Go lueel tënë ke, “Yeñö niin wek? Jatkë röt ku röökkë bi we ciï them jakrec.”

Jethu aci döm

(Mt 26:47-56; Mk 14:43-50; Jn 18:3-11)

⁴⁷ Jethu ë ñot jam tewën biï kóc juëc ke wet Juda nhïim, raan tök kam kóc ye buoöth kathiäär ku rou. Ku ler tënë Jethu ku muööth ke ciim. ⁴⁸ Go Jethu lueel, “Juda ca ya ciim ba Manh Raan nyuöth kóc döm ye?”

⁴⁹ Nawën tiñ kóc ye buoöth ke rëer kek ye kë bi rot looi, ke luelkë, “Beny, cuk thär? Yok aa muk paalkua.” ⁵⁰ Go raan tök kamken palde miëët bei, ku tök alony lui pan raandit käk Nhialic ku teem yinyden cuëc wei. ⁵¹ Go Jethu lueel, “Acie këya.” Ku goot mony awën yic tewën ci tök pal, ku kony bi dem.

⁵² Ku jol Jethu jam tënë raandit käk Nhialic ku bäny apuruuk luñ Nhialic tiit, ku kœdît baai ci ben bik ye döm, ku lueel, “Cäk ben we muk paal ku atuel ciet ya ye raan kóc rum? ⁵³ Yen ë rëer kek we luñ Nhialic akölaköl, ku akeckë kañ them bäk ya döm. Ku ëmën wek aaci puöl bäk kë tö wepuöth looi. Ku tenë jöñrac abi la riel bi këreec wic looi.”

Piter ajei Jethu

(Mt 26:57-58, 69-75; Mk 14:53-54, 66-72; Jn 18:12-18, 25-27)

⁵⁴ Gokë Jethu döm ku yethkë pan raandit käk Nhialic. Ku Piter ë biöth ke mec kóc cök ciëen. ⁵⁵ Ku apuruuk aake ci many yöckë took kal yic. Go Piter rot mät ke ku nyuuc bi yöc. ⁵⁶ Nawën tiñ nyan lui pan beny Piter ke nyuc mac lööm, ke döt apeï ku lueel, “Mony këne ë ye rëer kek Jethu aya.”

⁵⁷ Go Piter jai ku lueel, “Mony këne acä cok ñic yin nyenë!” ⁵⁸ Ku kaam thiin awën ke mony det tiñ Piter ku lueel, “Yin ë raanden aya.” Go Piter beer, “Acie yen mäthdie.”

⁵⁹ Ku kaam awën, ke wet yen raan Jethu, ben mony det muök yeguöp apeï ku lueel, “Acin diu lön ye mony këne rëer kek Jethu, rin ë raan Galilia.”

⁶⁰ Go Piter beer! “Mäthdie, kë ye lueel acä cak deet yic.” Ku kaam wën ñot jieem yen ke thon ajith kiu. ⁶¹ Go Jethu yenhom wel ku döt Piter. Go Piter këwäär ci Beny Jethu lek ye ëlä, “Tueñ ke thon ajith këc kiu ya aköl, aba lueel arak diäk lön kuc yin ya.” ⁶² Ku ler ayeer ke ci guöp yär ku dhieeu apeï.

Jethu aci bui ku that

(Mt 26:67-68; Mk 14:65)

⁶³ Ten awën ke kóc ke tit Jethu, ee yekë bui ku thatkë, ⁶⁴ ku derkë nyin ku guutkë kecin ku yöökkë, “Meekë! Yeña yi gut?” ⁶⁵ Ku lueelkë kërec apeï yeguöp.

Jethu aci yäth luñ bäny Itharel yic

(Mt 26:59-66; Mk 14:55-64; Jn 18:19-24)

⁶⁶ Nawën bak piny, ke kœdît Itharel ku kœdît käk Nhialic, ku kóc piöoc löön mat kenhïim. Ku biï Jethu luöñden yic. ⁶⁷ Ku lëkkë ye, “Na ye Raan ci löc ku döc, ke lek yo.” Go Jethu beer, “Na lek we ke wek aaci wetdie bi gam, ⁶⁸ ku na thiëec we, ka cäk bi beer. ⁶⁹ Ku ëmën ler tueñ, Manh Raan abi nyuc löñ cuëc Nhialic Madhol.”

⁷⁰ Gokë rek yic ëbën, “Na ye këya, ye Wën Nhialic?” Go Jethu beer, “Ee yen, cit te cäk luel ye.” ⁷¹ Gokë lueel, “Acin det wicku kóc kök bi ben jam käk ci looi. Yok aaci wël ci lueel ë thuöñde piñ.”

Koc Itharel aaci Jethu gaany tēnē Pilato

(Mt 27:1-2, 11-14; Mk 15:1-5; Jn 18:28-58)

23¹ Go koc luk röt jöt ebēn ku ʔethkē Jethu Pilato nhom raan Roma. ² Ku gōonykē ku luelkē, “ʔok aaci mony kēnē yök ke rec kackua nhīm, ke ye lek ke bik ajuēr cī ye tāau piny tēnē benyḡaknhom Roma. Ku aye lueel aya lōn ye yen Raan cī lōc ku dōc, benyḡaknhom.”

³ Go Pilato thiēc, “Ye yīn benyḡaknhom koc Itharel?” Go Jethu beer, “Ee ʔa, cīt te ca luel ye.”

⁴ Go Pilato yenhom wel kōcdīt kāk Nhialic ku thān awēn ku lueel, “Acīn awuōc ca yök ee raan kēnē guōp.”

⁵ Gokē ḡot ke jam apei ku luelkē, “Tēden yen koc piōc thīn ajōk aliāāp Judia yic ebēn. Acī jōk Galilia ku yen kin cī ben Jeruthalem ēmēn.”

Jethu aci ʔāth Antipāth ʔērot nhom

⁶ Nawēn piḡ Pilato ē wēlkā ke thiēc lōn yen raan Galilia. ⁷ Nawēn le ḡic lōn ye Jethu raan wun mec Antipāth ʔērot, ku yeen ē rēer Jeruthalem ē nīnkā, ke cōl Jethu aʔeth yenhom. ⁸ Go Antipāth ʔērot puō miet wēn tiḡ yen Jethu, rin ēcī kājuēc piḡ ē rienke. Ku ēcī ʔērot wīc apei bī Jethu tiḡ, ku ḡōōth aya bī kāk ye Jethu ke looi tiḡ. ⁹ Go Jethu jal thiēc wēl juēc, go Jethu biet kecīn wet tōḡ dhuk nhom. ¹⁰ Go kōcdīt kāk Nhialic ku koc piōc lōōḡ röt cuot tueḡ, ku lueelkē wēl rec apei Jethu guōp. ¹¹ Go Antipāth ʔērot kek apuruōkke Jethu bui ku leetkē. Ku rukkē alanh dhēḡ apei cīt alanh beny yekōu, ku toockē ciēn tēnē Pilato. ¹² Ku jōl Antipāth ʔērot kek Pilato, wāār man röt jal māāth akōlē.

Jethu aci tem thou

(Mt 27:15-26; Mk 15-6-15; Jn 18:39-19:16)

¹³ Go Pilato kōcdīt kāk Nhialic ku kōcdīt baai, ku koc kōk cōl ebēn, ¹⁴ ku lēk ke, “Wek aaci mony kēnē beei ʔanhom, ku luelkē lōn ē yen raan rec koc nhīm bik aliāāp looi. Ku ēmēn yen aci wet wīc yic wenhīm, ku akec yök ke la guōp awuōc cōk alōn cī wek ye gaany kājuēc apei. ¹⁵ Na cōk a Antipāth ʔērot ka kec yök ke la guōp awuōc, yen ale yen ye cōl adhuk ʔanhom. Acīn awuōc cī mony kēnē looi lēu bī ye nōk. ¹⁶ Aba cōl athat ku luony.” ¹⁷ Ruōōn ebēn akōl Yan Ayum cīn yic luōu, Pilato ē raan tōk kam koc cī mac lony te wīc koc baai ye bī lony. ¹⁸ Go thān awēn tō thīn wuōōu looi, “Nāk! Ku lony Barabath tēnē ʔo.” ¹⁹ Barabath ēcī mac rin aliām cī rot looi geeu, ku rin cī yen raan nōk.

²⁰ Ē wīc Pilato bī Jethu lony, ku ben jam tēnē ke. ²¹ Gokē ben kiu apei, “Apiēēt tim cī rīu kōu.”

²² Go Pilato ben jam tēnē ke, kēnē yen yic diāk ku lueel, “Yeḡō? Ye awāc ḡō cī looi? Acīn awuōc ca yök ke cī looi lēu bī ye nōk! Aba cōl athat ku cal ajiēl.” ²³ Gokē ḡot ke kiu apei rōldīt, lōn dhil Jethu piāāt tim cī rīu kōu. Ku kēden wēn yekē lueel aci yenhom ben guōt.

²⁴ Go Pilato wetden gam ku tēm Jethu awuōc wēn wīckē. ²⁵ Ku lony Barabath, raan wāār cī mac rin aliāāp, ku rin cī yen raan nōk. Ku yīk ke Jethu bik la luōoi tēden wīckē kepuōth.

Jethu aci piāāt tim cī rīu kōu

(Mt 22:32-44; Mk 15:21-32; Jn 19:17-27)

²⁶ Gokē Jethu kuaath ayeer. Ku wēn kuēth kek ye, ke mony cōl Thaimon raan pan Thirene bō baai, nawēn cī tim cī rīu Jethu gōōk, gokē dōm ku cōlkē aket tim ke buōōth Jethu cōk. ²⁷ Ku buōōth koc juēc apei ku diāār dhiau rienke aya. ²⁸ Go Jethu yenhom wel ke ku lueel, “Diāār Jeruthalem, duōkkē dhiau ē rienkie, dhiaaukē ē rienkun ku rin miethkun. ²⁹ Rin nīn bī ye lueel ēlā aaci thiōk, ‘Diāār mit gup aa diāār kec mīth kaḡ thueēt!’

³⁰ Ku ē yen ten bī ye aa lueel thīn aya ēlā, ‘Aḡueen buk ciet koc cī thou, koc cī wīek nhīm, koc cī kē cī wīik kenhīm kuōm piny.’ ³¹ Na ye kecīt kēnē rot looi ke tim tōc, ke yeḡō yakē tak ke bī rot looi te le yen riel.”^f

³² Ku kuath apuruuk koc karou aya, koc la gup awuōcdīt tet bik ke la nōk kek Jethu. ³³ Nawēn lek te cōl Ithkal dōōt, ke pieet Jethu tim cī rīu kōu ku koc awēn karou, raan tōk lōḡ cuēc ku raan det lōḡ cam.^g ³⁴ Go Jethu lueel, “Wā, pāl piny tēnē ke, keek aa kuc kē loikē.”

Ku cuet apuruuk gek bik aleth Jethu tek kamken. ³⁵ Ku jōl koc juēc kōōc ē teen ke daai ye. Ku ten awēn ē ye kōcdīt Itharel bui ku luelkē, “Ee koc kōk kony, cōl akony rot te ye yen Raan cī Nhialic lōc ku dōc.”

^f23:31Wetde yic ee duer a kēlā, “Na ye kē cīt kēnē rot looi tēnē raan cīn awuōc cī looi, ke ye tak yeḡō bī rot looi tēnē raan la guōp awuōc.”

^g23:33Ten kēnē ee ye cōl kēlā rin thiēc yen kek gōndīt la gueḡ-ḡeḡ cīt apen nhom raan.

³⁶ Ku bui apuruuk aya. Ku bik tēnē ye ku gemkē muōn abiēc cī wac, ³⁷ ku luelkē, “Na ye beny kōc Itharel ke yī kony rot.” ³⁸ Ku pieetkē tim cī ye gōt thīn kēlā nhial tim Jethu nom, “[scKĒNĒ Ē BĒNYŅAKNHOM ITHAREL. |d”

³⁹ Go raan tōk kam kōc awēn cī piāat kek ye lat ku luel, “Cī ye Raan cī Nhialic lōc ku dōc? Kony rot ku kony yo aya.” ⁴⁰ Go raan deetē puō riāak ku nyieeny, “Cī ye cak riōc Nhialic agut te thou yīn aya? Yok aaci tem thou cimēnde. ⁴¹ Ku awācda adhilku jōt rin yok aa col kē cuk looi, ku mony kēnē acin kēreec cī looi.” ⁴² Ku luel tēnē Jethu, “Tak ya te yeet yīn Bāānydu yic.” ⁴³ Go Jethu lek ye, “Yīn alek yic, yakōl yīn abi rēer kek ya pan Nhialic.”

Jethu aci thou ayic

(Mt 27:45-56; Mk 15:33-41; Jn 19:28-30)

⁴⁴ Nawēn tēcīt akōl ciel yic ke muōōth loi rot pan awēn, ku cīi akōl ruel yet tāān akōl. ⁴⁵ Ku tewēn ka alanh ye geēn bī luān Nhialic tek yic alōn thīn reet yic rou. ⁴⁶ Ku cōt Jethu rōldīt ku luel, “Wā, weikie aaca than yīcin.” Acī wēlkā luel ku thou.

⁴⁷ Nawēn tīn bāny apuruuk kē cī rot looi, ke lec Nhialic ku luel, “Mony kēnē ē ye raan path alanden.” ⁴⁸ Nawēn tīn kōc ke cī kenhiim kut teen bik daai kē cī rot looi, gokē dhuk baai ke gut kepuōth. ⁴⁹ Kōc ke njec kek Jethu ēbēn, agut diāar ke buōth ye wāar jīel yen Galilia, aake daai ē kākā ēbēn.

Jethu aci thiōk

(Mt 27:57-61; Mk 15:42-47; Jn 19:38-42)

⁵⁰⁻⁵¹ Mony cōl Jothep ē tō thīn. Ku yeen ē raan gen Arimatheo, pan Judia. Jothep ē ye raan path la cōk, ku yeen ē njōth ben bāāny Nhialic. Ku yeen ē ye raan akut luk kōc Itharel.

⁵² Nawēn le tīn lōn cī Jethu thou, ke la tēnē Pilato ku thiēc guōp Jethu. ⁵³ Ku bīi piny tim kōu ku der alath, ku tēu rañ cī wec kuur yic, rañ cīn raan cī kañ thiōk thīn. ⁵⁴ Ee ya akōl nīn dhiēc, akōl ye kōc rōt guiir rin akōl cīi kōc ye luui, ee bī guō ben.

⁵⁵ Nawēn cī guōp Jethu beei piny tim kōu, ke diāar wāar bō kek Jethu Galilia, buōth Jothep ku tīnkē te cī guōp Jethu tāāu thīn rañ yic, ⁵⁶ ku dhukkē baai ku lek miōk njir guiir bī kek guōp Jethu ben tōc. Nawēn akōl cīi kōc ye luui, ke ke lōn cīt te ye lōn Mothith luel ye.

Jethu aci rot jōt rañ yic

(Mt 28:1-10; Mk 16:1-8; Jn 20:1-10)

24 ¹ Naçon nhiäk rial akōl Nhialic, ke diāar la rañ nom kek miōk njir cik guiir. ² Ku yōkkē alel cī rañ kum nom ke cī laar wei. ³ Nawēn lek rañ yic ke cīi guōp Jethu yōk thīn. ⁴ Tewēn keec kek ke cī gāi, ke rōor karou ceñ aleth yer apei cī la toptop bō, ku keeckē kelōm. ⁵ Go diāar riōc ku gutkē kenhiim piny. Go rōor wēn luel tēnē ke, “Yeñō ye wek raan pīr ben wic ten kōc cī thou? ⁶ Acīi tō tenē, aci rot jōt. Takkē kēwāar cī lek we ēlā wāar noot yen Galilia, ⁷ lōn Manh Raan abi thōn kōc rec bik piāat tim cī rīu kōu, ku abi ben pīr akōl ye nīn diäk.” ⁸ Go diāar wēl wāar cī Jethu lek ke tak.

⁹⁻¹⁰ Maria Magdalena, ku Joanan, ku Maria man Jemith ku diāar kōk, kek aake cī la rañ nom. Nawēn dhukkē ke la kōc Jethu buōth kathiāar ku tōk ku atuuc kōk, lek kē cī rot looi. ¹¹ Go atuuc tak lōn ē yen wet lueth, ku cik gam. ¹² Go Pīter rot jōt ku riñ rañ nom bī la tīn. Nawēn guñ yekōu piny ku tīn rañ yic, ke tīn aleth wāar cī guōp Jethu der kepec. Go dhuk baai ke cī gāi aya kē cī rot looi.

Jethu aci rot nyuōth kōcken ye buōth karou

(Mk 16:12-13)

¹³ Ya akōl tōn awēn, ke kōc Jethu buōth karou jōt rōt bik la pan cōl Emauth, ku ē mec kek Jeruthalem te cīt kilomīter thiāar ku tōk. ¹⁴ Tewēn cieth kek ke jam ku takkē kāk cī rōt looi, ¹⁵ ke Jethu bō ku cieth ke kuany keyōth. ¹⁶ Ku mār kēdān kepuōth bik cīi njic. ¹⁷ Go Jethu ke thiēc, “Yeñō bakē luel tetheer awēn cieth wek?” Gokē kōc ku dōtkē piny ke cī kenyin wel. ¹⁸ Go raan tōk kamken cōl Kliōpath wetde beer, “Adhil a yīn raan tōn reer Jeruthalem kuc kāk cī rōt looi thīn ye nīnkā yiic.”

¹⁹ Go Jethu thiēc, “Ye kājō?” Gokē beer, “Aa kāk cī rōt looi tēnē mony cōl Jethu, raan Nadharet. Kāk cī looi ku wēl cī luel aye nyuōth lōn ye yen raan ril kāk Nhialic tīn. Ku aci Nhialic ku kōc ēbēn gam lōn ril yen kēriēc ēbēn yic ye luel ku looi. ²⁰ Acī kōckuan dīt kāk Nhialic ku kōc piōc lōōn dōm ku gemkē bāny

mac baai bi tem thou, ku pieetkë tim ci riiu kou. ²¹ Ku ë yeku njöth lon ye yen raan bi koc Itharel waar karec yiic. Ku ë nin kadiak emen ten looi kakkä röt. ²²⁻²³ Diäär kök akuötda yic, aake ci riel ran nom wen anhiäk, ku lek dhuk ke wet ci yook ben col agei lon liiu guäpde ran yic. Ku lon ci kek atuuc Nhialic cie lek ke lon piir Jethu tin. ²⁴ Go koc kök kamkua rin bik la tin. Ku yökkë ayic lon liiu guöp Jethu ran yic, cit te ci diäär ye lueel thin.”

²⁵ Go Jethu lek ke, “Wek aa koc cin kë njieckë! Wek aacie käk ci koc käk Nhialic tin lek we ye lac gam! ²⁶ Këc koc käk Nhialic lueel wäär, lon bi Raan ci loc ku doc käjuëckä ran guum bi jal la Bäände yic.” ²⁷ Ku tët Jethu ke käk ci lueel rienke wël theer Nhialic yiic, jock athör Mothith agut käk ci koc käk Nhialic tin göt.

²⁸ Nawen cik thiök kek pan awen le kek thin, ke Jethu loi rot ke cit raan ber tuej. ²⁹ Gokë pëen ku luekë, “Reer ke yo, aköl aci cuöl.” Go la baai ke ke. ³⁰ Tewen ci kek nyuc bik mith, ke Jethu löm ayup ku doc ku beny yic, ku gem ke. ³¹ Nyin yic tewen ke njickë ku mer bik ci ben tin. ³² Gokë röt thiëc ë röt, “Yo këc puöth ayum tewen jiem yen kek yo, ku teet wël ci göt theer tënë yo.”

³³ Ku jötkë röt nyin yic ku dhukkë Jeruthalem. Ku yökkë koc Jethu buöth kathiäär ku tök ku koc kök ke ci kenhüm mat, ku lëkkë ke, ³⁴ “Beny aci rot jöt ayic, ka ci rot nyuöth Piter.” ³⁵ Ku jöl koc wen bö Emauth karou kë ci rot looi dhel yic teet, te ci kek beny njec thin wen beny yen ayup yic.

Jethu aci rot nyuöth atuöcke

(Mt 28:16-20; Mk 16:14-18; Jn 20:19-20; Luoi 1:6-8)

³⁶ Wen jot jiem kek, ke Beny bö ku keec kamken ku lueel, “Bi döör arëer ke we.”

³⁷ Gokë pek wei ku riöckë ëben ku takkë lon yen atiep yen yekë tin. ³⁸ Gokë thiëc, “Yenjö riöc wek? Yenjö ye wek diu lon ci yen ye ya? ³⁹ Tienkë yacin! Ku tienkë yacök, ee yen ayic. Gatkë ya, ku abäk tin rin atiep acie la adiööh ku yom cimën ye wek ke tin kek ya.” ⁴⁰ Ku wen lueel yen këne, ke nyuth yecin ku yecök ke. ⁴¹ Ku jot cik gam, rin miet diit ci kek puöth miet ku gai diit ci kek gai. Go Jethu ke thiëc, “Le mieth camkë tö thin?” ⁴² Gokë gam rec ci tuak ⁴³ ku cuet ke deei kek ëben.

⁴⁴ Ku jöl lek ke, “Kakkä gup aa käk ca lek we wäär jot reer yen ke we, lon bi këriëc ëben ci göt Löj Mothith yic, ku athör koc käk Nhialic tin ku diet Nhialic yic aya ë rienkie, aa dhil röt tiej teden.” ⁴⁵ Ku kony ke bik wël theer Nhialic deet yiic, ⁴⁶ ku lek ke, “Ayakë tin te ci ye gat thin lon Raan ci loc ku doc, ë bi gum ku jöt rot ran yic aköl ye nin diak. ⁴⁷ Ku aci wël ci göt lueel aya lon dhil koc pinynhom ëben, jock Jeruthalem lek bik kepuöth wel Nhialic, bi karacken päl piny. ⁴⁸ Wek aaci kakkä tin ke ci kenhüm tiej. ⁴⁹ Ku wek abi tuöc Wëi Nhialic wäär ci Wä lueel. Reerkë geeu yet aköl bi riel nhial këne ben tënë we.”

Jethu aci yäth pan Nhialic

(Mt 16:19-20; Luoi 1:9-11)

⁵⁰ Nawen ke Jethu jiël ke ke ku lek Bethani. Ku jöt yecin nhial ku doc ke. ⁵¹ Tewen doc yen ke, ke jiël tënë ke ku jöt ë nhial. ⁵² Gokë door ku dhukkë Jeruthalem ke ci puöth miet. ⁵³ Ku keek aake ye lac reer Luaj Nhialic ke lec Nhialic.